

**NATIONAL ASSEMBLY OF
SEYCHELLES**

Thursday 05th February 2026

The Assembly met at 9am

National Anthem

Moment of Reflection

Madam Speaker in the Chair

MADAM SPEAKER

Bon, mon a dir bonzour tou Manm e tou dimoun ki pe ekout nou e ki pe swiv nou lo rezo medya sosyal. Nou ava kontinyen deba lo ladres Prezidan lo Leta Lanasyon. Nou konmans avek Onorab Francois Adelaide.

HON FRANCOIS ADELAIDE

Mersi Madanm Speaker. Bonzour Madanm Speaker, bonzour tou Manm Onorab, bonzour Madanm Clerk, Depite Clerk, tou dimoun ki a lekout, espesyalman zabitan Baie Lazare.

Madanm Speaker, ozordi mon ganny ankor en sans adres sa 8enm Lasanble e pep Seselwa lo diskour Leta Lanasyon ki Prezidan Patrick Herminie ti prezant avek nou Mardi pase.

Apré bokou analiz, swa avek bann dimoun dan distrik, biznesmenn, menm antre nou dan Lasanble, i kler ki leta nou

nasyon atraver sa bann dernyen moman i en pe an dout.

Mon pa oule senm okenn rimer, swa lafreyer, swa konfiz okenn Seselwa. Me avek sa mannigans premye 100 zour i kler ki keksoz i riske pa tro dan bon.

Sa lannen parey in ganny dir, Seselwa e Sesel pou selebre 50an laniverser nou Lendepandans. Mon ti annan 2an ler sa levennman ti arive. E byensir, mon pa tro rapel ki ti pase. Apre 1an pli tar nou ti sipoze ganny liberasyon.

Me listwar, menm avek bokou kontradiksyon an kontan tou sa ki nou ti ganny montre dan lekol e atraver nou frekantasyon, pa'n anpes mwan konman en sitwayen responsab pou vin azour avek vre listwar aktyel mon pei.

Sa ki'n arive in pase e ozordi nou dan sa konzonktir kot nou ete, e nou rol se ede e gard sa zoli pei pli byen ki nou ti vin zwenn li. Lavi in evolye e byensir nou pa kapab ganny kit deryer.

Lendepandans en pep se en sapit ki vreman enportan dan son listwar e nou tou nou konnen, e nou bezwen atas bokou lenportans avek sa levennman.

Ozordi ler nou pe al selebre 50an lanniverser Lendepandans, nou pe ganny dir pa bezwen demann

kestyon. Tou sa ki nou'n dir nou pou fer. Nou zis bezwen *trust the process*. Pa mwan ki'n evante, me *Doctor President* in repete a plizyer repriz dan son ladres SONA.

Angiz ki i pou dril sa dan nou latet ki finalman nou pou bezwen agree ki sa i mekanizm ki nou pou bezwen adopte e viv avek. Byensir, mon ti ava kontan ki pep e pei i benefisye. Me konman en pep ki nou sipoze endepandan, matir, zis *trust the process* pa ase.

Nou bezwen demann kestyon, rod leksplikasyon pour ki nou konpran e konnen ki mannyer bann keksoz pou abouti san konpromi nou lendepandans konman en nasyon.

Nou'n tann detrwa proze ki'n ganny anonse in dir ki in fini negosye. Nide pa mal, me reperkisyon ki nou bezwen konnen. Dan sa pti letan ki mon pe viv mon'n kapab aprann en keksoz e mon krwar ladan, se ki dan lavi napa naryen ki pou naryen.

Si ou ganny en keksoz pour naryen, byen probab ki i annan enn ki pe peye par la. E ler nou tann dir nou pe al ganny sa bann proze san gran leksplikasyon, i fer nou demann ankor plis kestyon.

Lide i bon, me ki reperkisyon nou pou ekspekte a lokazyon nou 50enm Laniverser Lendepandans?

Eski i dir zot pou ganny donnen konman en kado pour nou lendepandans, ouswa nou pou bezwen donn en bout nou leritaz, zis parey sa fame dikton kot Silhouette ti ganny vann pour en vyolan?

Nou'n fek selebre Lazournen Labolisyon Lesklavaz dan nou pei. Nou'n rekonnet ki sa sapit ki ti parmi bann sapit nwar dan lavi en pep, e nou'n fer komitman ki zanmen ankor sa pratik fodre egziste.

Mon konnen ki dan lavi napa naryen ki fasil. Nou bezwen travay dir, sezi tou loportinite pour nou avans devan. Parfwa i difisil. Parfwa ou dekouraze, me lanvi pou reste endepandan pou ganny sa ki ou anvi pou amelyor ou lavi i sa motivasyon ki kit ou determinen pou atenn ou lobzektif.

Se sa ki mon kontinyen dir avek tou bann Seselwa. Nou desten i dan nou lanmen. Nou bann desizyon i enportan, annou fer li byen. Annou fer li avek tou nou konsyans. Kot Sesel in arive, zanmen e zanmen i devret annan okenn endividi, swa okenn groupman, swa okenn pei par okenn mannev sey vini pou anbet nou.

Swa avek bann don, swa avek bann faver zis pour nou konpromiz nou lendepandans. Nou souvrennte i serye e

sakre. Napa negosye ladan sa enn. Esperon ki tou bann kondisyon, tou bann negosyasyon, tou bann don ouswa bann kado i ganny fer avek leker ouswa avek tout lentegrite. Me non pa avek bann mannev pour nou konpromi nou souvrennte.

Ozordi Sesel atraver sa ki pe pase i devret konsern nou tou. Tro bokou divizyon. Tro bokou mefyans. Tro bokou manipilasyon. Mon pa en leksepsyon, mon osi mon responsab. Mon konsyan ki mwan osi i annan ledwa ki pe montre lo mwan.

Me set atraver lakseptans e annan sa dezir pou vwar keksoz vin pli byen ki nou pou kapab remedye sa sityasyon.

Doctor *President*
Herminie in osi koz lo linite. Byensir mon dakor avek li. In rekonnet ki nou konman en pei e en nasyon nou devret adres sa size e adopte linite konman en valer pour nou bouz devan.

In menm al pli lwen e dir ki i pou anmenn en Lalwa pour kriminaliz “Ek nou, Pa ek nou”. Sa nide osi i bon. Me bann aksyon son Gouvernman tou dernyerman pa’n vreman ilistre byen sa laspirasyon. Mon pa anvi kontradir son parol, me levidans la deor pa annakor apropos sa ki in prese.

Nou’n al dan en kanpanny politik kot in annan plizyer latak, enn a lot. Sa se politik. Bokou in ganny dir, menm parol ki pa ti merite. Bokou promes ti ganny fer, menm bann ki pa realis. Seselwa in fer son swa, menm serten dan linyorans.

US in gannye e nou respekte. Nou annan en transfer pouvwar ki’n deroul dan lape. Nou’n kit en program travay ki nou ti anvizaze kontinyen pou akonplir, me nou pa’n reisir.

Dimoun in sanze, me Gouvernman Sesel in reste. Bokou in ganny fer e bokou i reste pou fer. Nou pep i bezwen ganny dir laverite e petet atraver bann bon komunikasyon, finalman enn de i a kapab komans *trust the process*.

Bokou vizit televize par nouvo ladministrasyon, enkli bann Minis, kot bokou zot in fer resortir ki progre i evidan e zot pou kontinyen.

Eski sa se pa laprev ki i annan bokou ki’n ganny akonplir, menm si i reste ankor pou ganny fer? Menm Prezidan Herminie in avoue ki devlopman Assomption pou benefisye Sesel.

Bokou proze ki Gouvernman presedans ti’n aprouve pe ganny enplimante. Sa pa devret en problem si i pe benefisye nou nasyon. Mon

siporte. I kler ki *LDS* i annan en plan travay ki ti serye e progresiv.

Akoz ki nou bezwen fer krwar ki tou sa ki Gouvernman *LDS* in fer pa ti bon, swa ti napa plan? Eski nou pa devret realis, donn kredi kot i merite e aranze kot i devret ganny aranze?

Mon panse nou devret pe aplodir sa bann travayer profesyonnel e eksper ki'n ede dan devlopman sa pei, aköz lafason ki keksoz pe ganny enterprete pou blanm Gouvernman *LDS*, sa bann travayer pe ganny trennen dan kankan politik, menm kan sa bann pov travayer zot pa pe anzard zot avek politik, me pe travay pour byennet zot pei.

Kot zot pe ganny denigre, trennen dan bann diskord, abes zot kredibilite, pa aköz zot pa'n delivre, me aköz zot anvi blanm Ramkalawan e serten son bann asosye.

Leta nou nasyon pe montre nou avek sa tandans ki pe arive, byensir Sesel pou kontinyen reste divize pour ankor en pe letan, amwen ki bann dirizan Sesel i rekonnet e korize.

Esperon ki plis demars ava ganny fer lo sa size e tre byento nou ava kapab vwar en platform kot bann akter ki annan sa manda ava zwenn e kontribye dan sa demars.

Akoz parey sa proverb i dir "ler bann gro lefyan i deside lager, se zerb ki ganny kraze". Silvouple protez sa bann zerb ki pe kit nou pei zoli.

Ozordi i annan sitan lakonplisman, sitan bon keksoz ki'n arive dan sa pei. Nou'n ganny rekonnet konman en ti pei avek bokou abilite. Savedir *LDS* in kontribye dan son bann bon rezilta. Nou zefor mon konnen pa'n al anven.

Bokou Seselwa in benefisye, menm si i annan ki ti ankor pe espere. Bokou Seselwa in ganny loportinite, menm si i ti annan ankor ki ti pe espere. Bokou in sezi loportinite e zot in bouze, me nou konnen ki pa tou keksoz ki'n parfe. Pa tou keksoz ki'n kapab arive e materyalize.

Lo mon kote mwan, mon pa anvi rat sa sans pou dir mersi. En gro mersi pour nou 5enm Prezidan Sesel, Mr Ramkalawan.

(APPLAUSE)

HON FRANCOIS ADELAIDE

Mersi osi nou Vis-Prezidan Afif.

(APPLAUSE)

HON FRANCOIS ADELAIDE

Son *Cabinet* Minis e tou Legzekitiv. Zot kouraz pa'n al

anven. Bokou Seselwa in apresye e pou touzour apresye zot byenfer. Mon konnen ki dousman me sirman bokou keksoz ti pou tonm an plas e plis Seselwa ti pou kontinyen benefisye.

Sa ki ti fer mon pli apresye sete ki meritokrasi ti renye parmi bann laplikasyon e desizyon ki ti pe ganny pran. Ti'n ariv en letap kot ou pwennvi politik ti nepli en kriter pour ou ganny en lasistans, en travay, ouswa en loportinite.

En Sesel ki liberte lekspresyon ti'n renye e tou dimoun ti lib pou dir tou sa ki zot anvi, menm kan zot ti napa naryen pou dir. En Sesel kot Seselwa ti eksprim zot lopinyon, menm ler zot ti menm napa lopinyon.

En Sesel kot lenfrastruktir ti pe konstrir enn apre lot. Menm dan Baie Lazare nou pa ti pe mal pase, e nou ti pe benefisye an plennman.

Semen *West Coast* kot semen e lenfrastruktir in vin alaoter. Mannyer semen, lalimyer, *pavement*, *crash barrier*, *railing* ti'n ganny enstale dan Baie Lazare, bokou dimoun in sirprann, menm si souvandfwa, Lopozisyon sa letan ti sey zot mye pou anpes sa proze abouti. Gouvernman *LDS* pa'n vwale. Nou ti konnen ki sa ti

pou benefisye *the many* e nou'n pouse pour li abouti.

Baie Lazare nou'n trouv travay proze lakaz kot nou zabitan in benefisye. *For the many*. Nou'n trouv lagrandisman semen Anse Gaulettes, Val d'Andorre e byento Bougainville. Tousala i *for the many*.

Bokou in ganny fer *for the many*, e mwan mon fyer ki zabitan Baie Lazare pa'n ganny kit deryer. Zot kapab pa kontan mwan, pa kontan *LDS*. Me zot pou bezwen apresye ki zot in benefisye, gras a determinasyon zot *MNA* avek Ladministrasyon *LDS* ki'n delivre.

Nou ti ava kapab fer pli bokou, me nou'n ganny met retar par bokou bann fakter ki an deor nou kontrol. Pa vedir ki nou ti napa komitman, me nou'n vwar kot bokou sabotaz pou fer Seselwa soufer, fer Seselwa fristre, fer Seselwa perdi lespwar e dekouraze.

Dan diskour Mr Herminie, i ti eksplike ki Gouvernman *LDS* in tro dousman pou egzekit bann proze. Me kan sete sa menm groupman ki ti dir fodre *LDS* i koup bann Proze Kapital.

Byensir i annan proze ki pa'n kapab ganny materyalize, pa aköz nou pa ti konnen ki nou pe fer, me se senpleman aköz nou ti bezwen swiv tou

bann prosedir ki an plas pour ki nou anliny avek Lalwa.

Ozordi nou vwar bokou komisyon lanket ki pe ganny entrodwir. Eski si nou dan sa manda nou ti'n kas kontour aköz nou ti anvi delivre, ki ti pou arive ozordi? Konbyen bann bon vivan ki ti annan Sesel aker e ki ti annan lenerzi pou *fast track* bann proze pour lenterre Sesel e Seselwa ti pou bezwen ganny zize, imilye zis pour gen politik serten dimoun?

Onorab Georges dan sa larepons in eksprimen ki mannyer atraver bann mannev pe fer leta nou nasyon kapab tonm dan en leta kritik. Sa sityasyon i enn ki'n preokip nou depi en pe letan.

Mon pa anvi senm okenn lafreder, ni menm okenn dout dan latet Seselwa. Me mannyer mon vwar ki mannyer Mr Herminie e son lantouraz pe anvi diriz Sesel, mon napa dout si keksoz pa sanze, si Gouvernman dizour pa retourn azour avek son Konstitisyon kot bann dwa fondamantal i ganny respekte, nou pou vwar Sesel kot pe regrese. E i pa pou bon pour nou pep e nou pei.

Menm avek tou nou diferans, nou pa anvi viv dan Sesel kot en Seselwa pa vwar li ganny respekte koman en zanfan Sesel, pe enport son

krwayans relizye, son ras. Sirtou son lapartenans politik.

Ozordi menm kantmenm LDS in ariv dan Lopozisyon mon pa war sa koman en defayans, me nou pran sa koman en lot letap dan nou demokrasi nou zoli pei. I kler ki LDS in delivre par lao lekspektasyon.

Me serten mekontantman, aste *vote*, bokou rimer e propagann avek lenterferans enternasyonal in fer ki LDS pa'n kapab tenir son mazorite. Sa ki'n arive se pa en malediksyon, me se en lot letap kot Seselwa in ganny sans viv anba metod *SPPF/US* e anba prensip LDS.

Atraver sa 5 an, Seselwa ava kapab konpare, analize e pran desizyon lo direksyon ki zot anvi zot pei i ganny dirize. Petet lafason ki mon lentervansyon i ete, bokou ava kritike. Ki sa i normal. Me mon pe fer en analiz fran.

Byensir, pa tou keksoz ki mon dezagree. O kontrè i annan lanons ki mon kapab sipòte si mon ganny plis leksplikasyon, byensir an konsiltasyon avek bann profesyonnel e eksper dan bann domenn ki mon napa ase nosyon ladan.

Pansyon 63an bokou dimoun i an faver e mon pa kapab koz kont aköz mon la koman en reprezantan Lepep.

Si mon ganny lasirans par bann profesyonnel ki sa i pa zis en desizyon popilis, me i enn ki pou reste soutenab. Mon aksepte. Pa zis dir mwan laz pansyon pou retourn 63an, zis mon pou bezwen *trust the process*.

Mon an faver ki Sekirite Sosyal an 2029 pou ariv Rs10mil, me servi sa teori *triple lock* pa marse. Pli move, pa dir mwan *trust the process*, aköz mon pa *believe* ladan.

Plis detay sa *process* ki nou tou nou ti ava kontan gannnen, apre nou ava konpran e siporte. Pa fer parey bann Tonton Makout ti fer. Fer ou rod nilon, *gunline*, pyos, apre servi sanmenm pou egzekut ou avek. *Explain the process* e nou a siporte kot i bon.

Nou'n tann nonm R59milyon ganny mete pour *write-off loan*. Parsyelman, mon pou dakor, me nou bezwen ganny byen lenformasyon lo lekel bann groupman ki pou kapab benefisye.

Mon an faver bann Seselwa ki pe pas dan bann difikilte pou re pey zot *loan*. Bann kriter i devret kler, transparan e vreman merite.

Bokou bann promes eleksyon in ganny fer. Mon pa kont sa bann promes. Si Seselwa pou benefisye, mon siporte.

Mon sel lenkyetid se eski sa bann benefis pou kapab ganny mentenir avek swadizan *process* ki zot anvi nou, nou *trust*?

Koman Manm Lasanble, nou annan bokou kestyon. Esperon ki ler nou anmenn kestyon pou kestyonn *the process* nou pa ava ganny war pe tro enterfer avek Gouvernman, e nou ava war bann mannev pou anpese. Ouswa nou ganny leskiz apre leskiz.

Drog dan nou pei in konmans vin lo en nivo alarman. Dan bann kominote dimoun i kontinyen adres zot konsern e demann lasistans avek bann departman konsernen pou remede sityasyon e ogmant sekirite dan nou bann vwazinaz.

Mon konnen ki sa lalit pa fasil, me mon ti a voudre war plis langazman, plis patrol, plis *deterrent* pou ede met sa sityasyon anba kontrol.

Nou'n tann koz lo pey bann viktim *TRNUC*. Eski i devret ganny adrese? Wi, mon konvenki ki bann viktim i devret ganny zot *dues*. Zot pa responsab pour sa kalite tretman ki zot ti'n bezwen sibir. I mal e nou rekonnet.

Mon sel dezakor avek *statement* Dr Patrick Herminie se ki in met zis 20milyon e i pa'n elabore lo kote larestan

larzan pou sorti pou rekonpans bann viktim.

Parmi bann endividi ki'n ganny akize konman *perpetrator*, osi Parti *US* i sa sel parti ki'n ganny afilye avek sa bann atosite ki'n arive. Mon ti ava demann *Doctor President* pou si i vreman pe travay *pour the many*, met sa slogan an aksyon.

Se pa *the many* ki ti fer sa bann kriyote, me sete *the few*. Se pa *the many* ki ti benefisye avek sa bann atosite. Bokou Seselwa ankor pe debrouye, kan nou'n trouve zis *the few* ki'n benefisye e ankor pe zourir.

Soulaz *the many* avek sa det silvouple. Nou pa responsab. Nou pa'n ganny naryen e fer sir sa ki responsab i peye. Eski nou pou vwar sa kontribisyon sorti kot parti pou donn lanmen pey konpansasyon e liber *the many* kont sa bann gro fardo?

Byensir, nou pe esper sa rapor avek komite e byensir nou pou deliber lo la. Nou kontan pour bann viktim ganny zot konpansasyon, me nou bezwen fer li byen.

Dan diskour *President Doctor* nou pa'n tann naryen lo ki mannyer nou pou kontinyen fer agrandi nou lekonomi. Nou'n vwar bokou bann depans par isi. Bokou bann depans par laba.

Me nou pa vreman trouve ki mannyer nou pou

kontinyen atrakte plis lenvestiser ouswa bann lezot mekanizm pour nou kontinyen anbelir nou lekonomi. Nou konsernen e nou bezwen rod fason pou kestyonn *the process*.

Nou dan distrik Baie Lazare nou pe esper promes pour nou konnen lekel sa bann dimoun ki ti deter lekor dan Baie Lazare.

Mr President Dokter in dir nou i konnen. Bann zabitan Takamaka osi pe espere pour zot osi konnen lekel sa bann dimoun ki ti fer sa bann keksoz. Ou ti promet nou ki ou ti pou vin dir nou tre prosennman.

Bout pli kritik ki Seselwa i devret enkyet e konsernen i kot i danzere pour nou la demokrasi se mannev pour *President* Dokter enterfer atraver sa lot biro ki i anvi kree pou enterfer avek travay Prokirer Zeneral.

Pouvwar ki i annan dan Legzekitiv koman Prezidan i deza bokou. I kapab fer bokou pour lepanouisman sa pep e son sitwayen. Mon vwar sa pa normal e nou devret konsernen.

Tou dernyerman nou'n vwar lenterferans ki pe target lenstitisyon Zidisyer. Menm apre kot bann akize ti admet devan Lakour ki zot ti komet sa bann aksyon akoz zot pa ti dakor ek Gouvernman *LDS*,

levidans i kler lo papye devan Lakour. Lenterferans dan lenstitisyon Zidisyer i evidan, e sa pou fer ki Prezidan pou kapab annan kontrol lo tou bann zizman. E la kot nou pou kapab vwar labi pouvwar.

Konman en Lasanble Nasyonal e sirtou nou lo sa kote latab nou pa kapab les sa arive. Nou la lo sa kote latab nou bezwen dir kler avek *Chief Justice* Ronny Govinden pou met son lipye ater, defann son lenstitisyon kont sa bann mannev pour *undermine* son lendependans.

Madanm Speaker, an konklizyon, mon bezwen fer sorti byen kler ki *LDS* atraver son legzistans, menm dan Lopozisyon oparavan, menm ler nou ti dan Gouvernman apartir 2020 ziska 2025, menm ler nou'n retourn ankor dan Lopozisyon apre 2025, nou pa'n deroute lo nou bann prensip.

Kot i byen, nou'n toultan siporte. Kot i mal, nou'n rekonnet e rod fason pou aranze. Nou pa'n sanz nou prensip. Nou krwar dan la demokrasi. Nou ganny gide par nou Konstitisyon. Nou'n perdi eleksyon wi, me nou konnen nou lakonplisman i bokou e pa pou zanmen ganny efase. Laprev i la e i pou reste.

Atraver nou premye Konvansyon ki nou'n fer Lendi pase, siporter *LDS* in afirm sa.

Kot in annan dout ki *LDS* ti'n preski dezentegre, nou'n montre ki nou ankor relevans e nou pou kontinyen reste sa lot opsyon pour nou pep e nou pei.

Atraver nou tenm lespwar, byensir en lot sapit in reouver e siporter in afirmen. Nou pa pou sove pou al an egzil, me nou pou reste la. Nou pa pou per pou afront adversite.

O kontrè, nou pou pli determinen pou defann sa ki byen e kondann sa ki mal. Nou pou reste ini konman en parti ki anvi vwar meyer lavenir pour nou pei kot prosperite i konsernen.

Nou krwar dan linite. Nou krwar dan latransparans. Nou krwar dan rann kont. Nou krwar dan Laliberte. Nou krwar dan en sistenm ki les pep epanouir, menm avek diferan pwennvi. E nou krwar dan en demokrasi.

Mon konman sa *MNA* ki'n kapab ganny elekte pour en 3enm manda, menm avek sa bann diferan lafors ki ti kont mwan, mon reste konvenki ki sel fason pour en pep e en pei devlope se enstrir zot avek laverite, travay dir e les zot deside.

Mersi tou bann dimoun ki'n krwar dan mwan. Mersi pour Parti *LDS* ki'n vwar e krwar dan mon abilite. Mersi pep Seselwa pour zot sipor

kontinyel dan sa travay nob ki parfwa demann bokou. Avek zot led, gidans e sipor zot in fer mwan vin sa ki zot ti anvi mon vini. En defander la demokrasi, kot okenn mannev destabilizasyon pa'n zet mwan ater.

O kontrer, zot in ede fer mwan vin pli vizilans e pli rezilyans. E se pour sa rezon ler i annan bokou lensertitid kot zot pe kestonn nou legzistans konman en parti, mon promet zot ki mon pou reste akote zot byen determinen avek lespwar ki nou pou travay pou kit *LDS* relevan.

Anba nou slogan "Lespwar pep Seselwa", byensir avek tou konviksyon nou dir avek menm lavwa; "Nou pa pou zanmen les tonbe Sesel e Seselwa". Mersi Madanm Speaker.

(APPLAUSE)

MADAM SPEAKER

Onorab Vidot.

HON AUDREY VIDOT

Madanm Speaker. Tou Manm Onorab. Tou manm Sekretarya Lasanble. Tou manm piblik ki a lekout, espesyalman zabitan Roche Caiman, bonzour.

Madanm Speaker, apre ki mon'n swiv e ekout tou bann Manm koze diran sa 2

zour, permet mwan adres serten pwen e fo lenformasyon ki serten Manm *LDS* in fer e ki i enportan pour manm piblik konnen e byen konpran.

Atraver ou Madanm Speaker, mon pou konmans dir avek Dirizan Lopoziyon ki Prezidan Patrick Herminie i en zonm brav e ki annan kouraz pou admet kot i fer fot e pou adrese e pou korize. Se sa ki nou apel en dirizan onnet.

Mon le met lo rikord Madanm Speaker, ki ler mwan Audrey Vidot ki *Chairman* Komite Defans ek Sekirite ti resevwar demann ofisyel vin par ou Lofis Madanm Speaker pou sa Komite zwenn e fer son travay dapre ki Lalwa i preskrir, bann Manm Lopoziyon ti deside proteste par refize reponn zot *email* e mesaz dan group *WhatsApp* ki Sekreter Komite Lasanble ti anvoy zot.

E zot ti menm refize pou partisip dan diskisyon nominasyon Mr Sabry Khan ki ti sa kandida ki Prezidan Patrick Herminie ti nominen.

E piblik i bezwen konnen ki dan sa 3 Manm *LDS* lo sa Komite, Onorab Gervais Henrie, Onorab Francois Adelaide e Onorab Dominic Savy, zis 2 Manm ki ti soumet zot form leksplikasyon pour zot protestasyon pour sa zour ki zot pa ti pe partisip dan sa sesyon travay pour lannen

2026 pou diskrit nominasyon Mr Khan.

Parkont, tou Manm sa komite in fini ganny peye zot *allowance* plen pour mwan Zanvye, menm si i annan enn pa ti ankor soumet son form pou dir aköz e rezon ki i pa ti asiste sa sesyon travay.

Madanm Speaker, bann Manm ki rapel byen ler Onorab Gervais Henrie ti asiz lo sa kote latab ki nou la ozordi, i ti dir ki fodre koup larzan bann ki parese. Be ozordi, parese ozordi lo lot kote latab in ganny tou zot larzan menm si zot in deside proteste. Ki i normal koman bann parti Lopoziyon.

E Onorab Georges ek son bann Manm, atraver ou Madanm Speaker, ler zot oule piblik i konnen ki pe pase, donn tou laverite. Pa toler son Manm ki fer louvraz zournalis akote pou fer servi zot zournal pou donn fo lenformasyon avek piblik.

Zis parey sa kominike kot Lasanble ti donn direktiv pour 8 Manm Distrik Lavil zwenn pou diskrit nominasyon parey Egzekitiv in demande pou propoz 3 kandida pour propozisyon Mer Lavil, kot fo lenformasyon in ganny servi dan piblik konmkwa Legzekitiv i pe fer mannev pour ki i azout Ile Perseverance parmi, kan i pa korek.

Akoz ou lofis ti enform bann Manm ki sa ti en fot e en konfizyon, kot olye ki *MNA* Elekte pour distrik Bel Air ganny enformen, kominikasyon ti ganny anvoye kot *MNA* Ile Perseverance.

Madanm Speaker, si pa nou ki enform Manm piblik laverite, zot pou kontinyelman krwar ki Manm *LDS* ki ekrir pour sa bann zournal, zot pa pe donn lenformasyon ki korek avek piblik.

Erezman, depi ki dan 7enm Lasanble nou pe fer piblik rapel ki sa menm Onorab i annan en repitasyon pran *speech* diskour son kanmarad. Alors, mon pou servi parol Onorab Georges; “Sa Manm *cannot be trusted*”.

(APPLAUSE)

HON AUDREY VIDOT

Madanm Speaker, i enportan ki manm piblik i konnen ki sa 8 distrik lavil i ganny gide par en Konstitisyon pou travay avek Legzekitiv atraver Lofis Biro Mer Lavil Victoria, zis parey bann lezot lasosyasyon i fonksyonnen.

E sa Onorab ki'n ekrir pour sa zournal i konn sa tre byen li Madanm Speaker, aköz a 2 manda ki in en manm *ADV* i konn tre byen ki mannyer sa Konstitisyon i ganny gide. E son koleg Onorab Sathya Naidu osi i konn tre byen.

Alors, arete sey anbet Lepep Seselwa.

Madanm Speaker, bann Manm LDS fodre koz tou laverite. Arete sa vilen manni. Si zot kontan pou viv dan dout e konfizyon, sa i zot swa. Pa trenn Lepep Seselwa avek zot. Gete, nou bezwen serye nou morso.

Madanm Speaker, nou imen nou toultan kontan letan i annan en zorey ki pare pou ekout nou ler nou dan problem, ki swa nou senpleman anvi partaz nou lazwa. I gou pou konnen ki i annan en dimoun ki nou kapab partaz avek e ki pare pou ekout nou.

Premye keksoz ki mon'n vwar dan diskour Prezidan Herminie se ki sa zonm in ekoute. Mon ava dir ki i en dimoun ki kontan ekoute e ki'n aktyelman tande sa ki dimoun in dir avek li.

In ekout son pep, pe enport kot zot ete e kwa ki zot afilyasyon politik. Laprev ki in ekoute i dan son diskour ki in delivre le 27 Zanvyè 2026. En diskour ki reflekte bann bezwen, rev e swen, e aspirasyon pep Seselwa.

Madanm Speaker, mon bezwen dir avek mon Kreater Bondye Papa, mersi. Mersi pour mwan kapab arive vwar komansman sa lannen. Sa lannen ki mark 50an lendepandans nou nasyon.

Sa krwaze semen ki nou'n arive Madanm Speaker, wi in ariv sa moman kot nou bezwen reflexir. Nou bezwen pans lo nou pase, nou prezan e nou fitir pour ki nou kapab deside ki kalite pei ki nou oule batir ansanm koman en sel pep e en sel nasyon.

Wi, nou pase i pa'n enn ki fasil. Zenerasyon avan nou ki'n pas dan bann letan lesklavaz in sibir lenzistis. Sa ki'n swiv apre in lite e fer bokou sakrifis pour ki nou kapab zouir tou sa bann byen ki pei i annan ozordi.

Alor, i nou responsabilite ozordi pou asire ki bann lenzistis lepase pa ganny repete. Lalit ek sakrifis i kontinyen pour ki dinyite, lazistis, laliberte i reste drwa tou Seselwa.

Madanm Speaker, ozordi mon bezwen – nou bezwen garanti ki tou tranzaksyon ki ganny fer dan latransparans, dan zentere piblik e anpes koripsyon.

Bann mezir ki Ladministrasyon Prezidan Herminie pe met an plas in sirman montre senserite son bann komitman ki in fer avek pep Seselwa. Seselwa i oule laverite i ganny met devan lanasyon dan en fason ouver er endepandan.

Etablisman bann komisyon lanket tel koman *by* ki'n ganny pase lo zil

Assomption. Lenportasyon zarm dan sa lensidan CCCL dan distrik Cascade. Levennman rayot kot prizon ki'n kout 2 prizonnyen perdi zot lavi.

Ozordi viktim koman fanmir e pep Seselwa i anvi konn laverite, vwar stabilite, sekirite, lord e lape pe enport kot i ete dan Sesel ozordi.

Sa i enn parmi plizyer rezon ki en mazorite nou in *vote* pour en sanzman Gouvernman, e nou pou kontinyelman *trust the process!*

(APPLAUSE)

HON AUDREY VIDOT

Madanm Speaker, koman en Seselwa enn bann pli gran konsern ki trakas mwan dan sa dernyen 5an ki'n pase se ki ler nou bann fanmir Seselwa in ganny neglize dousman, dousman, in degrengole e perdi zot valer e vre plas dan sosyete.

Letan ki lafanmir i afeblir, lakominote li menm i pa kapab tenir for e solid. Lafanmir dan lakour i bezwen santi zot progres e bon servis ki sistenm pe ofer li i bezwen vwar loportinite pe ganny byen partaze e non pa ganny zourir zis par en minorite ler zot pe tonbe leve pou fer fas avek difikilte lavi e fer sakrifis.

Roche Caiman i en pti distrik sere kot nou tou nou vir lanmenm avek kanmarad e bann move fason fer i vreman dekal nou lavi kominoter. Malgre tou bann defi, nou rekonnet e partaz mesaz fer par Prezidan Herminie kot in dir klerman an sa ki konsern lavi sekirite e lord. Nou pa kapab reste silans.

Madanm Speaker, dan sa premye 100 zour ki Ladministrasyon US in o pouvwar, Gouvernman in azir. Gouvernman pa'n tarde ni pou ezite kot en kontra 100 zour in ganny delivre e respekte. Me pli enportan, kot Seselwa an gran mazorite in benefisye.

Nivo konfyans nou pep in leve. Nou santi nou pli soulaze e nou pe finalman bouz en pa dan en bon direksyon ki pe retourn lespwar parmi nou pep.

Madanm Speaker, sa ki sak fanmir Seselwa i bezwen ozordi se lespwar. Me pli prezizeman nou bezwen lespwar en gerizon pour tou sa bann mal alez ki pe ronz nou bann fanmir Seselwa.

Sa i pa en keksoz ki pou arive desito. I pa en travay dizour a landmen e i sertennman pa en louveraz ki kapab ganny fer tousel dan en kwen. Nou tou nou bezwen agree pou travay ansanm lo sa semen solisyon.

Prezidan Patrick Herminie in re afirm rol apropiye nou Lafors Larme par dizourd tim ibou ki ti'n vin en zouti pour menas e teroriz nou sitwayen. Prezidan in fer kler ki dan en demokrasi sekirite i touzour bezwen fonde lo Lalwa rann kont e respe pour drwa lezot.

Alors, i kler ki nou lafors lapolis pou bezwen resours ek sipor nesese ki permet ranforsi lord lape ek sekirite dan nou bann kominote e pei. Avek prezantasyon Bidze 2026 ki pe vini devan nou Lasanble, i pou loportinite pour bann Manm koz plis lo sa size.

Madanm Speaker, en lot size ki pe preokip bokou nou bann Manm fanmir Seselwa se sa defi fleo sosyal ki pe detri nou sosyete.

Si lafanmir pe ganny erode ozordi se gras a 2 fleo partikilye. Sa se pa lot ki drog ek lalkol. I enportan pou note ki sa fleo drog i osi en bann kontribiter primer dan kreasyon lapovrete.

Nou bann zabitan Roche Caiman nou pou konn sa tre byen. Drog i fors bann fanmir an antye pou tonm dan lapovrete. E letan ki zot in tonbe i gard zot dan sa sityasyon e anpes zot sorti. E se la kot nou bann pti inosan i soufer plis.

Desizyon brav par Prezidan Herminie pou

retourn Lalwa e kreasyon Lazans APDAR dan son kontra 100 zour i konmans anmenn en pe laklerte pour solisyon lo sa size drog ek lalkol. E pe osi egalman lans en lapel pour ki fleo lalkol i ganny adrese.

Madanm Speaker, dan mon distrik Roche Caiman sa problemn drog ek lalkol i en problemn terib. Mon pe lans en lapel ankor avek nouvo Ladministrasyon Prezidan Herminie atraver son Minis ek Komisyoner Lapolis pour ki i annan en reform serye kot i konsern departman ki responsab pour loperasyon, larestasyon ek egzibit.

Nou tou nou bezwen debout for lo nou bann bon prensip. E enn sa bann prensip se travay ansanm dan en fason ki fran e onnet pour ki nou kas sa bann brans ki pe fourni drog dan nou bann kominote konmsi fri ek legim pe vann lo bazar.

Dan mon zoli distrik Roche Caiman, fanmir dimoun i soufer. Sa i aköz dan sa dernyen 5an sa bann brans in agrandi olye diminyen. E Prezidan Ramkalawan in pli en kozer. In donn *warning* parti *warning drug dealers* ki i ti dir nou i konnen dan son kanpanny 2020, i konn zot tou. In zis koze.

E les mon a dir, atraver ou Madanm Speaker, dir avek Onorab Michel Roucou e

Onorab Sathya Naidu ki i fermal ler en pti kominote parey Roche Caiman pou vwar sa bann vander drog pe senm pwazon avek nou bann zenn dan distrik ki nou bann lafors travayer.

Zot monte desann konmsi zot ki la. Zot pe trenn nou bann zanfan, bann zanfan dimoun dan bann vilen manni e i annan paran ki pe soutir zot zanfan. E i annan menm paran ozordi ki nepli annan kontrol lo son prop lakour. Al dir avek zot dirizan ki i pa'n fer naryen.

Madanm Speaker, *LDS* ti dan Gouvernman. Zot pa'n serye. Prezan Onorab Sathya Naidu yer a vin dir avek nou ki ozordi zot en Lopozisyon serye. Vre zot in konfize.

Sa fleo sosyal pe anmenn en kou enorm lo lavi imen e mon pa konnen ziska ki tan ki nou bann kominote pou kapab kontinyen pey sa pri toultan sa bann dimoun pa ganny met en fren avek zot.

Madanm Speaker, lo sa kote latab nou pou siport lapros e langazman Prezidan Herminie ek son lekip pou fer tou dan son kapasite pou adres sa bann defi. Omwen i pa'n promet nou keksoz ki i pa pou fer dan 100 zour.

E nou lo sa kote latab nou pou donn li tou sipor posib pour ki nou kapab met lord ek lape avek bann ki pe

soutir en bann tel aktivite ilegal dan pei dan sa bann mwan ki pe vini.

Madanm Speaker, permet mwan bouz lo en lot size. Later ek lakaz ki Prezidan Herminie in touse dan son diskour e ki zabitan mon distrik in ekout atantivman.

Diran sa dernyen 5an in napa bokou proze lakaz pou siport demann e mon distrik Roche Caiman in benefisye selman avek en blok *flat 8 unit* ki ti en kontinite proze 24 *unit* lakaz inisye par Ladministrasyon Prezidan Faure.

Apré sa, Gouvernman *LDS* in kit nou zabitan Roche Caiman lo en *bus stop* kot bis pa pase. Madanm Speaker, erezman Seselwa in fer sa bon swa, espesyalman zabitan Roche Caiman.

Nou'n pran en lapros pour nou travay ansanm pour nou anmenn plis kontinite dan devlopman nou distrik e nou zabitan, menm si i annan ti dir ki mwan Audrey Vidot mon pou nepli la 2025 e ki mon pou disparet ansanm ek mon parti. Zabitan Roche Caiman in dir zot klerman; Audrey Vidot zot pou kit li lanmenm!

(APPLAUSE)

HON AUDREY VIDOT

Nou rekonnèt pei i annan en gran lalis demann lakaz. O menm enstan, vi grander nou lekonomi, nou fer fars avek plizyer kontrent resours e nou pa oubliye ki nou annan bann kontrent striktirel ki dikte ki kantite konstriksyon ki nou lekonomi i kapab soutenir a okenn moman.

Konman MNA Elekte pour distrik Roche Caiman mon'n vremen apresye bann mezir ki Prezidan Herminie in anonse. Non selman fini garanti larzan pou konstir plis ki mil lakaz konmansman sa lannen, me ki par 2030 nou pe ekspekte vwar Gouvernman konplet anviron 2mil lakaz.

Sa lanons i sirman anmenn plis lespwar parmi sa 61 aplikan ki pe pey son *scheme* lakaz pour distrik Roche Caiman. Osi byen pour sa 47 aplikan ki pe esper *mid-range condo*. E osi sa 25 aplikan ki lo *Scheme Condominium*.

E mon sezi sa loportinite pou osi ankouraz bann ki pa pe peye pou fer sa zefor e vin rod gidans pour ki zot osi zot kapab kalifye pour en lozman.

Madanm Speaker, anliny avek sa gran demann pour lakaz, mon oule enform zabitan Roche Caiman ki boner Mars 2025 mon ti formelman ekri ansyen ladministrasyon pou konsider

en proze lakaz lo nimerò parsel V10047 dan distrik Roche Caiman apre ki zabitan Roche Caiman in remet konfyans dan mwan pour mwan kontiny sa travay ki mon'n konmanse pour sa 3enm manda koman MNA Elekte pour distrik Roche Caiman, mon pe egalman demann Ladministrasyon Prezidan Patrick Herminie pou konsider sa demann pour en proze lakaz pour bann aplikan ki lo *mid-range condo*, akòz Lotorite Distrik i vwar ki prosedir pour sa bann aplikan benefisye i dousman, tou prenan kont lespas teren pour tel proze e son prosedir pou enplimante.

Madanm Speaker, en pep rezilyan ek en Gouvernman ki determinen pou azir e non pa zis – pa asize e espere, se sa direksyon ki nou bezwen pour Sesel progresse. Parmi sa 430 aplikan ki pe esper later *landbank*, bann aplikan lo lalis distrik Roche Caiman i depan antyerman lo Gouvernman pou asiste zot akòz napa loportinite Proze *Landbank* dan nou distrik.

Gouvernman US in deside pou azir dan en fason desiziv pou delivre omwen 150 morso later rezidansyel e avek plan pou delivre plis morso an 2027. E proze konblaz pou kree plis ki 570mil met kare nouvo later.

Bann aplikan sorti dan distrik Roche Caiman pou *trust the process*, espere ki dan sak lannen ki alokasyon i ganny fer pou annan aplikan ki pou benefisye.

Madanm Speaker, dan son diskour lo Leta Lanasyon, Prezidan Herminie in souliny bann faktor loportinite e benefis an plas pou amelyor byennet nou pep e ki pep Seselwa i merit sezi pou amelyor pa zis son byennet personnel, me byennet son fanmir.

Alors, kote ki fermal avek LDS ler Gouvernman US pe regard e pe sey soulaz Lepep Seselwa, espesyalman nou bann travayer Seselwa?

Madanm Speaker, dinyite nou sitwayen in touzour reste o sant prensip parti *United Seychelles*. Pou viv dan dinyite apre retret i en mwayen de baz pou mentenir en bon standar lavi e i en mwayen tre enportan pou redwir lensidan lapovrete.

Se dan sa loptik ki anba Ladministrasyon US i annan bokou langazman serye pou elev proteksyon benefis e promosyon dan devlopman e swen nou bann dimoun aze.

Pour bann ki swiv byen Seson Lasanble Nasyonal, 7enm Lasanble Nasyonal pou rapel ki ler mon ti anmenn en Mosyon kot Lasanble pou demann Gouvernman LDS

pou fer le nesese pour nou bann dimoun aze viv dan plis dinyite. E zot LDS zot ti servi zot mazorite pou *vote* kont sa Mosyon.

Madanm Speaker, Prezidan Herminie in ekout nou bann dimoun aze e in reflesir e pran kont ki pa tou dimoun aze ki pe viv – ki pe neseserman viv en lavi libreman, stab e eze.

Se pour sa rezon ki dan son kontra 100 zour in fer sir ki laz sekirite in desann sorti 65an pou retourn 63an, ki'n swiv avek logmantasyon R800. E Prezidan in donn son langazman ki *by* 2029 bann pansyoner pou tous zot R10mil.

Bann dimoun ki'n fini ganny zot 63an dan distrik Roche Caiman i vreman apresye desizyon e aksyon *United Seychelles* pou ekoute e konpran zot soufrans ek difikilte lavi. Alors, zot pou kontinyelman *trust the process!*

(APPLAUSE)

HON AUDREY VIDOT

Madanm Speaker, dan sa 100 zour son manda, Prezidan Herminie pe investir resours nou pei dan en lafors travayer dan lekel nou sosyete i enkilke en kiltir travay dir. Me egalman i pe ekip dimoun avek ase konesans de baz pour zot

kapab vin finansyerman endepandan.

Ozordi nou pe vwar lafors travayer pe zourir zot trezyenm mwan saler plen. Sa i akòz nou Gouvènmàn i vwar li tre enportan ki benefis pei i ganny reenvestir dan nou lafors travayer. Me i egalman enportan pou ki travayer i delivre dan en fason responsab e konsistan.

En lot mezir pli enportan ki Gouvènmàn *US* in pran resaman se retourn *long service allowance*. Pour bann travayer servis piblik, sa i pa zis en fason motiv zot, me i montre lapresyasyon zot rwayote anver lorganizasyon travay.

Madanm Speaker, mon pou konklir mon lentervansyon par adres en kours nou dimoun ki zot seye debout lo zot 2 liye. Me sirkonstans e difikilte lavi, zot fer fas avek bokou defi.

Pandan ki sa group minorite parey sa bann lo lot kote latab in swazir pou viv dan dout e konfizyon pe *follow the process*, travayer Seselwa an zeneral pe trouv en amelyorasyon pozitiv dan zot pos. Lafanmir Seselwa pe senpleman *trust the process* pour en meyer standar lavi.

(APPLAUSE)

HON AUDREY VIDOT

Zabitan Roche Caiman, Gouvènmàn *United Seychelles* i rekonnet ki nou annan paran ki pe sey fer 2 bout zwenn. Nou annan zannan ki bezwen stabilite pou grandi e aprann.

Pour ou sa fanmir Roche Caiman ki pe sey reste diny par fas a tou sort kalite problem, Gouvènmàn *US* pe lans en lapel ki nou bezwen kree en sosyete ki organiz li otour en kiltir travay dir.

Travay i pa en fardo li. Travay i sa mwayen ki permet nou pou fer viv nou fanmir e pou zourir bann fri ki nou lanmen i kiltive.

Pou protez ou dinyite, sipòt ou sa fanmir ki deza dan lanplwa e ede ki ou kapab re debout, Ladministrasyon *US* pe ranforsi proteksyon sosyal pour ki lasistans i ariv atan, i delivre avek dinyite e i atase avek bann plan ek lekspektasyon ki kler.

Pep Seselwa, nou bezwen fran e onnet pour nou kapab kontinyen asir sipòt sosyal for, fodre nou tou nou kapab travay e nou leve nou debourye.

Mon bann frer e ser Seselwa, annou konpran ki nou pa pou zannan progrese si zis lanmwaye nou sitwayen ki pe travay e larestan i asize e esper sa lanmwaye pou soutenir li.

Alor, i enportan ki nou sezi loportinite ki Gouvernman US pe ofer zot pour ki personn pa ganny kit ater.

Enkli ou ki pa ankor ganny en louvraz, fer sir ki ou al anrezistre e ou reste an kontak avek Departman Lanplwa avek *Scheme URS* ki'n ganny azoute avek bann lezot *scheme* ki sa departman i ofer. Ou sa zenn ki anvi travay e ki ankor pe ganny difikilte, ava sezi loportinite pou ganny en lanplwa.

Madanm Speaker, pou terminen mon oule dir mersi. Mersi tou zabitan Roche Caiman pour zot sipor e konfyans ki zot in donn mwan Audrey Vidot. Nou pou kontinyen travay ansanm pour progre nou distrik.

Mon oule asir zot ki mon pou la pou kontinyelman met presyon lo mon Gouvernman pour ki nou distrik i annan kontinite dan devlopman e ki nou pa ganny neglize.

Prezidan Herminie i en Dirizan ki pare pou ekoute, pran desizyon e delivre. Se pour sa rezon ki nou, zabitan Roche Caiman nou pou kontinyelman *trust the process!* Mersi Madanm Speaker.

(APPLAUSE)

MADAM SPEAKER

Onorab Woodcock.

HON WAVEL WOODCOCK

Mersi Madanm Speaker. Bon, bonzour tou dimoun a lekout, tou Manm Lasanble Nasyonal, espesyalman zabitan Praslin e Zil Pros.

Madanm Speaker, atraver ou Onorab Audrey Vidot, o komansman son lentervansyon in komans son entervansyon atraver en mansonz.

Mon napa nanryen kont Mr Sabry Khan, me lafason ki lapwentman ti ganny fer orizinalman ti al kont Lalwa nou pei.

Ler Mr Sabry Khan, ti ganny apwente koman Direkter Zeneral pour (*SIS*) *Seychelles Intelligent Services* Prezidan Herminie, pa ti konsilte avek Komite Defans ek Sekirite Lasanble Nasyonal parey Lalwa i demande.

I ti mank respe pour Lasanble Nasyonal, e i ti fer sa lapwentman, e i ti menm fer Mr Khan, *swear in* san ki i swiv Lalwa ki'n ganny ekrir nwar ek blan.

Sete ler *Leader* Lopoziyon Onorab Bernard Georges, ti fer sorti sa ki la zot ti tay kot Lasanble pou demann Lasanble pou *rubber stamp* lapwentman Mr Sabry Khan. Si lot kote zot, zot bann *rubber stampers* nou lo sa kote latab nou pa bann *rubber stampers*. Nou, nou swiv

Lalwa parey i merit ganny swiv.

Ler nou pe koz leta nou nasyon nou pe koz lo leta nou pei. Leta bann brans Gouvernman, leta nou Gouvernman, Egzekitiv, leta nou Lasanble, leta nou Zidisyer, leta tou sekter, leta nou nasyon dan son antyerte.

Nou bezwen komans dan nou lakaz avan, Lasanble Nasyonal koman enn bann Lenstitisyon pli enportan dan nou pei. Mardi pase *Leader Zafer* Gouvernman Onorab Lemiel, dan son repons leta nou nasyon i ti fer en deklarasyon serye ki montre en pe latitid bann Manm *US* ek zot Gouvernman kot i konsern latransparans, rann kont, travay *oversight* ki Lasanble in ganny mandate pou fer.

Koman bann Manm Lasanble lo baz proporsyonnel ouswa elekte dan okenn distrik dan Sesel, nou annan responsabilite pour nou fer Gouvernman rann kont lo lafason ki pei pe ganny zire, lo lafason ki nou larzan, larzan leta pe ganny depanse. Sa enn bann rol prensipal nou Lasanble.

Yer- Avantiyer Onorab Lemiel, ti fer sa deklarasyon ki trakasan. I ti dir. "Ki person pa bezwen *LDS hold* Prezidan Herminie, *accountable*." Dan Lasanble i napa zis *US*, Lepep Seselwa in osi elekte plizyer

MNA ki sorti dan *LDS* pou reprezant zot dan Lasanble.

30,823 Seselwa in vot pou *LDS*, zot tou pey *tax* e zot annan par dan sa pei. Prezidan Herminie, i bezwen accountable avek tou Seselwa ki *US* ki *LDS* ki in siport okenn lezot parti ouswa menm si i pa'n vote. Okenn Gouvernman-

(APPLAUSE)

HON WAVEL WOODCOCK

Okenn Gouvernman i bezwen rann kont avek tou Seselwa pa zis avek *United Seychelles*, i dominer, i arogan pou dir ki *LDS* pa bezwen *hold* Mr Herminie, *accountable*.

Sa i rol tou Manm dan Lasanble. Mon pa konnen si *LGB*, in bliye ki rol en *MNA* dan Lasanble Nasyonal, nou bann Manm lo sa kote latab nou pou hold Prezidan Herminie, ek son *Cabinet accountable* pour tou sa ki zot fer!

(APPLAUSE)

HON WAVEL WOODCOCK

Nou pa pou zis *rubber stamp*, e bat lanmen menm ler keksoz i mal. Prezidan Herminie, in donn lenpresyon ki ler i antre dan Gouvernman ler i ti antre dan Gouvernman tou keksoz pa ti bon, li sa gran sover ki'n vin delivre nou pep.

E dan son lentervansyon yer- avantyer Onorab Lemiel in *echo* sa, in menm al pli lwen pou dir ki lekonomi Sesel ti stab an 2020. Ki ler Prezidan Faure, ti kit lofis kof ti plen ti pe deborde.

Mon krwar Lepep Seselwa i konn tre byen, ki larzan ki Gouvernman i depanse pandan en lannen i depan lo larzan ki Gouvernman i anmase pandan sa lannen.

Si larzan pa pe antre napa larzan pou depanse, ki mannyer ou kapab dir ki lekonomi ti stab an 2020, kan *Airport* ti fermen an Mars 2020, ziska an Out 2020?

Avyon pa ti pe vin Sesel, pei ti anba *lockdown*, lekonomi ti ater, sekter *tourism* ti lo son zenou, e tou biznes ti pe ganny afekte. Gouvernman pa ti pe anmas bokou reveni, e bokou nou bann frer ek ser ti'n ganny *redundance* sirtou lo Praslin ek La Digue.

Gouvernman ti bezwen *subsidize* biznes, e pey lapey bann travayer dan sekter prive atraver *FA4JR*. Olye kolekte larzan atraver *tax*, *income tax*, *business tax*, e lezot *tax*. Gouvernman ti bezwen pret larzan avek Labank Santral, e ti pe manz dan nou rezerv. Ki mannyer lekonomi ti bon selman nou ti pe bezwen manz dan larzan rezerv Labank

Santral? Ki i osi en *savings* pou letan dir letan kriz.

Lekonomi Madanm Speaker, pa kapab stab si ou pe servi rezerv. Le moman ki ou tous rezerv i afekte to lesanz, deviz etranzer pou monte, e dolar ti'n ariv anviron R22 an 2020.

E seta anba Ladministrasyon *LDS* ki dolar ti retourn R14. La zis trwa mwan anba *US* dolar in ariv R15.37 sou, Ero in ariv pres R18. Zis trwa mwan nou'n fini ganny tape avek lenflasyon.

Arrival touris in desann pour mwan Zanvyé mwens touris pe vin Sesel deza nou lekonomi pe soufer, e pri lavi pe kontinyen monte i pa pe desann parey zot in promet.

Prezidan Herminie, ti dir dan son ladres ki, “fodre nou konnen kot nou sorti e kote nou pe ale.” Dan en lot fraz i dir, “ki fodre pa get deryer avek regre.” Lepep Seselwa i bezwen get deryer avek regre, aköz zot pe kas tou sa bon keksoz ki en Ladministrasyon *LDS* in fer.

Dan son ladres in koz lo son bann promes 100 zour, plen promes ki ti fer se ki pou konsilte Lepep Seselwa avan i pran desizyon. Eski Prezidan Herminie, avek son *Cabinet* pe konsilte Lepep Seselwa? Mon ava retourn lo la pli tar.

Premye keksoz in koz lo la, se tim ki zot apel Tim Ibou.

Selman zot pran zarm avek sekirite Prezidan Ramkalawan, zot donn zarm tim Tonton Makout bann *perpetrators*, ki san ses zot non ti monte dan *TRNUC* pour bann atosite ki zot in komet. E an plis ki sa zot pran loto avek Prezidan, e zot donn loto tim Tonton Makout enkli sa bann *perpetrators*.

By the way Lepep Seselwa i ankor pe esper sa lalis *perpetrators*. Fotespere Prezidan Herminie, i large byento. Mr Herminie, i dir ki, "Seselwa i santi li lib."

Ozordi lafreyer in retourn dan nou pei ankor, me fodre pa ki Seselwa i les Prezidan Herminie, *United Seychelles* fer nou per. Sa ki zot oule, zot krwar zot kapab fer nou retourn anba en sistenm parti inik kot Seselwa i per pou koze.

Ozordi Seselwa i annan son laliberte. Fodre pa zanmen les nou vin lesklav en sistenm ankor, en sistenm 'ek nou pa ek nou.' Kot bann ki pa siport *US* i ganny viktimize i ganny pouse dan travay.

Kot ou war en Minis, Minis Finans i vin lo medya nasyonal e i dir, i admet ki in fer 'ek nou pa ek nou'. I dir ki in pous enn nou ser, pa aköz son konpetans, me aköz son fanmir i *LDS*, son msye i en *MNA LDS*. Ek nou pa ek nou' in retourn Sesel dan tou son

splander anba *United Seychelles*. En bann promes ki ti ganny fer- enn bann promes ki ti ganny fer se ki pansyoner pou ganny R10,000 zis koman *US* i vin o pouvwar, ti dir tou dimoun ki ganny 63an pou gannyen.

En sel kou, zot vin avek en leskiz *triple lock* pou donn par faz. Se selman an 2029 lavey eleksyon ki pou ariv R10mil.

Pa fini sa R800 logmantasyon ki zot in donner pa tou pansyoner ki pou gannyen, e i annan en bon pe zot pe konplent la deor - pa sa ki zot ti dir.

Ler *LDS* ti donn logmantasyon tou pansyoner bann dimoun envalid, bann dimoun avek dezabilite pa ti ganny kit ater. Eski zot nepli enterese avek nou bann dimoun avek envalidite?

Carers ki zot in koz bon labous lo la, oli sa ki pou *carers* parey zot in toultan promet? Ozordi *United Seychelles* menm Mr Herminie, i pe enterfer avek Zidisyer.

In anvoy Komite Pardon pronmnen, in larg de dimoun ki'n ganny zize par Sef Ziz e ganny trouve koupab devan Lakour, de dimoun ki'n admet ki zot ti pe al met *bomb* Stasyon Petrol Grand Anse Mahe, zot ti ganny tyonbo *red handed* avek tou zot *bomb*.

Zis mazineen mon bann frer ek ser dega ki leksplazyon CCCL in fer, kantite lavi ki'n ganny afekte. Prezan mazineen, zis mazineen si *bomb* ti'n ganny met Stasyon Petrol Grand Anse Mahe i annan tenk *fuel* lanmenm, trwa *housing estate* obor sa stasyon.

Konbyen lavi nou ti kapab perdi? Zis mazineen ozordi nou ti kapab napa en Onorab Lepathy, dan sa Lasanble si sa *bomb* ti'n eksploze, aköz Onorab Lepathy, i reste lanmenm dan zanmerant sa stasyon.

Petet i pa pou la, i pou lo enn parmi sa 62 bout later, dir granmersi Gran Met ki sa leksplazyon pa'n arive.

(APPLAUSE)

HON WAVEL WOODCOCK

LDS ti anmenn en lalit asarnen kont drog, en bon pe bann gran *dealers* nou tou nou konnen, nou'n *witness* sa nou'n ar sa.

En bon pe bann gran trafiker ti ganny arete partou lo Mahe, Praslin e La Digue. Prezidan Herminie, li ki fer li? Li i vini i larg bann trafiker, i fer retournen en madanm ki ti'n ganny deporte, ki li avek son mari ti ganny enplike dan en ka drog kot zot *asset* ti ganny sezi par Lakour.

Pour *United Seychelles* trafiker i annan plis valer ki

drwa nou bann zenn ki zot lavi pe ganny detri par sa fleo drog. Mon rapel en *statement* ki Mr Herminie, ti fer avan i vin Prezidan ki laliny drog anba *LDS* in ser in tro ser ti'n ariv R200, la pri drog in desann dapre konpran en laliny in vin bokou pli bonmarse.

Drog in ogmante dan nou pei depi ki *US* in vin o pouvwar, bann trafiker pe ganny soutire, zot larg trafiker selman zot kit sa boug ki'n vol de mang anndan.

E zot abitye fer li dan lepase nou'n war zot kot zot in vin defann trafiker dan sa Lasanble Nasyonal.

Prezidan Herminie, ti dir ki dan son pos napa nanryen i annan zis R5. I ti konplent bann voyaz ki Prezidan Ramkalawan, ti fer li i pou fer pli byen li, la li i pe voyaze de fwa plis, e son lalis delegasyon pa kapab gete.

I fek al *Dubai* la avek lanmwatye *Cabinet*, 7 Minis enkli bann lantouraz. Zot voyaz zis *first class*, zot pe al Lenn la ozordi ziska le 10 Fevriye, mon pa konnen si zot pe al vann Assomption, tiket anviron R65mil par dimoun *first class*.

Mon mazineen pa tro lwen avek 1milyon pour sa kantite dimoun. Selman napa larzan pou pey pour nou bann zenn Praslin ek La Digue al lekol A

Level Vijay International School.

(APPLAUSE)

HON WAVEL WOODCOCK

I dir ki pou konsilte. Eski Herminie, avek son Minis ti konsilte avek lekol Vijay *International School*, lekol Praslin ek La Digue segonder, eski i ti konsilte avek paran ler zot ti pe pran sa desizyon? Larepons se non.

Mwan mon'n konsilte avek tou sa ban group. Pour ban etidyan zil pros al fer zot *A Levels Vijay International School*, si en linisyativ bann paran Praslin ki ti apros mwan, e mon ti anmenn sa devan Minis Ledikasyon Minis Valentin, sa letan dan 7enm Lasanble.

Onorab Gill, ki la i ti siport sa linisyativ i kapab demanti mwan i la, i ti siport sa linisyativ sa letan. Ler nouvo Minis Ledikasyon ti pran desizyon pou *cancel* sa, ni be Manm Elekte Praslin ek La Digue pa ti koz lo la zot ti koz pa, zot ti sourd lo zabitan zil pros.

La yer apre midi, apre ki mon'n anmenn sa lalit pour nou bann zenn Pralinwa depi ki lanons in ganny fer, e bann paran in *voice out* zot konsern lo rezo sosyal enkli lo medya nasyonal, selman yer ki Onorab Alvin Grandcourt, in

war li nesaser pou koz lo Vijay *International School*.

Sa apre ki plizyer Manm LDS ki sorti Mahe pa lo Praslin in adres sa size dan zot repons leta nou nasyon. I sagrinan Madanm Speaker, napa larzan pou pey lekol Vijay, selman larzan pou donn Sri Lanka zot ti annan. Zot donn Sri Lanka \$100mil fedartifis ki Sri Lanka ti tire pour lannen i plis ki sa \$100mil ki Gouvernman Sesel in donner. Sesel pour lannen Gouvernman *US* ti tir zis detrwa flez.

Zot koz lo konsiltasyon selman zot in tap kalot dan mosyon ki bann zenn manm Lasanble Lazenés bann etidyan ti pase pour zot kit zot seve long.

LDS ti ekout lavwa bann zenn, la koman zot vini zot pe fors tou bann zenn garson pou koup zot seve, nou ti ranforsi Lasanble Lazenés par organiz eleksyon pour bann manm, bann zenn manm dan bann lekol, nou ti tir politik dan Lasanble Lazenés, donn lavwa bann zenn.

Zot, zot ti manipul e kontrol bann zenn, servi zot ler zot le servi zot, la zot le etabli en konsey lazenés. Eski Lasanble Lazenés i nepli annan valer? Eski zot annan lentansyon kontrol nou bann zenn? Eski zot ki pou deside lekel ki al dan Lasanble Lazenés parey zot ti fer

oparavan? Zenn eski sa ki zot ti anvi?

Prezidan Herminie, enkli plizyer bann *MNA United Seychelles* pe sey pran kredi pour bann proze ki nou ladministrasyon in swa fini konplete, swa pres pou fini, swa i anba konstriksyon, ouswa tou *groundworks* in fini ganny fer pou komanse prezan zot pe sey vin pran kredi.

Lo Praslin ek La Digue apre bokou lannen apre ki sa de zil in ganny negligize par *SPPF, United Seychelles* nou'n vwar laprev i la lakantite lenvestisman, lakantite larzan milyon roudi ki *LDS* in depanse pou met an plas plizyer fasilite enportan. Lalis i long.

Me sa ki pli enteresan se ki tou bann Minis ki'n vizit Praslin ek La Digue, dan zot *interview* ki zot in donn lo medya nasyonal zot in apresye en rekonnet bann travay ki'n ganny fer par anba Ladministrasyon *LDS*.

Bann proze ki'n konplete parey *Vehicle Testing Station* Praslin, en proze ki mon'n pouse, *ERO Passenger Terminal*. Minis Laporte, ti dir fantastik. Minis Desaubin, ti apresye bann travay ki'n ganny fer Ile Eve, in menm dir piblikman ki zot pou kontinyen lo bann proze ki *LDS* in komanse parey Sant Mikro Antrepriz Grand Anse

Praslin, en proze ki mon Onorab Woodcock, ki ti inisye e mon ti ganny sipor Minis *LDS* sa letan. San bliy proze Amitie ki tou plan in finalize depi lannen pase.

Zis pou mansyonn bann proze ki *US* pe sey pran kredi ki'n komanse anba *LDS*. Proze Lakaz 16 *Unit* Amitie, en proze ki mon'n met bokou lanfaz lo la, proze Lekol La Digue travay in preski konplete lo lekol tanporer e byento travay lo lekol pe al komanse, proze *Coastal Management* pe al komanse Ros Korbizo, proze Vilaz Artizanal Touristik Amitie, proze *Railing* ek *Pavement Vallée de Mai* in konplete, proze *Pavement* Cap Samy preski fini, proze Semen primer ek segonder dan tou kwen lo Praslin in ganny fer, proze *SPTC Bus Depot* Ile Eve in fini komanse.

Lakantite proze ki'n konplete lo sa de zil i bokou. Proze Lopital St Mary, proze Lasose La Digue, proze *Sewage*, renovasyon lo plizyer fasilite, proze Lapes Grand Anse avek Baie Ste Anne Praslin, proze Gard La Digue ek Baie Ste Anne en kantite Madanm Speaker.

Byento Proze Zil Kato Nwar ki nou'n inisye, nou Gouvernman in inisye pe al komanse, *tender* in fini *awarded*. Proze Inovasyon lekol ek nouvo blok pour

Grand Anse Primer ek Praslin Segonder, tousala bann travay ki'n komanse anba *LDS* ki *US* pou kon..ti..nyen.

US pe zis resikle bann keksoz ki *LDS* in komanse, bann linisyativ *LDS*, zot in vin en Gouvernman resikle, zot napa nanryen nouvo.

Zis parey Prezidan Herminie, pe pran laglwar pour travay ki Prezidan Ramkalawan, in fer. Ozordi Onorab Grandcourt, pe pran laglwar pour travay ki mwan mon'n fer pandan mon dernyen term koman *MNA* Grand Anse Praslin.

(APPLAUSE)

HON WAVEL WOODCOCK

Prezan sa ki pli enteresan se sa de gran proze ki Mr Herminie, i dir i pe al fer. Proze Lopital ek proze 3mil lakaz ki dapre li zot pou fer 1,000 lakaz dan lespas 1an. 1,000 lakaz.

Prezan Prezidan Faure, li i ti *fail* pou fer 24 lakaz dan 24 distrik dan 24 mwan. Mr Herminie Prezidan Herminie, pou fer mazik! Lepep pe gete.

Le kestyon ki Lepep Seselwa pe demande se ki kopo later Sesel zot pou bezwen donn bann pei etranze? Nou konnen ki Lenn i le Assomption, eski zot in fer en dil pou vann plis nou souvrennte?

Mon pou profit sa lokazyon pou apresye, e felisit bann ki pe anmenn sa lalit kont en baz militer Lenn lo Assomption parey ton Robert Grandcourt, ou annan tou sipor *LDS*, Lepep Seselwa e tou lafanmir Grandcourt i par deryer ou a leksepsyon enn.

(APPLAUSE)

HON WAVEL WOOCKOCK

Dan lepase nou konn tre byen saga *SBFA* kot bokou dimoun enkli bann *ex-MNA* Parti Lepep, *US*, Minis, e lezot gran siporter *US* ti dwa *loan*.

Ki swa pa'n ganny peye, swa ti ganny *write-off*, ouswa bann dimoun imaziner ti pe ganny *loan case* ti menm ariv devan Lakour. Sa ki pli enteresan se ki *DBS* ki ti erit tou sa bann *loan SBFA*, tou bann *debtors* e bokou dimoun pa ankore pey zot bann *loan*, bann dalon *ex-MNA US*.

I menm annan *MNA* ki dan sa Lasanble ki *DBS* in apel zot lo radyo pou vin pey zot *loan*. Eski *US* pe fer faver son bann dimoun, son bann dalon? Sa *loan R59milyon* ki pou ganny *write-off* par *DBS* pour ki sa?

Eski se bann promes eleksyon pou ganny vote pou *cancel loan* bann ki'n siport zot pandan eleksyon? *Time will tell, FPAC* pou swiv sa tre pres.

En lot zafer ki Mr Herminie, in koz lo la se *Starlink*. Sesel i annan en lekonomi frazil 130mil dimoun, e fodre nou zer nou lekonomi vreman byen.

Dokter Herminie, in dir ki zot pe al entrodwi *Starlink* Sesel, eski zot in konsilte avek bann lakonpannyen telekominikasyon? Eski zot in fer en analiz lo si lenstriksyon ki zot kapab *bankrupt* tou bann lakonpannyen telekominikasyon Sesel parey *Cable* ek *Airtel*. Konbyen larzan *tax* nou pou perdi? Sak lakonpannyen telekominikasyon i kontribye anviron R500milyon par lannen dan nou lekonomi. Larzan ki pe ganny servi pour bann depans Gouvènmman menm bann depans sosyal ki Bidze 2026 in ariv R1.6bilyon sa lannen.

En lot keksoz nou bezwen mazine avek *Starlink*, en kantite travayer Seselwa ki travay avek *Airtel*, *Cable* & *Wireless* ek lezot lakonpannyen pou perdi zot louvraz. Fer sir sa bann desizyon pa tir manze dan labous Seselwa.

Annou zis pran legzanp *Air Seychelles* anba *United Seychelles mass redundancies* sa lakonpannyen ti faid, fodre pa ki Seselwa i eksperyans sa ankor, se gras a *LDS* ki nou ti nobou kapab sov sa *airline*.

(APPLAUSE)

HON WAVEL WOODCOCK

US pe sey son mye pou sey efas bon travay ki *LDS* in fer pandan sa dernyen 5an. Ou pa kapab efas listwar en pei, zis parey zot pa pou zanmen kapab efas disan sa pep ki'n tase lo zot parti.

Parey mon'n dir pli boner ozordi nou annan nou en Gouvènmman resikle, in sey resikle bann proze *LDS* zis parey zot in resikle bann ansyen Minis dan ladministrasyon lepase, bann *ex-MNA US* enkli plizyer zot bann dalon, e don zot bann gro pozisyon. Swa in don zot plas Minis prezan plas Minis ti tro pti git, 14 Minis.

Alor Mr Herminie, in bezwen don plas Anbasader, SS, *Advisors*, PS. Ozordi nou annan rikord *advisors* Sesel, plis ki en 10zenn, en 10zenn an plis *advisors*, trez PS an plis.

Dizenn PS an plis, 34 P.S total, e douzenn Sekreter Deta, konbyen tousala pou kout Lepep Seselwa? Prezan pa fini, zot in bezwen donn plas bann pti parti ki pe siport zot dan dernyen eleksyon. Pozisyon pe ganny donner *right, left and centre*, enkli dan Lasanble Nasyonal zis pou fer plezir sa bann dimoun.

Prezan sa ki sagrinan, profesyonnel pe ganny kit ater, bann ki konpetan pe ganny met deor pou fer plas pour bann dalon.

Sa ki pa siport zot napa plas pour zot dan Gouvernman, aköz Gouvernman i zis pou *US*, zis pour *United Seychelles*. Zis parey Onorab Lemiel, ti dir Mr Herminie, pa bezwen rann kont avek 30,823 siporter *LDS* zot pou dil zis avek zot *US*.

Annefe Madanm Speaker, yer Onorab Rocky Uranie, in dir i lo rikord, “bann siporter *LDS* demerd zot!” Avek en larogansite, sanmenm sa linite ki zot pe prese. Tasyon dan detrwa zour, mwan, e lannen Lepep Seselwa i dir *United Seychelles* avek zot Prezidan, “demerd zot!”

US pa enterese avek sa ki pa ek zot, dapre zot *LDS* pa peye *tax*, dapre zot nou napa plas dan sa pei ki nou’n ne, e kot nou lonbri in antere. *Shame on United Seychelles*. Sesel i pour nou tou, Sesel i pour tou son zanzan!

(APPLAUSE)

HON WAVEL WOODCOCK

US son Prezidan, son Minis, e sertenman son bann *MNAs* zot pran kredi lo sa ki fer zot-sa ki selman fer zot *look good*.

Selman zot pa le pran kredi pour bann atosite zot

parti, olye pran responsabilite, e pey zot domaz zot le fer nou sa ki napa nanryen pou fer avek zot atosite, atosite zot parti pey zot *debt*.

Zot le pran R20milyon nou larzan, larzan mon zanzan, larzan ou zanzan, larzan nou zanzan pou pey zot det. Sa ki zot drwa sa i en vol anver Lepep Seselwa, i en krim pou pran larzan ki pa pour ou pou pey prop det, Lepep Seselwa pe note.

Ozordi bokou pe mazin zis sa- Ozordi bokou pe mazin zis sa larzan konpansasyon, me zot in bliye mannyer zot ti santi zot ler *SPUP* ozordi *SPPF* ti pran lavi, e viktimiz zot pros. Zot *turn a blind eye* anver menm soufrans ki zot frer ek ser pe pas ladan, pe pas atraver ozordi.

Ozordi ou war lipokrizi *US*, zot dir ki nou Gouvernman pa’n fer ase proze. Me se zot menm ki ti sot anler ler zot ti dan Lasanble Nasyonal sirtou Vis Prezidan Pillay, ek Minis Dezinyen Minis Cosgrow, zot ti dir, “pa bezwen fer proze kapital.” Zot ki ti dir, selman la ozordi zot vin koz lo proze kapital ki *LDS* in fer.

Sa ki enteresan *LGD* in admet Onorab Lemiel, in admet ki anba *LDS* lekonomi in byen ganny zere in admet, savedir nou’n fer keksoz ki byen. Si lekonomi in ganny byen zere, savedir

Ladministrasyon *LDS* in fer keksoz ki byen, lekonomi in byen ganny zere, lekonomi in fer byen.

In dir ki, “problenm tiyo pa’n ase ouver.” Ozordi zot pe ouver tiyo, me lekel vreman ki pe benefisye? Lekel ki pe *enjoy* dan *villa* 106 Eden, fer *cruise catamaran*, larzan *make-up*, larzan plis ki R400mil, *travel* in gou, loto nef, *travel VIP* dan bann gran group, bwar *champagne*, manz *caviar* Eden?

Zis dan trwa mwan *motto* in sanze, *motto* in reverse in vin, “*for the few and not for the many*.” Onorab *LGB* in koz lo *beavers- beavers*, byento *beavers* pou blok delo ki pe koul kot malere. Delo pou nepli fer semen malere petet i ava ariv lo plato Anse Royale kot laferm bann milyonner, mon pa konnen.

Mon napa *issue* avek sa zafer kart *STC*, me fotespere ki piti Minis pa ganny kart *STC* ankor. Bann ki pa merite ti ganny kart *STC*. Dan lepase ti annan bokou labi.

Ozordi ou nepli tann bann gran sanpyon la demokrasi, ni *ARID* mon pa war zot, bann program lo *SBC* in disparet. Oli Lopinyon? Oli bann *bloggers*? Ni *Ombudsman*, ni *Human Rights Commission* ou pa tann zot.

Mon krwar zot per, aköz i annan en gro msye pe fer gro

lebra pe sey fer tou dimoun per, e i annan ki pe per. Mon bann frer ek ser Seselwa fodre pa per sa bann dirizan *US*.

US, *US* i abitye diriz par lafreder. Zot pa konnen ki savedir *rule* avek lanmour en pep. Fodre zanmen nou les zot vol nou drwa ankor, nou drwa i garanti anba nou Konstitisyon. Fodre koze ler zot pe ganny viktimize vin kot nou met lo rezo sosyal kontakte medya fer tande zot lavwa, al bouz sa bann gran sanpyon nou demokrasi. Pa zanmen les person, pa zanmen les person vyol zot drwa ankor. *LDS* i la pou lager pour zot, pou defann zot.

Onorab Louise, in koz lo sant reabilitasyon, tousala in annan travay ki *LDS* in komanse. Me nou pa zis atak sentonm, ni en Manm *US* pa’n adres rasin problem drog Sesel. Ni zot Prezidan, i pa’n koz ditou lo trafiker. Ankor enn fwa mon poz sa la.

In dir ki, “later ek lakaz ti en zouti politik.” Annou serye nou, konbyen *US* in ganny lakaz sa dernyen 5an? En kantite, alokasyon lakaz ti ganny fer par en *Vetting Committee*. *MNA* ek *DA* ti fer rekomandasyon, me komite ki ti deside. Ti napa “ek nou pa ek nou.”

Ozordi later ek lakaz in ganny met direktteman anba Vis Prezidan, e zot in blok tou

alokasyon e aplikasyon later ek lakaz menm bann ki ti'n fini ganny let. Eski zot pe fer legzersis ek nou pa ek nou parey zot ti fer dan lepase? Eski byento-

MADAM SPEAKER

Onorab, i reste ou ankor 2 minit.

HON WAVEL WOODCOCK

Eski byento nou pou re vwar *security clearance* ankor triyaz pou ganny fer parey zot labitid lepase? Nou pe get zot, e sa 15 Manm LDS pa pou kit zot en pa koman zot viktimiz- pa pou les zot en pa koman zot viktimiz sa pep, nou pou *hold* zot *accountable*.

Sa gro nyaz nwar in retourn lo nou pei, i annan en gro sagrinasyon dan nou pep. Me sa sagrinasyon pou vin determinasyon pou debout kont okenn form viktimizasyon ek lopresyon.

Ozordi nou pe koz lo koripsyon US son non sinonim avek koripsyon, levidans tro bokou. Sel parti ki'n deza vot kont Bidze ACCS se *United Seychelles*. Sel parti ki'n detrwa Manm in refize deklar zot *asset* se *United Seychelles*.

Zot pe re entrodwi URS Onorab Toussaint, i dir, "manrmay i ava ganny en pti *survive*." LDS pa anvi zenn i ganny en pti *survive*, nou anvi ki zenn i ganny li en travay ek

en saler, e i annan louveraz Sesel!

Onorab Loze, ti dir in deza dezer ki, "ler URS ti egziste bann *bin site* ti prop." Nou bann zenn i *deserve better*, nou bezwen valoriz nou bann zenn ede plas zot dan bann bon louveraz pa zis servi zot pou fer bann travay politik sal parey zot ti fer dan lepase.

Tou sort kalite ou tande, kot i konsern spor Sesel antye in war lanfaz - mon pe konklir Madanm Speaker. Kot i konsern Sesel an antye Sesel nou war lanfaz ki Ladministrasyon LDS in mete pou re fer tou bann fasilite *sport*, an preparasyon pour CJSOI.

Tou bann fasilite lo Mahe, Praslin, La Digue ti dan bann leta deplorab Onorab Gabriel, ti avek mwan lo Komite MYSCC, e in witness tou sa travay ki'n ganny fer lo Stad Linite, *Palais de Sport*, *Court Tennis*, *DOJO*, e lezot fasilite. Stad *Beach Soccer* osi i lo en o standar.

Ou pa kapab vini ozordi dir ki nanryen pa'n ganny fer kan ou ti la, e ou'n vwar avek ou de lizye.

Dan Bidze 2025, i annan bann alokasyon bann proze pour Praslin, La Digue parey *Indoor Gymnasium*, e *DOJO* ki'n ganny *forecasted* pour lannen ki pe vini pour 2026,

2027. Fotespere US i kontinyen avek sa bann proze.

An konklizyon Madanm Speaker, mon kontan statement ki Onorab Gabriel, in fer. in dir nou, “pa esper 100 zour, me esper 1,000 zour.”

Promes 100 zour in vin 1,000 zour. Ler 2030 i arive, e Lepep Seselwa i met zot deor, zot pou dir ti napa ase letan zot bezwen ankor 10mil zour.

Sa letan Seselwa pou'n fini war zot dan gran kler, sa bann lagrenn bat latet pa pou'n bourzonnen, e zot pa pou anbet sa pep ankor.

An atandan- An atandan nou pa pou kapab “*trust the process.*” Akoz *the process* pa pe *process*. Nou dan LDS nou'n debout a kote Lepep Seselwa, e nou pa pou zanmen les tonbe.

(APPLAUSE)

MADAM SPEAKER

Bon nou ava aprezan pran en *break*, e nou a retournen 11er.

(BREAK)

MADAM SPEAKER

Bon, nou ava rebran bann entervenan. Onorab Aglae.

HON EGBERT AGLAE

Mersi Madanm Speaker. Mon pou dir bonzour tou Manm Onorab e bonzour tou nou

bann dimoun Seselwa ki pe swiv deba Lasanble lo SONA.

Madanm Speaker, avan mon konmanse mon ti a kontan pas mon senser kondoleans kot nou'n aprann lanmor Marie-Antoinette Maria e mon pas mon pas mon kondoleans avek lafanmir Agathine.

E osi i annan enn mon zanmi ase pros mon kapab dir, *Smash Kid* ki'n *passed away* Trevor Bijoux, ki mon pas mon kondoleans avek lafanmir. E osi resaman ti annan lanmor Mr Regis Denis ki osi mon partaz kondoleans a lafanmir.

Madanm Speaker, avan mon konmanse mon ti anvi zis dir avek Onorab Woodcock ki fodre i aret kras anler. Letan in koz lo bann pozisyon dan Lasanble Nasyonal lo kote US, sa i osi aplik li lo son kote osi.

(APPLAUSE)

HON EGBERT AGLAE

I ankor enn fwa en gran loner pou adres diskour Leta Lanasyon Sesel, Leta pep Seselwa apre plis ki 3 mwan ki lamazorite pep Seselwa ti pran en desizyon pou sanz gouvernans e direksyon ladministrasyon nou pei e met labar dan lanmen *United Seychelles*.

50an apre lendepandans kot plizyer ti krwar nou pa pou reisi koman en nasyon

Seselwa, me nou'n reisi sirmont plizyer defi e rann pep Seselwa pour sa ki i ete ozordi apre plizyer lenzistis, lalit, sakrifis. Me sa pa'n anpes pep Seselwa ganny son dinyite e laliberte.

Kestyon ozordi se kote nou'n arive e kote ki nou pe ale? Kwa ki Sesel e pep Seselwa i merite e lekel nou priyorite fas a sa lemonn global kot plizyer defi tel ki problemm zeopolitik, sanzman klima, malez sosyal e konteks atase ek sanzman teknolozi rapid.

Prezidan Herminie in site ki lemoman in arive konman en pep pour nou reflesir lo lavenir e etabli direksyon kler, sirtou atraver nou zenn zenerasyon kot lepase i reste sa mezir ki pou kontinyen gid nou ver le fitir san okenn regre.

Madanm Speaker, leta nou nasyon i osi egal leta moral sa pep, kot plizyer ti'n perdi lespwar e viv anba presyon e stres lavi fas avek lafason ki nou pei ti pe ganny gouvrenen dan sa dernyen 5an.

Bokou promes ti'n ganny vann ek sa pep, me laplipar sa bann promes ti zis dan vid e in ganny kase. Me ozordi mon apresye ki plizyer Seselwa pe mars ek en sourir lo son figir.

Nwel en Lannen ti en lot kalite latmosfer. Sa laliberte in

re bourzonnen e byento i pou fleri. Nou pe konmans revwar lespri loportinite pour tou. Nou konmans re konmans santi sa lespri travay ansanm pour en meyer demen kot lafreyer de pti tap pti pe diminyen.

Madanm Speaker, leta nou nasyon i premyerman ganny mezire par leta moral sa ki pli o lo latet nou pei. Sa i nou Prezidan Dokter Patrick Herminie ki ti deside pran labar dan moman difisil, ki ler plizyer ti deside abandonn bato e ale, ouswa ler plizyer ti deside vann zot nanm, li i ti dir non e i ti pran labar e redres sityasyon.

I ti konnen ki semen e traze pa pou fasil. I ti konnen pou annan plizyer defi e difikilte, me avek bann ki ti krwar dan li, nou ti komans en lot lalit ziska nou'n reisi ozordi.

In gard son bann parol konpare ek predeser ki ti zis maltrete e blanm tou dimoun, sof blanm son lekor. I sagrinan pou dir ki sa menm mantalite zot ankor pe vin avek san aprann zot leson.

Madanm Speaker, mon salye Prezidan Dr Patrick Herminie ki dan son diskour Leta Lanasyon in vin koz lo Sesel, lo sor son pep, me i pa'n vin denigre okenn Seselwa ki swa son kouler e apartenans politik, son larelizyon, son

sinyatir, son kalifikasyon e pozisyon travay. Ouswa ki fanmir ki in sorti ladan.

Prezidan Herminie in tret zot tou parey aköz i krwar dan respe, i krwar dan dinyite imen, i krwar dan legalite loportinite e osi i krwar dan lazistis sosyal. E i pa zis koz lo sa bann prensip, i fer li son devwar e responsabilite pou met li an aksyon. Se sa kalite dirizan ki Sesel i bezwen ozordi. En dirizan ki pe ekoute e ki pe egzèkute.

Madanm Speaker, laprev i la devan nou. Nou promes manifesto sa kontra sosyal 100 zour pe ganny garde e enplimante, konpare ek promes 2020. Prezidan Herminie in dir nou “*Trust the process*”, e nou US nou pe *trust* nou dirizan, kan zot dan LDS plizyer zot la anndan pa pe *trust* zot prop dirizan.

(APPLAUSE)

HON EGBERT AGLAE

Madanm Speaker, sa mo sanzman, wi sanzman in arive e se Lepep Seselwa ki'n deside fer sanzman. Byensir sanzman i vin ek plizyer lezot sanzman. Sak ladministrasyon ki vini i annan son prensip, son filozofi, son dimoun ki i bezwen pou enplimant son program. Alor, i pa soka e drol pou vwar *new recruitment*

ek *new post*. Zot ti fer parey zot osi LDS.

Madanm Speaker i normal ki byensir ki nenport Gouvernman apre en sanzman ladministrasyon pou annan kontinite dan serten proze si zot war i vyab e dan benefis pep Seselwa.

E nou'n war Gouvernman LDS koup riban plizyer proze inisye par Gouvernman US. Alors, annou reflesir byen ler zot dir ki US pe *highjack* proze LDS. Nou pa pe *highjack* proze LDS, nou pe vin fer sa ki zot in *fail* pou akonplir, nou.

(APPLAUSE)

HON EGBERT AGLAE

Madanm Speaker, ler mon tann *Leader* Lopozisyon atraver ou, dan son lentervansyon dir ki se zot siporter ki pa ti kontan Wavel Ramkalawan ki'n vot pour US. Be ki zot ti pe glorifye Dimans pase - *sorry*, Lendi pase? LDS koman en parti, ouswa zot pe glorifye sa zonm ki pe diriz sa parti?

Be si serten zot siporter pa kontan zot dirizan, be silvouple annan sa kouraz e lakourtwazi demann li pou *resign as sa leader* e met en nouvo souf, e la zot a reganny *back* zot bann siporter.

Madanm Speaker atraver ou, Onorab Labonte yer ti dir i

pa pou ador Prezidan Herminie akoz i pa Bondye Sesel. Be Onorab, ou dirizan osi pa Bondye Sesel. Mon krwar in ler pou *STC* fer vini en pe bibron adilt, sak fwa zot a plennyen nou a donn zot, zot bibron.

Madanm Speaker, kwa ki'n arive dan sa 100 zour? akoz *LDS* i paret ki zot in ganny *Alzheimer*. Prezidan Herminie ti fer detrwa promes avan eleksyon e vwala ki in fer;

Remet lord e etabli konfyans. Se sa. Re afirm rol larme e dizourd sa tim ibou ki Prezidan *LDS* ti dir pa egziste, me apre soudan kou in egziste. *Alzheimer* nimeron en sa.

Fer desann laz sekirite sosyal 65an pou retourn 63an e *triple lock* li pou ariv 10mil disi *by* 2030, ki dayer *LDS* ti promet pansyoner R10mil avan 2020, apre zot denonse ki zot pa'n zanmen dir sa. *Alzheimer number 2 LDS*.

Prezidan Herminie ti promet pou annan Lalwa Deklarasyon Asset kot dezormen tou manm fanmir pros politisyen e *Constitutional Appointee* i bezwen deklar zot asset ki *LDS* dayer ti tire par amann Lalwa an 2021.

La Onorab Georges, atraver ou Madanm Speaker, i vin dir nou i pou anmenn en lot lamannman pou fer deklarasyon vin piblik. Pa bliye ki zot ti tire. *US* i anmenn

Mosyon, zot *LDS* ti vot kont. La *US* in remete, Onorab Georges la i le amande. *Alzheimer number 3*.

Size devlopman Assomption in ganny met *on hold, pending investigation*. Apre ki zot ti mont *Bihar* e fer *interview* ek lapres Endyen e dir ki Sesel fodre akseler plan pou annan en Baz Militer Assomption e promet bann *Tamil* plis rekognisyon.

Apre zot ti mont Maldiv al fer bann *secret deal* lo nou souvrennte ek Qatari. Ozordi zot vin fer en vire 360 degre e dir ki fodre zanmen, fodre zanmen annan en Baz Militer lo Assomption. Sa en lot *Alzheimer number 4*.

Nou Prezidan li in koz lo en fasilite *Coast Guard*, me pa en Baz Militer. Ler ansyen Prezidan i vin dir ek pep Seselwa ki zot in elimin problemm eroin dan Sesel e apre Prezidan dan en *press conference* i dir zanmen in dir sa. *Alzheimer number 5*.

Prezidan Herminie ti promet pou rann travayer Seselwa zot trezyenm mwan saler e *long service allowance*. In fer li. Prezidan in *deliver* konpare avek promes kanpanny 2020 *LDS* ki ti sipoze met larzan dan pos Seselwa, me sa pa'n zanmen arive. Promes oubliye, ouswa *Alzheimer number 6*. Kontrer,

zot ti fer Sesel vin pour tou son milyonner. Enteresan sa.

Madanm Speaker, Onorab Georges in koz lo lenterferans Legzekitiv dan lenstitisyon endepandan. Seryezman Onorab Georges? Ki Gouvernman LDS ti fer?

Enterfer dan ACCS. Enterfer dan lapolis. Enterfer dan Zidisyer. Enterfer dan sport. E pli pir, enterfer dan travay Lasanble kot la anndan nou ti war nou ansyen Speaker ki ti pe ganny *remote controlled* par LDS. Alzheimer.

(APPLAUSE)

HON EGBERT AGLAE

Ankor en lot kalite Alzheimer. Madanm Speaker, Onorab Georges in dir zanmen i dir in dir sanzman pa vedir kraz tou sa ki ti la. Senyer Mon Dye, ki LDS ti fer?

Sanz non semen dan lavil. Sanz non serten batiman lenfrastriktir. Ferm plizyer lenstitisyon e *repeal* Lalwa ki gouvern zot. Sey sanz laparans moniman nasyonal. La zot pe akiz Gouvernman US. *Seriously?* En lot Alzheimer ki zot in gannye.

Si zot pe koz lo *Library* Nasyonal, Stad Linite, zot bliye lekel Gouvernman ki ti konstrir sa. Konblaz Perseverance, Roche Caiman. Vre zot bezwen al war Dr

Herminie pou tret zot Alzheimer.

(laughter)

HON EGBERT AGLAE

Leader Lopozisyon in koz lo rod fason pou kraz lanmen son oponan. Be zot bliye ki zot it fer. Zot ti aret Dr Herminie avek son pros e met dan kaso. Met lasezi lo byen e propriyete *United Seychelles*. LDS, zot serye zot?

Madanm Speaker, lalis i long. Sanmenm nou ti apel zot en Gouvernman kanmaron. Gouvernman US anba direktiv Prezidan Dr Patrick Herminie pe delivre *from day one*. Sanmenm in dir; *“Trust the process”*.

(APPLAUSE)

HON EGBERT AGLAE

Malgre ki zot ti esey vandaliz *State House on their way out*, pran tou sa ki zot ti kapab pran, sa pa'n met labar dan travay ki Prezidan Herminie i annan pou fer.

Onorab Georges atraver ou Madanm Speaker, in sit lanons lapolis pou pa *attend scene* aksidan. Onorab Georges, sa pa ni ti en desizyon *Cabinet*, me ki i ti en desizyon serten zofisye dan lapolis ki ti anonse, e ki sa bann menm letan *Compol* pa ti

okouran akòz i pa ti dan pei sa letan.

E la mon demann Onorab Georges pou al fer son resers e i a konnen lekel ki ti par deryer sa lanons avan ki i montre ledwa lo Prezidan e Gouvernman US.

Prezidan Herminie in dir “*Trust the process*” akòz nou Gouvernman pa pe tat tate dan fernwar. Nou konnen ki nou pe fer pour byennet e lavansman pei e son pep.

Bokou in ganny dir e napa rezon ki zot pa'n donnen lo sa bann size lanket endepandan. Leksplozyon CCCL, rayot prizon, size Lasonpsyon, *cold storage STC*.

Kwa ki zot per avek sa bann lanket endepandan? Eski zot pa oule Seselwa konnen ki'n pase? Eski zot LDS zot pa oule pep Seselwa konn laverite ki arive e lekel ki responsab? Eski zot pa anvi konnen akòz ki STC ti pros pou faid anba zot *watch LDS*?

Byento, size *management Air Seychelles* anba zot *watch* osi pou ganny monte. Sa ki'n dir lanmen i prop e napa koripsyon, Lepep Seselwa ava zize pour zot menm.

Madanm Speaker, Prezidan pe gard son parol. Reentrodiksyon *Tourism Board* e abolisyon *levy Lanvironnman* ti ganny entrodwir san gran

konsiltasyon san mazin son bann konsekans.

Gouvernman US i serye e konsyan ki se sekter prive ki pli byen pase pou *drive the Tourism Sector*. Napa en lot fason fer. E Gouvernman i a reste konman sa *policy maker* e regilater. Sa i apel larg lanmen sekter prive. Paret LDS pa kontan sa zot.

Madanm Speaker, size *Travizory*, ankor en lot skandal e sa mon pou adres li lo ladres Bidze, akòz ozordi kot US pe touse i parey sa latet zonnyon ki zot ti nonmen ki pli ou deplise, pli maler pe monte.

Gouvernman LDS ti'n pri dan sa fame transformasyon. 5an ti'n arive e zot ti pe ankor transformen, e plan ti ankor lo *computer* Minis. E se sa ki Oktob 2025 pep Seselwa ti fer en transformasyon e fou zot deor. Leson pour zot aprann sa.

Madanm Speaker, i kler ki Gouvernman LDS pa kontan ler Seselwa vilnerab ki zot ti mete lo en *bus stop* ki bis pa pase akòz fo promes, pe ganny benefis atraver zot prop larzan *tax* ki zot in kontribye. Sa pa larzan LDS sa. Se larzan pep Seselwa.

Pep Seselwa pe *trust the process*. LDS li i pa oule ou benefisye avek en rediksyon dan pri bis. LDS pa oule ou benefisye avek en lasistans kart STC pour bann fanmir ki

vilnerab. *LDS* pa oule ou benefisye avek en sistenm *URS* kot plizyer zenn san lanplwa, ouswa ki'n pri dan malez sosyal i ganny en lot sans pou zot redrese e pran lavenir dan zot lanmen.

LDS pa kontan ler ou ganny en lasistans ek *welfare*. *LDS* pa krwar dan donn ou en lakaz abordab. Sa zot sa. En parti pour tou son milyonner.

Madanm Speaker, dan pe *trust the process* mon akey demars Prezidan Larepublik Dokter Patrick Herminie pou komans demars pou adres sityasyon kou lavi e komodite, ki dayer ansyen Minis Finans ki ti taye, apre pou evant pli gro Bidze dan listwar nou pei, ti deside ale abandonn tou.

Minis Finans ti – ansyen Minis Finans ti dir ki fer desann pri lavi se en lenvansyon politisyen. Me son Prezidan ti dir zot pou fer desann pri komodite par elimin *middleman* kot *STC*. Be ki nou ti war apre?

Se antre zot menm zot ki ti vin *middleman*. *Business dealing* ti pe fer antre zot e nou *US* nou'n dir la “*enough is enough*”. E byento lenvestigasyon pou ganny fer dan sa proze *cold storage* e nou a konnen lekel ki'n benefisye.

Parkont, mon tre soulaze ki Prezidan Patrick Herminie pe al elarzi lalis komodite

esansyel par ankor azout 12 prodwi esansyel. Se sa ki ou apel get dan *welfare* ou pep.

(APPLAUSE)

HON EGBERT AGLAE

Madanm Speaker, Onorab Hoareau, atraver ou, in koz lo *right off* serten *loan DBS* aköz nou Gouvernman i konpran difikilte ki plizyer pti biznesmenn ti pe fer fas avek apre ki Gouvernman *LDS* ti deside abandonn zot.

Sa ki Onorab Hoareau pa dir nou se zis ki dan 2enm *round* eleksyon, Gouvernman *LDS* i anvoy en let *SRC* pou fer efas *tax* enn zot bann bon dalon biznesmenn. Be ki si sa, sa?

(Interruptions)

HON EGBERT AGLAE

Ler pti Seselwa ordiner – ler pti Seselwa ordiner pe pey son *tax* par legzizans *SRC*, serten ti pe al byen pase li. Selman an gro later en milyon Roupie plis ti pe ganny aste lo La Digue e par ti pe al ganny donner dan Linyon Estate. Larzan pou pey *tax* ti napa, selman larzan pou fer aste later ti annan. Konmdir sanson; “Isi Sesel sa”.

(laughter)

HON EGBERT AGLAE

Sanmenm sa Sesel pour tou son milyonner sa.

Madanm Speaker, dan pe *trust the process* mon akey demars Gouvènmman US pou koz avek sa 2 labank ki Gouvènmman i annan *share* ladan pou fer desann to lentere pou amelyor konpetisyon e donn plis akse finansyel avek bi fer pri servis vin pli abòrdab. Me i bezwen annan en *oversight* ki sa ki arive i transmet kot konsonmater.

Dan sa Sesel moman in arive e i nepli letan pou fer voras e vin milyonner demen bomaten. Sesel i merit ganny konstrir lo en prensip travay dir, la partaz e loportinite pour tou. Se sa *motto* nou manifesto; "*For the Many, Not the Few*," Sa ki anvi travay i bezwen ganny en lanplwa. Nou bann profesyonnel osi i merit ganny regarde e valorize.

Madanm Speaker, Prezidan dan son lasazes in fer kler ki sipor i sipoze en pon, e non pa en destinasyon. Ki sa i vèdir? Pour ou ganny asiste ou merit pe montre volonte pour ou osi ed ou prop lekòr. In fer resorti ki lobzektif se pa depandans me reentegrasyon dan prodiktivite, e ki nou bann zenn pa kapab reste deryer laport loportinite.

Lazenes, zot devret kapab vin sa ki zot anvi vini. Parey nou ti dir "*be what you*

want to be". E se sa ki *My First Job Scheme* pe al ranforsi Program *Internship e Skilled Development Program* pou ganny met an plas pou asire ki tranzisyon ant ledikasyon ek lanplwa i pli fasil e pli efektiv. Bann *skill* teknikal e vokasyonnel pou ganny prioritize.

Ler LDS pe pri dan lepase e pe gele lo loto, lo privez fizi e *bodyguard*, nou US nou pe rod byennet lazènes ki dayer se LDS ki ti'n kit zot deryer.

Madanm Speaker, premye *clue* dan sa *failure* pou regard lazènes se ler LDS ti deside aboli *Board SNYC* kot lavwa desizyon ek direksyon lazènes ti ganny deside par lazènes zot menm. Sa ti swiv par sa fame transformasyon dan SNYC kot Gouvènmman LDS pa ti krwar dan benefis annan en *youth worker* dan sak distrik.

Zot ti fer *redundant* serten sa bann *post e redeploy* sa bann pov *youth worker* e met zot dan bann diferan landrwa ki zot pa ti'n menm *trained for*. Sa Onorab Georges ki ou apel en lensilt lo lentere lentelizans nou bann zenn profesyonnel.

Madanm Speaker, sa in anmenn – ki sa in anmenn ouswa ki'n arive apre? Ni program e kalandriye aktivite lazènes pa'n preski materyalize preski ditou lo

nivo distrik. Komite *DYC* ti disparet. E rezilta, lazenes ti ganny oubliye akòz destriksyon sa bann striktir sipor.

E la mon enplor avek nouvo Ladministrasyon *LDS* pou vin avek en lespri e lide pli inovativ pou reetabli sa bann striktir e donn nou bann zenn en lot souf loportinite.

Madanm Speaker, sa ta dezord ki Gouvènmman *LDS* in fer dan striktir sipor sosyal e sosyoekonomik i vremen grav. Ladministrasyon Prezidan Herminie i annan en latas enorm devan zot pou etabli e fer zot vin pli meyer. E mwan mon dir kont lo mon sipor. E mwan mon dir ek lazenes Seselwa, *trust the process!*

(APPLAUSE)

HON EGBERT AGLAE

Madanm Speaker, ler mon pe koz lo move destriksyon sa bann striktir e osi mank vizyon pou adres bann defi pei, mon le koz lo sa size Sant Reabilitasyon.

LDS in fail big time. Oli nouvo Sant *MAT* Klinik English River? Si zot pa ti'n koz gro labous e al dir *UAE* nou pa'n bezwen en tel fasilite ki larzan pres \$5milyon ti'n fini ganny *secure* sa letan, ozordi nou pa ti pou 5an – nou ti pou 5an pli devan avek en tel fasilite e nou pa ti pou bezwen

al kree en Lazans Lasante Mantal. Me nou Gouvènmman napa swa la kot in arive. Se al rekonmanse, *go back to square one.*

Avek reentrodiksyon *APDAR*, sa i a redonn bann fanmir ki pe soufer e donn zot en nouvo lespwar, akòz nou ti dir ki sa desizyon pou met sa servis *APDAR* anba Minister Lasante pa pou marse. E vwala rezilta. Nou, nou ti dir lo kote *US* e bann *yes men* sa letan lot kote latap pa ti war pli lwen ki zot bout nennen.

Madanm Speaker, size lozman lakaz, ki'n arive? Ki'n pase? *LDS* ozordi pe reklanm ki zot in konstrir plis ki 250 lakaz ki lamazorite ti bann proze 24-24 inisye par ansyen Prezidan Faure, ki zot ti oblize konplete sa bann proze e ki zot ti erite anba Ladministrasyon *US*.

Prezidan Herminie in dir ki Gouvènmman *US* in fini *secure* finansman pou konstrir plis ki mil lakaz ki pou konmanse sa lannen e ki *by* 2030 omwen 2mil lakaz pou ganny konstrir.

E atraver ou Madanm Speaker, yer Onorab Tirant – Colin Tirant, ler i fer son matematik i dir savedir pou konstrir 3 lakaz par zour. Be Onorab, oli sa lozik ladan? Proze lakaz i fer par *batch* lo en *timeline* kontra.

*(Interruption)***HON EGBERT AGLAE**

Pep Seselwa, *trust the process*. Prezidan Herminie i konnen ki i pe fer e byento lakaz pou ganny konstrir.

Madanm Speaker, size lasante i sagrinan ler ou regard statistik lanmor dan nou lopital. *ICU mortality rate* in ogmante. *Infant mortality rate* in ogmante. En senp ti lentervansyon i parfwa fini par lanmor. La mon soulaze ki Prezidan Herminie pe al fer en reform dan Minister Lasante pou met plis lanfaz lo prevansyon e lasante primer. E la mon dir, annou tir politik dan nou sistenm lasante ler ou pe desarz ou responsabilite profesyonnèl.

Nou bezwen re etabli konfyans e retir lenkyetid dan sa pep letan i pe al akse okenn servis lasante. Ou pasyan i sipoze ou priyorite. E en term ki nou servi dan lasante se "*the patient or the client is always right*". Annou donn zot sa swen ki zot merite.

Yer atraver ou Madanm Speaker, Onorab Roucou in koz labous plen lo lekòl NIHSS. Eski sa Onorab i okouran ki sistenm *wiring* e serten *maintenance* i bezwen al ganny fer lo sa batiman? Akòz letan ou met boulwar *on*, *aircon* i tenyen partou.

*(Interruptions)***HON EGBERT AGLAE**

Mon pa konnen si sa i en kado anpwazonnen, konmdir Ferrari ti dir.

Onorab osi in koz lo plizyer proze. In koz lo proze mitigasyon delo sale devan Vilaz Prezidan. Be Onorab, sa problem pa ankor rezourd. Eksper in dir ki sa elevasyon miray pa solisyon pou rezourd sa problem, me se en *breakwater*. Onorab ou ti'n devret fer ou resers avan ou vin koze la anndan.

*(Interruptions)***HON EGBERT AGLAE**

Be ki ti arive? Gouvènmman LDS pa'n ekoute apre plizyer kestasyon mon'n anmennen devan Lasanble lo *sore* zabitan Port Glaud. Zot in taye akòz eleksyon ti pros pou fer sa miray, ki ozordi i pa efektiv.

Ozordi si zot ti'n ekoute, problem ti pou'n rezourd dan son totalite. Onorab osi ti koz lo Proze *West Coast*. Mon pa pou al tous *West Coast*, mon ava koz lo la dan Bidze.

Be Onorab, sey mont en kou dan letan lapli, pas par Anse Boileau, ale Baie Lazare ziska Maravi. Plizyer basen delo e sa pe koz danze pour motoris ek pyeton.

Madanm Speaker, lo size lord ek lape mon'n tann LDS

koz lager e *video* ki pe sirkile. Be *LDS Alzheimer* pe afekte zot tro bokou. Kantite konfli, bagar ant *law enforcement officer* e sivilyen ki'n arive anba zot *watch*? Nou'n war fizi ganny pete, gaz fer plere tire dan lakominote. Corgat, Mont Fleuri, Roche Caiman tousala in arive.

Nou'n war loto Minis ki *escape checkpoint* e fizi ganny tire lo loto. Sa fame Tim Ibou ki'n teroriz nou bann zenn e serten ganny *met held at gunpoint*. Zot in bliye sa? En lot *Alzheimer* sa?

Zot in koz lo lalit kont drog, selman drog ki'n ganny sezi i *end up* lo *ghetto*, e sa ki sipoze pe *uphold the law* i enplike ladan li osi!

(Interruption)

MADAM SPEAKER

Onorab, ou annan ankor 2 minit.

HON EGBERT AGLAE

Zot in koz lo *dealer* ganny retournen dan pei. Akoz zot pa al demann zot dirizan ki sa dimoun ti pe frekante? Akoz ki zot ti forse deport li? Sa ti pou anpes en lanbarasman politik familyal serten nou bann dirizan. Ler zot koze konnen ki zot koze.

Madanm Speaker, an terminan en ta size mon ti a swete adrese, me letan pa pe

permet. Me la ki nou pou annan en diskour Bidze tre byento mon pou adres plizyer size dan mon diskour lo mon distrik Port Glaud e etal en plan serye.

Mon pou osi adres size sekter biznes, sekter finansyel. Size konsesyon trafik, lagrikiltir, lapes, *issue corporate social responsibility*. Sityasyon pti proze *Local Government*, lozman, sekter lenerzi, size lozman, lanvironnman e defi sosyal.

Pep Seselwa, ler zot tann *LDS* pe plennyen, pa antren zot. Zot ti la. Zot ti ganny pouvwar absoli. Zot ti per pou kestyonn zot prop Gouvernman e zot ti soud lo *sore* sa pep pandan sa dernyen 5an.

Mon dernyen parol ki mon anvi dir zot "*US* pou prouve e pou prouv son lekor". E la mon le dir avek *LDS* se tenir pa plennyen, aköz pep Seselwa pe *trust the process*!

(APPLAUSE)

HON EGBERT AGLAE

Pei i dan bon lanmen avek Dokter Patrick Herminie! Mersi.

(APPLAUSE)

MADAM SPEAKER

Onorab Monthy.

HON PHILIP MONTHY

Mersi Madanm Speaker. Madanm Speaker sa travay ki nou Lasanble Nasyonal pe fer sa semenn, kot tou bann Manm pe ganny sa loportinite pour reponn diskour lo Leta nou nasyon, i enn bann moman pli for dan travay nou Lasanble.

E i enn bann moman kot mazorite Seselwa i fer sir ki zot devan zot televizyon oubyen o bor zot radyo pour swiv e ekoute ki sakenn antre nou pe dir.

Sa i leka Madanm Speaker akòz Leta nou nasyon i konsern nou tou. Leta nou nasyon i konsern nou, i konsern nou pei li menm, nou fanmir e nou zanfan ki fitir nou zenerasyon.

Seselwa i swiv tre pre sa ki pe ganny dir akòz i lemoman osi pour zot kapab analize, balanse e tir zot prop konklizyon lo si sa swa ki zot ti fer an 2025 ti enn ki ti meyer.

Si sa swa ki zot in fer, ti vreman enn ki Sesel e Seselwa ti bezwen oubyen eski - eski apre tou sa bann zoli promes dan letan kanpanny Seselwa pa'n ganny – eski apre tou sa bann doz dimyel ki zot in gannyen avan eleksyon osi ki Seselwa pa pe prezan fer fas avek la tris realite ki zot in ganny vann en kabri dan sak? Parey Onorab Cosgrow ki Minis Prensipal konmela ti

kontan dir nou isi dan sa Lasanble.

Malerezman Madanm Speaker, tou lendikasyon ziska prezan ler mon'n ekout diskour Prezidan Herminie, tou lendikasyon ler mon'n ekout lentervansyon bann Manm lo lot kote latab i montre se ki egzakteman sa ki'n arive Madanm Speaker.

Ozordi i fer mwan mon sizyenm repons ki mon pe fer lo diskour Leta nou nasyon ki'n vin ganny prononse par de Prezidan la dan sa Lasanble.

Mon napa sa kantite leksperyans parey mon koleg Onorab Georges i annan, me selman mon santi ki mon'n ase byen pase pour kapab fer en analiz profon lo sa 6 diskour ki mon'n ekoute e finalman ariv lo en konklizyon.

Parey mon'n fer resorti Seselwa i touzour pe antisipe pour ekoute ki Prezidan pei i annan pou dir akòz i konsern zot lavenir e i konsern lavenir zot zanfan. Me Madanm Speaker sa diskour ki Prezidan Herminie in vin prononse isi la dan Lasanble Nasyonal le 27 Zanbye in diskour SONA pli kourt, ki mwan dan mon kapasite koman en Manm Lasanble mon'n deza ekoute.

E mon asire ki menm diskour Leta Lanasyon pli kourt ki'n deza ganny prononse par okenn bann

Prezidan presedan. Ler diskour *Leader* Lopozisyon e diskour *Leader* Biznes Gouvernman dan Lasanble i pli long ki diskour Prezidan pei, i montre nou ki nou annan en manman problem.

Me selman kantmenm sa Madanm Speaker, mon pour donn Prezidan Herminie en pe kredi, mon pour donn li kredi akòz nou lo sa kote latab nou ti'n donn li zis 30minit. Me in nobou kapab kas son prop rikord personnel par 15 minit. Kekfwa i a kapab *improve* lo la dan son prosen diskour.

Madanm Speaker en diskour sitan enportan kot Leta nou pei pe ganny adrese ti devret annan en levantay size enportan ki ganny met devan Lepep Seselwa.

Ti devret annan en plan travay konkret realistik e serye ki pe ganny prezante avek Seselwa, pour donn lespwar omwen sa 34mil Seselwa ki'n fer zot konfyans pour konvenk zot ki zot swa, ti enn ki ti bon.

Prezidan Herminie ti devret omwen dir sa pep kwa ki li ek son parti ti pe vin enplimante? Ki ti pour vreman fer en diferans dan lavi Seselwa parey in sitan koze dan son bann *rally* oubyen konferans de pres avan i ti ganny elekte.

Sirtou apre tou sa kantite keksoz ki dapre li ti sipoze mal avek sa pei anba

Ladministrasyon *LDS*. E kot li i ti sipoze pe vin fer pli byen parey Onorab Vidot ti kontan dir nou dan 7enm Lasanble atraver ou Madanm Speaker.

Seselwa ti pe espere ki Prezidan Herminie ti pour vin pronons en diskour ranpli ek plis sibstans, si pei ti vreman sitan dan mal e ti sitan annan bokou pour fer, parey ti pe dir zis detrwa mwan pase.

Be ki nou'n gannyen? Nou'n ganny en diskour *SONA* 45 minit Madanm Speaker. E nou devret pe demann nou lekor akòz? E mwan mon poudir zot akòz. Mon kapab pour komanse dir se akòz ler Prezidan i vin delivre son diskour, lo Leta Lanasyon isi dan Lasanble Nasyonal tradisyonnelman i bezwen fer li an debout, e ki se akòz sa ki'n sitan kourt.

Me mon pa pour al laba ozordi Madanm Speaker me o kontrer mon pour donn zot, detrwa lezot rezon akòz.

Premyerman sa kalite diskour i en lendikasyon ki Prezidan Herminie ek son Gouvernman *US*, in erit en pei ki sitan pe prospere ekonomikman.

(APPLAUSE)

HON PHILIP MONTHY

En pei ki sitan dan en bon Leta gras a sa kalite travay ki Prezidan Ramkalawan e sa

Ladministrasyon *LDS* in fer zis dan 5an, ki dokter ler in fer son konsiltasyon, i pa'n war okenn maladi e alors in napa nanryen pour li vin dir.

Tou sa bann koze dan son bann *rally* ti zis en bann bat latet e lenvansyon fer par en politisyen ranpli ek laenn ek vanzans ki ti zis anvi vin ganny pouvwar *no matter what*. E ki la in ganny pouvwar Seselwa in deza komans war ki i vre koze i fasil, me i pa osi fasil pour swiv sa bann zoli parol par aksyon.

Seselwa pe komans war ki zot in elekte en tim kozer me ki napa en sou nosyon ki manner pour diriz en pei. Zot in vin en 'Gouvernman kanmaron', parey Minis Prensipal Cosgrow ti kontan dir, zot zis *go back* lo zot bann desizyon ki zot in pran parey nou'n vwar tou resaman.

Prezidan Herminie in napa gran keksoz pour li vin dir Seselwa Madanm Speaker, aköz Leta nou pei ki in vin zwenn in enn ki'n antyerman diferan avek Leta sa pei ki Prezidan Ramkalawan ti vin zwenn an 2020.

Kot pei ti sitan dan mal, sityasyon ti sitan kritik menm lapey travayer dan servis piblik pa ti garanti. Ki vedir ti pour napa en lasyet manze pour en manman oubyen en papa donn son zanf. Sete sa

sityasyon Sesel an 2020 Madanm Speaker.

LDS in tir Sesel dan en trou san fon nou'n retourn dan nou konfor e byen vit Kreol in bliye kote i ti ete zis detrwa lannen pase, ozordi nou war nou dan Lopozisyon.

Prezidan Ramkalawan pe ganny ensilte, persekute e arase sa respe ki en ansyen Sefdeta i merite apre ki in deservi sa pei e sa pep avek dinyite. Sa menm dinyite ki li in akord son predeser me ki ozordi anba sa Ladministrasyon *US* zot napa sa grander lespri, oubyen sa *statesmanship* pour zot kapab akord li.

Madanm Speaker sa Sesel ki Prezidan Ramkalawan in *handover* avek Prezidan Patrick Herminie an 2025, pa ti en kales kase parey li ti anbank ladan an 2020. Me in plito nou'n donn li en *Rolls-Royce* ki tenk i plen e deswit, deswit bal in komanse.

Leader of Government Business dan Lasanble li menm in konfirm sa dan son repons, kot in admet ki lekonomi Sesel in byen ganny *managed* anba Gouvernman *LDS* me ki selman dapre li, nou pa'n partaz sa larises avek sa pep ki pirman en mansonz Madanm Speaker ki mon pour adrese pli tar.

Sa bonn sante ekonomik ki Sesel in war li

ladan ozordi apre 5an travay dir par Ladministrasyon LDS, i enn bann rezon akòz ki Prezidan Herminie in vin fer enn bann SONA pli kourt dan listwar Sesel. Sa se akòz in napa gran keksoz pour li vin dir. Granmoun i dir ou, ler keksoz pe marse initil ou sey aranze akòz olye aranze i pour kase.

Rezon akòz in poz son marto 14 liv trankil laba dan en kwen e in prefere pas son letan zis pran kredi lo bann proze LDS ki ti'n swa deza fini komanse, oubyen ti pe al komanse. Tel parey son bann reprezantan la anndan in vin fer.

Onorab Robert David atraver Madanm Speaker in dir ek bann paran Mont Buxton ki byento zot bann zanfàn pour retourn dan zot lekòl La Rosière. Onorab David pe alor dir ek bann paran ki US in konstri sa lekòl dan zis 3 mwan. Alor ki premye pyer pour sa proze ti ganny depoze le 4 Desanm 2024.

Parey Onorab Loze ti kontan dir dan 7enm Lasanble Madanm Speaker atraver ou, 'bourik i travay seval i selebre', se sa ki nou'n temwannyen la depi Mardi e se sa ki nou'n tandè dan diskour Prezidan Patrick Herminie Madanm Speaker e se sa ki nou pe tandè la lo finansman proze Vilaz Orkid.

Madanm Speaker nou'n tann en SONA ranpli ek proze LDS e osi ranpli avek distraksyon dan laform bann swadizan *enquiry*. Ki zot sel bi se pour senpleman detourn latansyon sa pep lo sa bann gasi e sa bann ekstravagans ki zot pe fer e lo sa defonse kot zot pe anmenn nou. Zis a penn 100 zour ki zot in dan ladministrasyon pei.

Rezon akòz Prezidan Herminie in vin pronons en diskour sitan kourt, se akòz i napa nanryen pour li vin dir, Madanm Speaker.

Dezyenmmman sa diskour 45minit in montre Lepep Seselwa ki sa Gouvernman US avek tou son bann swadizan gran savan ki zot annan avek zot AI e apre tou sa bann gran, gran koze ki zot in fer, in montre nou ki zot napa en sou plan, pour sa pei apard zis vin depans larzan sa pep an bonnavini e fer bann gran ekstravagans ki apenn detrwa mwan pase zot ti pe akiz LDS pour fer.

Bann ekstravagans ki nou pour met a latansyon Seselwa ler nou pour debat lo Bidze semenn prosenn. Apard vin koz lo son detrwa mezir popilis ki in pran Madanm Speaker, Prezidan Herminie in zis koze me i pa'n vreman dir nanryen.

Menm sa detrwa swadizan lanons 100 zour ki'n

anonse, kot per - par en kout baton mazik lavi Seselwa ti pour transformen in fel miserableman e son prop siporter pe komans anvoy lavwa.

Bis ki ti pour desann R6 lo *stage* dan *rally* ler in ariv *State House* in aprann ki wi koze i fasil, koze i vreman fasil, me ler ou fer fas a larealite, ou war ki pour transform sa koze an aksyon i pa sa sitan fasil, parey ler ou ti pe danse lo *stage*.

Promes bis R6 in evapore e in transformen pour vin R8 prezan. *Alzheimer* numero 1, Madanm Speaker.

(APPLAUSE)

(laughter)

HON PHILIP MONTHY

Mon bann frer ek ser Seselwa ki servi son mwayen transpor pour zot deplasman in ganny anbete Madanm Speaker.

Prezan ler Prezidan Herminie in war ki zafer in komans sal e son bann prop siporter pe komans anvoy lavwa i vin dir ou, '*trust the process!*'

In dir sa Madanm Speaker aköz son bann prop siporter in fini komans kriy lasasen e pour sey pe z en pe tansyon in vin avek se fraz '*trust the process!*'

Me Prezidan Herminie mesaz Seselwa la deor i kler e

zot pe dir ou, ki sa *trust* ki ou pe dir zot, zot tou senpleman pa pe kapab *process* - ou'n zis bat zot latet!

Pandan ki ou, ou reste dan ou gro Villa Eden Island e ou osi ou'n fini vin *cabin 'screw'*, kot ou pe monte desann lo avyon. Prezan Madanm Speaker Prezidan Herminie ek son Gouvernman *US* in abiz lo konfyans nou bann dimoun aze. Kot i ti dir zot se son Gouvernman ki pour finalman donn zot R10mil, ankor en gro mansonz, R10mil in ariv R800 la. E menm sa R800 pa zot tou bann vyeyar ki pe gannnen. *Alzheimer* numero 2 Madanm Speaker!

APPLAUSE)

HON PHILIP MONTHY

I fer lapenn Madanm Speaker eski sa i en fason pour tret nou bann retrete? Abiz lo zot dinyite? Zot 10mil ki Prezidan Patrick Herminie ti promet zot, i dir zot '*trust the process*', aköz zot R10mil pour lemoman i anba *triple lock* e sa trwa lakle, sa trwa *lock* in perdi parla dan *villa* 106 Eden Island.

E parey in dir li menm dan enn son bann *interview*, '*hopefully! Hopefully* an 2030 - (ler i ti pe eksplik *triple lock*, sa) - '*hopefully* an 2030 sa R800 ava ariv R10mil'. Sa mo

'*hopefully*' Madanm Speaker se li menm li ki ti dir sa, e ler mwan mon'n tradwir li an Kreol i vedir 'fotespere.'

E nou tou Kreol la anndan nou konnen ki sa i vedir, savedir nanryen pa garanti e sa i kapab pa arive. *Trust* nou bann vyeyar in ganny vyole Madanm Speaker, prezan ki mannyer oule vin dir zot, '*trust the process?*' Sa ou pe ensilte zot sa.

10mil i anba *triple lock* selman bann gran *dealer* drog avek teroris ki zot, zot ti sipoze anba *triple lock* anler Montagne Posee, baro prizon in ganny ouver gran pour zot, e zot pe sorti parey ros dan fles konmsi Onorab Loze, atraver ou Madanm Speaker.

(APPLAUSE)

HON PHILIP MONTHY

Pandan ki zabitan Grand Anse Mahe ki'n met zot konfyans an gran mazorite dan sa Parti US dan dernyen eleksyon pe ganny demande pour *trust the process*, par Prezidan Herminie e Onorab Lepathy sa de teroris ki si par maler zot ti'n ganny sans fer sa ki zot ti pe al fer, zis Bondye ki konnen ki kalite dega ki ti pou'n arive e ki kantite lanmor ki ti'n kapab annan.

Zot, zot pe marse lib e zabitan Grand Anse Mahe zot pe ganny demande pour reste

trankil, pa kestyonnen e zis *follow the process*. Menm si sa de kondannen ti'n pled koupab Ankour Sef Ziz Herminie i dir zot sa *case* ti mal ganny zize e zot a bezwen *trust* son *process*.

Se sa Leta nou nasyon ozordi Madanm Speaker, kot en Prezidan i vin enterfer avek travay Zidisyer se la kot nou'n arive. *Alzheimer* nimerò 4, mon krwar i fer la Madanm Speaker.

(APPLAUSE)

HON PHILIP MONTHY

Dan sa pti 45 minit ki Prezidan Herminie in swadizan koz lo Leta nou nasyon, in pas son letan zis pran laglwar lo bann proze Gouvernman LDS.

Wi Onorab Conrad Gabriel e Onorab Uranie, atraver ou byensir Madanm Speaker, proze konblaz i en proze LDS e zot pa pour vin anbet personn la zot! Ou pa pour vin anbet okenn biznesmenn ki'n pas plis ki 30an lo lalis later endistriyel pour fer zot krwar ki se US zot gran sover.

Wi US in fer konblaz dan lepase Madanm Speaker. Zot in fer aköz zot ki ti la, zot in fer apre zot in pran e zot in partaz antre zot. Mwan mon'n personnelman asiste de dan sa bann seri *meeting* lo sa proze konblaz ki'n ganny fer,

akoz en gran parti sa proze pour tonm dan mon distrik Cascade kot *zone* 20.

E mon'n zwenn plizyer biznesmenn ki ti'n fini perdi lespwar apre tou sa lannen ki zot in zis en non lo en lalis, me zanmen zot in gannnen.

Proze ti pe al ganny fer, bann prosedir pe ganny swiv, *US* in vini in taye in fer e nou, nou pour annan bann kestyon pour nou demann li aköz ki sa in fini ganny fer deswit la?

Me ki nou'n war? Nou'n war bann politisyen *US* ki'n akimil plizyer morso later e i annan menm ki ti deza annan later lo zot, ki ti'n met enn lo zot madanm. Ki nou'n war? Nou'n war Prezidan Patrick Herminie aste en morso later endistriyel *S8911* pour zis R35mil e zis 21 zour apre vann sa menm bout later pour R1.8milyon.

Sa i pa zis en form koripsyon Madanm Speaker. Sa menm koripsyon ki Prezidan Herminie fek vin dir avek Lepep Seselwa ki i pour lager pour eliminen. *Alzheimer* nimerö 5.

(APPLAUSE)

HON PHILIP MONTHY

I pa zis en koripsyon me i en krim anver nou bann biznesmenn ki ti pe martirize pour ganny en morso later. La ki zot ki la avek sa pa oule war

later, fotespere zot vilen manni pa reaparet ankor.

Me mwan mon pour reasir Seselwa ki nou, nou pour la pour vey zot. Nou pour la pour fer sir ki sa ki'n lo lalis e ki merite ki gannnen me non-pa bann *opportunist* ki'n vann zot nanm pour faver.

Prezidan Herminie in koz longman lo koripsyon e Onorab Gabriel in fer komedi lo kontra ki fek ganny sinyen pour sa proze konblaz. Mon ti a kontan demann li ki kan prosedir *tender* pour sa proze konblaz ti ganny fer?

Ki prosedir ki'n ganny swiv? Nou'n war lakonpannyen *Jan De Nul* ki'n ganny kontra. Sa menm lakonpannyen ki en Onorab la anndan lo lot kote latäb ti kontan mansyonnen e fer tou sord lakizasyon lo *VP Afif*.

Ozordi zot labous in soude Madanm Speaker? En nyaz koripsyon in ganny penn lo Gouvernman *LDS*, me selman sa menm artis ki pe penn sa portre li menm li in sey vin anbet Seselwa, e vin dir nou ki sa *villa* 106 kot i pe reste Eden Island i kout zis R10mil.

Kestyon Madanm Speaker. Kestyon, ki Seselwa i devret pe poze. Se ou Prezidan Dokter Patrick Herminie, si sa *villa* i sipoze kout R29mil par zour ki mannyer ou, ou pe pey zis R10mil? Ki lagreman par

deryer ledo Seselwa ki ou'n annan avek sa propriyeter pour sa faver? Si sa pa koripsyon sey dir mwan ki si sa, sa?

Ou'n koz lo latransparans silvouple ekersi Seselwa lo sa enn, dir nou ki laranzman ou'n gannyen avek sa propriyeter Larisi. Akoz sa enn *process* i enn ki en pe difisil pour Seselwa *trust*.

Madanm Speaker mon'n asize mon'n ekout sa bann reprezantan *US* koze depi ler nou'n komanse Mardi. In annan en bann moman kot plizyer nou, menm *staff* Lasanble la anndan mon'n get zot, nou'n bezwen lager pour ki sonmey pa pran nou.

Me sa ki'n pli difisil se pour asize ekout sa kantite mansonz ki'n ganny prononse dan sa detrwa zour. I fer lapenn.

Onorab Lopathy atraver ou Madanm Speaker i vin dir nou, i pe al koz en kou laverite, me deswit apre i vin nonm promes R10mil ki dir Prezidan Ramkalawan ti fer ler i ti ankor dan *SNP*. Selman Madanm Speaker, plizyer fwa nou'n deza demann zot pou dir kote e kan sa ti ganny dir zanmen zot in kapab fer li.

Sa se i akoz i enn zot bann fabrikasyon kan sa ki ti ganny dir ti R5000 mil e dan lenstans kot i annan 2

pansyoner dan menm lakaz i a fer zot R10mil. Sa ki ti ganny dir.

(APPLAUSE)

HON PHILIP MONTHY

E fodre pa zanmen nou bliye, ki mannyer zot ti'n vin dir kote pour ganny larzan e ki zis en Gouvernman iresponsab ki pour fer sa.

Zot in ne dan mansonz Madanm Speaker e zot pour mor dan mansonz! Onorab Sandra Sultan pour distrik Anse Aux Pins i dir nanryen pa'n ganny fer dan son distrik sa dernyen 5an. Me selman ler mon pase mon war en bazar nef avek tou lezot fasilite parey *gear store* pour bann peser ki'n ganny fer.

Mon war en sant lasante ki deza an konstriksyon lo Ile Soleil pour ranplas sa enn ki'n delapide anba son Gouvernman. 6 fanmir in benefisye avek sa 6-*unit* lakaz, 3 lasanm a en sonm R5milyon. Madanm Speaker zot in ne dan mansonz, zot pour mor dan mansonz!

Onorab Trevor Louise ki zabitan Bel Air fek met zot konfyans dan li, pour li vin koz laverite la dan sa Lasanble, dan son premye diskour ki i fer i vin koz e gro mansonz. I dir ki pandan sa dernyen 5an in napa okenn konstriksyon lakaz dan distrik Bel Air e ki

menm avek en mazorite absoli a sa letan mon pe *quote* li mo pour mo la “ansyen Ladministrasyon LDS pa'n kapab delivre ni menm en pyer fondasyon pour zabitan Bel Air”.

Belair Madanm Speaker, in ganny li 6-unit 2 lasanm a en kou R8.1milyon anler Sans Soucis parey Onorab Henrie ti fer resorti. E *groundwork* pour 16-unit *midrange condominium* in fini komanse, zot in ne dan mansonz zot pour mor dan mansonz Madanm Speaker.

(APPLAUSE)

HON PHILIP MONTHY

Onorab Uranie atraver ou Madanm Speaker olye reste lo son zil, kot li ek son zabitan in benefisye plis ki tou lezot lo Sesel, avek proze pour plis ki R600milyon. E menm sa olye dir mersi, in zis vin maltret Prezidan Ramkalawan dan son diskour yer.

In vin dir ki plizyer lakaz ki'n ganny afekte avek leksplozyon CCCL pa ankor ganny aranze. Onorab nou'n lekol ansanm, mon'n apresye ou *call* ki ou ti donn mwan dan sa granmaten le 7 Desanm, mon ti war li koman en sipor enkli mesaz ki Onorab Vidot ti anvoye – mon pa'n bliye mwan.

Me mon pa konnen ki dernyen fwa ou ti met ou lipye Cascade. Atraver ou Madanm Speaker ou a dir Onorab Uranie sa ki ou ti devret dir, ‘se ki plizyer lakaz dan sa 300 ekek lakaz ki ti'n ganny andomaze, oubyen detri konpletman avek leksplozyon CCCL in fini ganny repare oubyen konstrir a leksepsyon zis 3 ki pe al komanse byento!’.

Mon envit ou vin fer letour Cascade. Mon a montre ou bann video lekspozisyon e ou a konpare ou menm. E letan ki mon lo leksplozyon CCCL Madanm Speaker, mon pour repet mo pour mo ki Prezidan Patrick Herminie ti dir dan enn zot bann rankont politik dan ICCS.

Mon *quote* “leksplozyon CCCL – (dimoun bann dimoun i bat lanmen) - le 7 Desanm 2023, mon pe promet zabitan Cascade ozordi ki avan le 7 Desanm 2025 zot pour ganny en rapor!”.

Madanm Speaker pa mwan ki ti dir sa, pa Prezidan Ramkalawan ki ti dir sa, sa se parol Prezidan Herminie sa. Mon krwar sa i *Alzheimer* nimeron 6 sa.

(laughter)

HON PHILIP MONTHY

Ozordi i le 5 Fevriye 2026, la ki ou ki dan Gouvernman, oli sa rapor ki ou sipoze donn zabitan Cascade avan le 7 Desanm 2025? *Alzheimer* in atak ou? Madanm Speaker zot in ne dan mansonz e zot pour mor dan mansonz.

Onorab Lemiel atraver ou Madanm Speaker in akiz Gouvernman LDS konmkwa nou pa'n get Seselwa, in demande akfer ou annan en lekonomi ki stab si ou pep pe viv dan la mizer? E in menm dir ki LDS in vin koup bann benefis.

Madanm Speaker mon pour kategorikman demanti sa ki onorab in dir avek tou respe ki mon annan pour li koman mon Onorab dan mon distrik kot mon reste.

Le 3 Novanm 2023 Minis Hassan ti anons sanzman dan rates pour 9 benefis, ki pandan plis ki 10an pa ti ankore ganny revize anba sa Gouvernman US ki sipoze en Gouvernman ki get Seselwa.

'*Maternity*' sorti 2480 anba Gouvernman US, pou vin 6633 anba Gouvernman LDS ouswa en logmantasyon 167poursan.

'*Paternity*', sorti 1240 anba US pou vin 3316 anba LDS ouswa en logmantasyon 167poursan.

'*Semi-orphan*', sorti 1300 anba US pou vin 2350 anba

LDS ouswa en logmantasyon 81poursan.

'*Orphan* oubyen zanfani ki'n ganny abandonnen', sorti 1540 anba US pou vin 3134 anba LDS oubyen en logmantasyon 104poursan.

'*Foster child*', sorti 1300 anba US pou vin 3134 anba LDS oubyen en logmantasyon 141poursan.

'Lasistans R25mil', ti ganny entrodwir pour paran ki adopte en zanfani.

'*Survivor allowance*' sorti 2480 anba US pour vin 5224 anba LDS oubyen en logmantasyon 111poursan.

'*Expectant mother allowance*', sorti 1500 anba US pour vin R5000 anba LDS oubyen en logmantasyon 233poursan.

'Lentrodiksyon nouvo benefis pour bann manman ki'n donn nesans plis ki en zanfani' avek en minimonm alokasyon R3134 ziska en maksimonm R6633.

E annou pa bliy 2 logmantasyon saler ki'n ariv 17poursan dan sa pti moman letan, kot apenn detruwa lannen pase larzan pour pey travayer ti napa.

Lasistans R300 lo *Bill* elektrik pour bann fanm vilnerab, logmantasyon *stipend* pour nou bann etidyan ki pe etidye aletranze. E apre zot vin sey anbet Seselwa pour fer krwar ki zot ki'n fek donn

logmantasyon sa bann etidyan kan sa in arive depi anba nou Gouvernman LDS.

‘Logmantasyon dan benefis retret pour bann dimoun aze;’ kot bann ki pa pe tous Fon Pansyon in war zot ganny en logmantasyon ziska R900 plis ki sa promes ki Prezidan Herminie ti fer pour anbet nou bann retrete ki'n degize sorti 10mil pour vin zis R800 e pa fini la, sa 800 zis serten antre zot ki'n gannnen.

Wi Madanm Speaker se sa ki sa Gouvernman LDS in akonplir pandan sa manda 5an lo nivo sosyal e ki nou ti pou kontinyen anbelir lo la, si nou ti'n ganny en lot manda.

Madanm Speaker, letan mon pe konklir mon oule zis dir mon bann zabitan Cascade, ki mon'n swazir pour pa tro koz lo nou distrik tou senpleman aköz semenn prosenn Lasanble Nasyonal pe al debat lo Bidze.

E pandan mon entervansyon mon pour prezant avek zot Leta nou distrik. Menm si deza ler ou pase Cascade ou war sa transformasyon ki'n annan, kontrerman a sa ki Onorab Uranie in sey vin fer krwar.

Mon a prezant avek zot an detay kwa egzakteman ki ki'n ganny akonplir dan sa dernyen 5an. E mon pour fran avek zot lo bann *challenges* ki reste devan nou e zefor ki pe

kontinyelman gannnen - ganny fer pour adres tou sa bann defi enn par enn.

Madanm Speaker ler LDS ti ariv lo pouvwar an 2020, parey mon'n deza fer resorti sa pei ti dan I.C.U. Nou'n vini e nou'n travay, sa travay ki'n ganny fer in enn ki'n ganny fer avek leker pour byennet nou pei *bien-aimé* e pour byennet Lepep Seselwa.

LDS pa'n zanmen a okenn moman abandonn son bann prensip e valer, pour nou get nou lekor oubyen nou parti avan. Bann desizyon ki nou'n pran in ganny fer avek bokou refleksyon pour benefis sa pep. Wi in annan desizyon ki serten kous nou popilasyon pa'n kontan me Madanm Speaker, parey Onorab Savy in eksplike dan son lentervansyon ler in servi legzanp sa papa ki en *driver taxi* e ki bezwen get priorite son lakour avan pour kapab nourri son fanmir avan al dan lezot depans ki kapab ganny fer pli tar o fimezir ki sityasyon finansyel i permet, se koumsa ki nou'n travay, e nou pour touzour mars nou latet anler pour sa. Nou pour kontinyen travay koman en Lopozisyon responsab ki pour touzour met byennet sa pei e sa pep avan nou byennet personnel.

E nou pour kontinyen gard lespwar ki sa fot ki

Seselwa in fer an 2025, pa pour ganny repete ankor. E lespwar nou annan nou Madanm Speaker aköz nou dan *LDS*, nou pa zanmen e nou pa zanmen les tonbe. Mersi.

(APPLAUSE)

MADAM SPEAKER

Bon nou ava, nou ava prezan pran en *break* e nou ava rebran sesyon 2er.

(BREAK)

MADAM SPEAKER

Bon, nou ava rebran deba lo ladres Prezidan lo Leta Lanasyon, me selman avan, mon ti zis anvi adres en pti keksoz.

I annan - letan nou'n koze avan i annan enterven an ki'n mansyon sa mo *Alzheimers* e mon zis anvi nou mazin, parey nou'n dir nou anvi montre ki nou en Lasanble responsab, e letan nou pe servi nou *right of freedom of speech* e nou privez konman bann *Members* pour nou mazin ki *Alzheimers* i aktyelman en keksoz ki afekte dimoun dan en fason vreman, vreman serye.

E pour nou pa fer li dan en fason kot nou pe montre petet ki nou pa rekonnet sa. Mon pa krwar ki bann Manm

in fer li dan sa fason, me selman si nou pou servi sa bann non ankor, mazin sa. So nou *next* enterven an se Onorab Gill.

HON CHURCHILL GILL

Mersi Madanm Speaker. Bonn apre midi tou Manm e tou dimoun ki pe ekout Lasanble, espesyalman zabitan Baie Ste Anne e tou Seselwa.

Madanm Speaker, i tre kler pour tou Seselwa ki tou sa bann Manm *LDS* in ganny byen andoktrinen pou koz lalang avek sa pep Seselwa. Zot in menm *graduate* e zot in ganny doktora dan koz lalang. Nou lo sa kote latib nou pa pou perdi nou letan pou eksplik zot pou *trust the process*, aköz tou fason zot pa pou ganny en konbran.

Madanm Speaker, nou pa ekspekte en group politisyen ki'n *fail* sa pep, konbran vre fason pou fer marse en pei. Tou fason zot pou war rezilta *trust the process* an mezir Sesel i bouz lo sa lot nivo anba direksyon Prezidan Patrick Herminie.

Madanm Speaker, zot pa konnen ki tou pei o monn i annan sa ki nou apel *foreign policy* oubyen diplomasi enternasyonal ki kree lespas pour diskisyon bilateral e multilateral pour benefis sa bann pei respektif.

Napa okenn neseseite ki Prezidan Herminie pou bezwen vann oubyen ofer nou souvrennte an retour pour en donasyon oubyen en sipor avek pei zanmi. Les Prezidan Herminie travay.

(APPLAUSE)

HON CHURCHILL GILL

Madanm Speaker, i annan en gran diferans a en diskour SONA fer par Wavel ki pran 2ertan ki ti napa naryen pour pep Seselwa ladan. An rezilta, pep Seselwa in met li deor. Silvouple aret plenmyen. Les Prezidan Herminie travay!

(APPLAUSE)

HON CHURCHILL GILL

Kontrerman, sa 45 minit SONA Prezidan Patrick Herminie ti'n ranpli avek bokou keksoz pour tou pep Seselwa. Konteni byen presi ki konte, non pa grander *speech* SONA. Se sa gran diferans ant *United Seychelles* e *LDS*.

Madanm Speaker, Manm *LDS* zot dir ki zot pou bezwen *hold* Prezidan Herminie *accountable*. Akoz zot pa ti *hold* Wavel *accountable* ler i ti ganny lalis *perpetrators* dan Rapor *TRNUC* e i pa ti zanmen pibliye ziska ler i ti kit *State House*, pourtan zot ti annan mazorite dan Lasanble Nasyonal? Lekel dapre zot dan

Sesel ozordi ki pou krwar dan zot konsernan *accountability*?

Mr Speaker, sa kantite – Madanm Speaker, sa kantite keksoz ki Manm lot kote lataz zot in dir zot in fer dan sa pei, akoz ki pep Seselwa in met zot dan Lopozisyon? Zot pa ankor oule reponn sa kestyon ki tre fermal pour zot. Seselwa pou kit zot dan Lopozisyon pour ankor en kantite lannen avek sa ta lalang ki zot kontinyen pe koz ek sa pep. Zot pou bezwen tenir lanmenm.

La Grand Anse Praslin Onorab Alvin Grandcourt in fini pran kontrol.

(APPLAUSE)

HON CHURCHILL GILL

Sa SONA delivre par Prezidan Patrick Herminie Mardi le 27 Zanvyè 2026 ti enn ki ti tre kler e enn ki'n enspir bokou Seselwa. Enn ki'n reflekte vizyon kler, disiplin e kapasite en zonm, ki san okenn dout i tre konpetan e i kapab diriz Sesel ver sa lot nivo. Sa ladres pa ti zis en revè, me enn plen e byen elabore e tre stratejik pour gran transformasyon nou pei Sesel.

Madanm Speaker, mon tre fyèr ki ozordi Sesel in finalman ganny en nouvo administrasyon ki meyer pour Sesel. Mon tre fyèr sa bon direksyon ki nou nasyon pe ale. Fyèr pour vre progès ki

Sesel pe eksperyans e tre fyer pou rekonnèt sa komitman solid ki Prezidan Patrick Herminie avek son *Cabinet* pe fer pou deservi sa pep parey in promet dilon kanpanny *United Seychelles*. Kontrerman avek Ladministrasyon LDS kot plizyer promes ti ganny fer avek pep Seselwa avan eleksyon 2020 ki pa'n zanmen ganny delivre, e Seselwa in montre Ladministrasyon LDS ki a lafen dizour tou pouvwar i reste dan lanmen Seselwa. E se Seselwa ki'n finalman deside ki direksyon son pei pou ale.

Prezidan Patrick Herminie pa'n zanmen krwar dan bann retorik ki pa fer sans, parey nou bann koleg lo lot kote latab pe fer depi Mardi. Bann retorik napa okenn sibstans, me plito en litani plennyen dan nou Lasanble parey bann pti baba lo nat.

Prezidan Herminie in plito krwar dan rezilta. Rezilta tanzib pour amelyorasyon lavi tou Seselwa ki zot kapab vwar e santi dan zot lavi toulezour. Se pour sa rezon ki Prezidan Herminie in vin avek en plan ki fokaliz lo bann size ki pli enpakte ki pou adres bezwen limedya tou fanmir Seselwa.

In osi asir Seselwa "*The Creole Dream*", vizyon en nasyon kot linite i nou lafors, dinyite i en fason viv e lazistis

i en realite toulezour. Se pour sa rezon ki nou bezwen "*trust the process!*".

(APPLAUSE)

HON CHURCHILL GILL

Madanm Speaker, i kler dan lespri Prezidan Herminie kote i anvi nasyon Seselwa i ale. Laprev i la dan nou manifesto ek son kontra sosyal 100 zour pour tou Lepep Seselwa, kot son *delivery rate* in tre enpresyonnen. En keksoz ki tou Seselwa i agree avek. E pour sa rezon ki Seselwa in elekte Prezidan Herminie pou diriz nou pei Sesel.

Madanm Speaker, Manm LDS napa okenn lezitimite pou vin dir nou ki mannyer sa pei i devret ganny fer marse. Zot rikord in prouv pour li menm zero konpetans, zero kapasite *delivery*, zero savwar fer pou *run* en pei, zero konsyans lenportans ler ou fer promes avek en pep.

Ou bezwen delivre. Zero kapasite politik pou retenir ladministrasyon e zero kapasite pou mentenir mazorite absolli dan Lasanble Nasyonal Sesel.

E i lo rikord atraver rezilta eleksyon ki Ladministrasyon LDS ek son mazorite absolli dan Lasanble in en parti ki'n pli dezapwentan ki'n deza ganny elekte isi Sesel.

Sel keksoz ki zot annan pou fer se aprann avek Prezidan Herminie ki mannyer en pei i ganny *run* aköz zot in *fail* sa pep *big time!* E sa i rezon ki zot dan Lopozisyon ozordi e zot pou reste lanmenm dan Lopozisyon aköz zot nivo konpetans i zis pa alaoter.

Madanm Speaker, *Leader* Lopozisyon in vin dir nou ki *United Seychelles* in ganny pouvwar aköz bann siporter ki pa kontan Wavel. Kestyon se aköz zot pa kontan Wavel? Sa aköz *Leader* Lopozisyon pa dir nou. *Leader* Lopozisyon fodre i pa bliye ki mannyer *LDS* ti ganny pouvwar an 2020. Se pa aköz zot ti for koman en parti, me aköz sipor defen Ton Pat, menm si apre zot ti tray li. *Leader* Lopozisyon, ou pa dir Seselwa sa. Sa traizon ki zot ti fer Ton Pat san ki zot ti realize ti kler ki *LDS* ti pou perdi pouvwar, pep Seselwa in vot zot deor.

Mon bann koleg lo lot kote latap, les *US* travay, les Prezidan Herminie travay ek son lekip. Les li delivre pour pep Seselwa.

Madanm Speaker, ler zot pe plennyen parey en pti baba lo nat, Prezidan Herminie pe delivre pour sa pep e son kapasite i tre aparan parmi popilasyon Seselwa. Koze i bokou la deor.

Apard ki nou manifesto ki ti ganny prezante avek pep Seselwa, Prezidan Patrick Herminie ti osi prezant en kontra sosyal 100 zour ki deswit koman i ti pran lofis i ti konmans delivre reentrodiksyon *long service allowance*, pas Lalwa pour trezyenm mwan saler plen, benefis gratwite pour ogmante baze lo lakantite lannen travay, etidyan sorti Praslin ek La Digue pou ganny en *one-off* sipor finansyel ler zot desann Mahe pou kontiny zot letid.

Lalwa pou reentrodwir *URS* in fini anmenn dan Lasanble par Minister Lanplwa pour deliberasyon e laprovasyon. Departman pour Lapovrete in ganny reentrodwir. Bidze pour reparasyon lakaz pou ganny double. Rediksyon dan laz pansyon in fini sorti 65an e in desann 63an. Bann dimoun ki kalifye in fini konmans ganny peye.

Se lavi pour soutenab – sa *levy* pour soustenabilite lanvironnman lo bann pti letablisman peye par kliyan in fini ganny tire. Ogmantasyon lo peyman sekirite sosyal in fini pran lefe, bann dimoun in fini konmans ganny peye depi fen mwan Zanyve.

Gouvernman in sekiriz *share* signifikan dan *Nouvobanq* e bann *dividend* pou ganny servi pou soutenir Fon Pansyon

Sesel. Zot ti pe rode ki mannyer pou ganny larzan pou soutenir Fon Pansyon. La zot larepons; Prezidan Patrick Herminie in rod solisyon, *"Trust the process!"*

(APPLAUSE)

HON CHURCHILL GILL

Stop Notice in fini anfors pou aret konstriksyon lo proze Assomption. Prezidan in fini anons letablisman sa nouvo *Commission of Enquiry* e zot in fini konmans zot travay ki pe ganny dirize par *former Chief Justice* Mathilda Twomey. En madanm tre konpetan pour en tel responsabilite.

The Seychelles News Agency in fini ganny reetabli pou siport akse ek lenformasyon. Lekel ki ti aboli *News Agency*? Prezan zot vin koz nou akse pour lenformasyon.

Madanm Speaker, *Leader* Lopozisyon ki ti *LGB 4* mwan pase ti anmenn amannman Lalwa pour *spouse* pa enkli dan Lalwa deklar zot *asset*.

La ozordi i vin *dir* nou en lot langaz ki Prezidan ek son *spouse* zot bezwen deklar zot *asset* e sa i devret vin en dokiman piblik.

Be Onorab *Leader* Lopozisyon, aköz ou pa ti fer sa ler ou ti anmenn Lamannman Lalwa

Declaration of Asset anba Gouvernman *LDS*?

Eski menm apre ki ou'n retourn dan Lopozisyon ou le sey anbet sa pep avek bann lenformasyon ki pa korek zot pa ankor konpran e aksepte ki Seselwa in met zot dan zot plas? Aprezan reste dan zot *lane*, les *US* travay!

Madanm Speaker, ler Prezidan Herminie in koz lo pou fer lenvestigasyon dan *CCCL*, *Leader* Lopozisyon i dir i pe rod Wavel. Onorab Henrie osi i annan konsern avek sa.

Madanm Speaker, si Wavel ti *come clean*, i ti fer lenvestigasyon endepandan parey pep Seselwa e zabitan Cascade ti'n demande, ti pou napa nesesite pour Ladministrasyon *United Seychelles* fer okenn lenvestigasyon. Prezidan Patrick Herminie pe bezwen rod laverite. In donn Seselwa son parol e i bezwen delivre lo la.

Zot dan Lopozisyon zot devret pe eksplik Seselwa, enkli zabitan Cascade aköz ki Wavel in refize fer sa lenvestigasyon endepandan. Lenvestigasyon dan ka prizon kot fanmir dimoun in perdi zot lavi san okenn leksplikasyon kler.

Si Wavel ti *come clean*, lenvestigasyon endepandan ti ganny fer, fanmir sa bann dimoun ti a kapab konnen ki

ti arive kot prizon, lekel ki ti donn lord, ti pou napa lenvestigasyon ozordi.

Lenvestigasyon dan aktivite kriminel par sa group Tonton Makout pou konmanse tre byento. Seselwa i a rapel sa bann zenn garson ki ti ganny peze ater e fizi ti ganny mete lo zot. Si Wavel ti *come clean*, pran aksyon nesese kot ti fodre, ankor ti napa neseseite pour en tel lenvestigasyon.

Madanm Speaker, a sa pwenn mon le met lo rikord pour tou Seselwa mazin en ki tou sa bann lensidan ki anba envestigasyon, tou in arive anba ladministrasyon dirize par Wavel Ramkalawan.

Kestyon, eski vremen son lanmen i prop? Rezilta sa lenvestigasyon i a kapab etabli sa pour tou pep Seselwa konnen.

Madanm Speaker, si Wavel ti *come clean* lo size *Travizory* kot Lotorite Taks Sesel pa'n kapab anmas en sonm R65milyon ti pou napa neseseite pou annan lenvestigasyon. Seselwa i anvi konn laverite e Prezidan Patrick Herminie in promet pou rod laverite e i pe fer sir ki Seselwa i a finalman konn vre laverite lo tou sa bann size.

Report TRNUC ki ti ganny fer e soumet avek Ladministrasyon LDS, ki nou'n vwar? En seri bat latet, fer komite isi, komite laba pou

travay lo *closure* ek konpansasyon. Kan sa ler Ladministrasyon LDS ti napa okenn lentansyon pou fer naryen pou sa bann dimoun.

I ras ker pour en dirizan zwe lo lemosyon son pep koumsa apre kit zot ater. E pa drol si Seselwa in vot zot deor e met zot kot zot ete ozordi. Sanmenm sa ki nou apel bate, rande i fermal.

Madanm Speaker, dan bann plizyer konversasyon ki mon'n fer ek mon tim travay dan distrik Baie Ste Anne, nou avek zabitan pandan kanpany, kekyon ki zot ti demande se ki vremen Ladministrasyon LDS ti anvi fer avek sa pep ler zot ti antre dan ladministrasyon?

Ler zot koup tou lasistans sosyal, ogmantasyon laz pansyon, redwir trezyennm mwan saler atraver Lalwa, koup *long service allowance*, aboli URS, e bokou lezot domaz ankor lo sa pep.

Konklizyon ki zabitan ti tire dan sa bann diskisyon se sa bann dimoun ti le trangle sa pep, detri zot fanmir, fer zot lavi difisil e kantmenm zot koze Ladministrasyon LDS, Manm Lasanble LDS ti sourd lo tou Seselwa. Kontrerman avek Prezidan Herminie pour lamazorite e non pa zis serten, i pa zis en slogan, me sa i en prensip ki Prezidan Herminie

ek son *Cabinet* i baz son bann desizyon enportan lo la.

Madanm Speaker, dan son laplikasyon i vedir ki dimoun dan lakour i bezwen santi sa progre e ki bann sistenm i bezwen servi dimoun e loportinite i bezwen ganny partaze e non pa ganny zouir par zis en minorite, me en prosperite komen.

Se sa prosperite partaze. Se sa kalite Gouvernman ki Ladministrasyon Prezidan Patrick Herminie i le batir kot tou Seselwa i benefisye. Vizyon Prezidan Herminie kot i konsern lozman i tre elabore. Kot i pe pran kont tou kours Seselwa ki bezwen en lakaz.

Enn, i pe al fer plis lakaz, i pou osi fer konblaz, kree plis lespas pou kapab donn plis Seselwa en lakaz e kree kondisyon pour lagrandisman ekonomik lonterm. Sa en vre Prezidan ki annan en vizyon.

Dan distrik Baie Ste Anne pandan sa dernyen 5an ki *LDS* in o pouvwar, napa okenn lakaz ki'n ganny fer. Zabitan Baie Ste Anne in ganny kit ater konpletman.

Mon oule enform tou zabitan Baie Ste Anne ki'n fer zot laplikasyon e zot ti'n ganny kit ater, vizit in fini ganny fer depi konmansman lannen lo later *Landbank* Salazi, Fond Azor, dan Kan Per, Marie-Jeanne 2, enkli pti lavil, pour sa bann lakaz ek later i a

kapab bouze pour bann dimoun ki'n kalifye pou ganny zot later ek lakaz ek zot fanmir.

Madanm Speaker, Onorab Tirant fodre i *focus* lo rod plis dimoun Glacis pour prosen Konvansyon *LDS*, aköz ti napa preski ditou dimoun sorti Glacis dan zot dernyen konvansyon. I annan ase lokipasyon dan distrik Glacis pour ou dil avek.

Pour ou lenformasyon, sa Por Ero ki ou ti pe fer referans avek ti deza la ler *LDS* ti pran ladministrasyon. Sa por ti ganny fer par Ladministrasyon Prezidan Danny Faure! Sel keksoz ki *LDS* in fer e kit en fardo avek zabitan e touris ki frekant sa lasose se ti reviz sa plan orizinal, fer en batiman lo sa lasose, i deza napa ase plas, e en desarz tre enkonfortab ki pe *overflow* preski toulezour. Si pour ou sa i en ladministrasyon enkonpetan, i pa drol alor ki zot pe asiz kot zot ete.

Madanm Speaker, si ozordi dan Sesel sa fleo drog i ankor pe ronz nou sosyete, se aköz bann desizyon mal kalkile e imatir pran par ladministrasyon avan ki'n detrir travay ki ti'n konmanse pou ede adres sa problemn drog dan en fason konpreansiv. Kestyon se aköz ki *ADPAR* ti bezwen *repeal*? Ki vre rezon par deryer?

Sa ki nou'n kapab konstate se tou sa bann desizyon iresponsab par ansyen ladministrasyon in fer nou konman en pei retourn deryer dan sa lalit kont drog. Me nou pa perdi lespwar. Nouvo ladministrasyon anba *leadership* Prezidan Patrick Herminie in fini konmans demars pou re ouver sa dosye pour diskisyon lo konstriksyon sa vilaz reabilitasyon.

Madanm Speaker, sa deba lo Leta Lanasyon, en pwen ki'n sorti tre for par Lopoziyon se sa provizyon bidzeter pour lasistans spesyal. Pour nou bann dimoun vilnerab ki R1.6bilyon in ganny bidzete. Pour zot, akfer met sa kantite larzan dan Bidze pou siport nou bann dimoun vilnerab?

Madanm Speaker, i pa drol si Seselwa in vot zot deor dan ladministrasyon Sesel e vot zot konman en minorite dan Lopoziyon aköz zot pa enterese avek byennet sa pep. Me Prezidan Patrick Herminie in vwar e santi vilnerabilite nou bann dimoun. Se pour sa rezon ki in donn lenstriksyon pour sa provizyon bidzeter e i son komitman personnel ki i pa pou kit okenn Seselwa ni ater, ni deryer parey *LDS* ti fer ek Seselwa ler zot ti o pouvwar.

I aköz Ladministrasyon *LDS* in *fail*, zot pa ti vreman konnen ki zot pe fer.

Zot pa konnen ki dan tou pei o monn i annan en group dimoun ki vilnerab e i toultan annan en *safety net* pour sa group dimoun. Prezidan Patrick Herminie in fer tre kler dan son diskour *SONA* ki proteksyon sosyal i bezwen fer plis ki zis rezourd bann kriz. I bezwen protez dinyite, sipor bann fanmir ki deza dan lanplwa e ed dimoun pou re debout.

Madanm Speaker in dir ki deryer sak statistik i annan en zistwar imen. En paran ki ti pe sey fer 2 bout zwenn. En zanfann ki bezwen stabilite pou grandi e aprann. En dimoun aze ki pe rod son dinyite. Vwala vre rezon ki Prezidan Herminie pe ranforsi proteksyon sosyal, pour ki lasistans i ariv atan, i ganny delivre avek dinyite e i atase avek bann plan e ekspektasyon ki kler.

Prezidan in osi fer kler ki fodre tou dimoun ki kapab travay i bezwen travay. Nou pa kapab annan bann zonm e fanm ki ankor annan tou zot kouraz pou al travay pe asize dan lakour oubyen o bor semen toulezour. E la in donn nesans sa nouvo slogan; *"From welfare to workforce."*

Madanm Speaker, sa provizyon bidzeter pour proteksyon sosyal 1.6bilyon i byen merite e tre enportan pour souldazman nou bann fanmir vilnerab dan Sesel. Nou pa pou pran lord avek Manm Lopozisyon. Ki fason nou devret fer nou provizyon bidzeter pour nou bann frer e ser Seselwa vilnerab. Zot zis kalifye – zot pa kalifye pou donn nou okenn leson ki mannyer pou fer marse sa pei. Madanm Speaker, Prezidan in fer kler son langazman pou diversifye lekonomi Sesel pour ki prosperite Sesel pa depan lo zis en sekter. In koz lo linovasyon ek transformasyon *digital* konman en preparasyon pour zenn Seselwa kapab antre dan marse lanplwa modern. Ogmant prodiksyon sekirite alimanter e lenerzi renouvlab pou ede redwir lenpak dan levantyalite sok eksteryer. Pou fer bann demars neser pou redwi to lentere e fer li posibil pou antreprenner kapab agrandi zot biznes, oubyen donn zot – konmans zot nouvo biznes, an rekonesan lenportans sa bann biznes konman parti moter lekonomi pou kree plis loportinite e rezilyans. Se lapros realis e i prioritiz stabilite san ki lobligasyon i ganny sakrifye.

Madanm Speaker, avan *COVID* bokou dimoun ti'n pran

loan pour zot biznes. Me ler *COVID* in tap Sesel bokou sa bann dimoun in vwar zot dan difikilte reel kot zot in vwar li tre difisil pou re pey zot *loan* vi ki mazorite sa bann biznes ti dan Lendistri Touris, menm si Labank Santral e serten Labank Komersyal ti aport serten souldazman, lentere lo bann *loans* ki zot ti pran avan *COVID* ti bezwen kontinyen ganny peye, san kont bann *loan* bann *principal* lo sa bann *loan* ki zot ti bezwen osi peye dan en klima sitan difisil. Se pour sa rezon ki Prezidan Patrick Herminie dan son lasazes in anons dan SONA ki en sonm 59milyon pou ganny servi pou *write-off* serten *loan* ki sa bann dimoun pe kontinyen eksperyans difikilte pou re pey sa bann *loan*.

Madanm Speaker, dezormen devlopman dan Sesel pou bezwen pe tous tou dimoun san leksepsyon. Bann dimoun ki pe rod en travay pou ganny sipor atraver antre dan en striktir byen programmen akse pour zanfan avek ledikasyon de kalite pou bezwen ekip zot lekor pour zot fitir koman bann bon sitwayen. Tou fanmir –

MADAM SPEAKER

Onorab, i reste ou ankor 2 minit.

HON CHURCHILL GILL

Pou ganny akse – akse avek servis lasante stab pou bezwen tou Seselwa. Nou bann dimoun aze pou viv dan dinyite e respe kominote dan tou 26 distrik dan Sesel santi proteze e ankouraze pou partisip dan devlopman zot prop kominote.

Nou dan *United Seychelles* nou konpran ki Prezidan Patrick Herminie in *earn the trust*. Se sa rezon ki nouvo ladministrasyon in kontinyen ranforsi bann lenstitisyon, amelyor latransparans, moderniz nivo *delivery* dan sekter piblik, asir rann kont lo tou nivo.

Madanm Speaker, pour konklizyon, SONA in prezant en vizyon tre for ki realizab, anbisye me tre solid. I dekrir kot nou ete, kot nou pe ale e ki mannyer nou pou ariv kot nou pe ale ansanm. Konman en siporter *United Seychelles* mon debout ferm deryer vizyon nou Prezidan ek son ladministrasyon.

E mon debout deryer tou Seselwa ki zot laspirasyon ek lespwar konfyans i lo nou pou kapab fer sir zot ganny tou sa ki zot merite atraver sa parti ki apel *United Seychelles*. Sa ki nou annan pou dir zot pep Seselwa se “*trust the process!*” Mersi.

(APPLAUSE)

MADAM SPEAKER

Onorab Arissol.

HON SANDY ARISSOL

Mersi Madanm Speaker. Bonn apre midi Madanm Speaker. Nou 2 *Leaders* dan Lasanble Nasyonal. Manm Lasanble Nasyonal, frer ek ser Seselwa.

Letan mon'n tann Parti US pe prezant senpati avek plizyer nou bann frer ek ser Seselwa, nou osi nou mazin zot dan lapriyer.

Be mon osi mon profite pou mazin tou nou bann frer ek ser Seselwa ki'n perdi zot lanplwa pandan sa 100 zour aköz zot lopinyon politik. Mon anvi swet zot kouraz dan tou zot demars konman nou bann frer avek ser.

Madanm Speaker, dapre listwar ki nou pa kapab efase, 2020 Sesel ti fer en sanzman ek Gouvernman san Ton Pat aköz i ti'n fini vann son nonm e i ti lo *stage* avek Danny Faure pe fer kanpanny e pe fer *PPB*.

Sa sanzman Gouvernman dirize par Wavel Ramkalawan. En eleksyon ki i ti *fair and free* kot tou Seselwa ti lib san lafreier e al egzers zot drwa konman bann voter.

Sesel ti ganny li en Prezidan Elekte swazir par son pep, kot nou ti annan en lekip 13 Minis ek bann Manm Lasanble Nasyonal. En lekip egzekitif ki ti konsantre dan

fer plis avek mwens. E ozordi zot in sorti byen fyer san lafreyer aköz zot in fer en travay nob.

E mon profite ozordi pour mwan dir zot mersi bokou pour sa travay ki zot in fer pour Sesel ek Seselwa.

(APPLAUSE)

HON SANDY ARISSOL

Sel difikilte se Ramkalawan in *set the bar* tro o pour nouvo Prezidan kapab sote lo tou nivo. Alor, zis zot plennyen e fer bann retorik parey Praslin i fer.

Mwens resours Leta ti ganny depanse. Larzan ti ganny byen zere. Lekonomi i retourn lo semen e disiplin fiskal. Nou ti bezwen lager ek *COVID* e reouver nou frontyer e asire ki tou kous nou popilasyon ti benefisye avek tou sa ki pei ti prodwi.

Nou ti balans depans Gouvernman lo nivo pei, distrik. E osi nou ti mazin nou bann etidyan ki ti pe etidye aletranze. E nou ti osi mazin nou bann dimoun malad ki ti bezwen ganny sans pou al sonnyen aletranze.

Moman ki pei ti fer byen ekonomikman dan zis 4an, larises ti reganny distribye egalman avek bann zabitan, ziska 17poursan logmantasyon.

En Gouvernman *LDS* ti reviz tou bann lasistans *welfare* e met en lord dan tou sa bann vol ki ti pase anba *US*. Ziska R1.8milyon ki ti'n arive anba kot lazans. Apre sa netwayaz ti annan en revizyon dan tou lasistans ki pa ti'n zanmen revize pour plis ki 10an anba *US*.

Mon a donn detrwa legzanp; *maternity*, *semi-orphan*, zanzan abandonnen, *foster care parent* ti sorti ziska R1500, pou arive ziska R25mil. Kestyon ki mon demande; eski sa i apel fo promes e i pa apel larzan dan pos?

Atraver sipor ki bann Manm Lasanble *LDS* ti donner atraver *vote* Bidze, proze ti demare. Lakaz, semen, lenfrastriktir, renovasyon, amelyorasyon e nouvo konstriksyon zis dan sa pti lespas letan. Fer plis avek mwens.

Bann Manm Lasanble *LDS* toultan ti angaze pou asiste zot zabitan dan tou fason zot ti kapab. Menm resours ti limite. Proze lakaz, nouvo Sant Lasante, nouvo bazar Anse Aux Pins. Proze lakaz, lagrandisman semen Curio Road e lagrandisman teren. E pour reparasyon proze *condo* Bel Air.

Proze *seawall*, renovasyon lakaz dimoun aze, re sirfas semen Au Cap. Proze

lakaz bazar pour ferme,
Semen *West Coast Project*,
Mini Sport Complex, nouvo
sirfas court basketball Anse
Boileau.

Proze 16-unit ti ed
zabitan Cascade pandan letan
dezas. 24-unit bazar. Proze e
reroofing ek refer travay
plonber lo 175 lakaz *prefab*
Perseverance.

Amelyorasyon bann pti
semen. Drenaz, lalimyer lo
laplenn e obor lans.
Konmansman 80-unit lakaz
Grand Anse, Mahe ki mon
kontan LDS in inisye, in
demande e in konmanse.

E Prezidan Herminie la ki
i ti'n UAE, in siny lagreman lo
lapar Prezidan Ramkalawan
ki'n fer sa demars pour nou
pei e distrik Grand Anse, Mahe
pou benefisye. E nou kontan
pour zot Madanm Speaker.

Alor mon profite pou dir
mersi tou Manm Lasanble
7enm Cohort pour zot
devosyon, lanmour, letan ki
zot in donner pour zot zabitan
ek zot distrik. I pa'n en luvraz
fasil, me zot in sey zot mye.
Mersi bokou ankore.

(APPLAUSE)

HON SANDY ARISSOL

E mon profite pour mwan
demann avek bann MNA US
ki'n ganny elekte pou silvouple
reponn zot telefonn letan zot
dimoun i *call* zot. E silvouple,

aret abandonn zot paran e
donn sipor zot fanmir.

(APPLAUSE)

HON SANDY ARISSOL

Sesel ti sorti lo bann lalis
nwar. Touris kas rikord. Deviz
etranzer pran son plas
konfortab lo marse ekonomik.
E nou pti pei i ankore enn fwa
resevwar tou laplodisman e
sipor enternasyonal.

E pourtan, pou note, se
LDS ki ti sov *Air Seychelles*.
Fodre pa nou bliye. Sete LDS
ki ti sov *Air Seychelles*. Sa osi
pa pou kapab ganny efase. Sa
sete vre leta nou pti Sesel ki
nou pa pou kapab efase son
listwar Madanm Speaker.

Pli enportan, person pa
ti ganny menase, menm ganny
pouse dan zot travay, menm
zot lopinyon ti diferan. Mon a
donn detrw legzanp;

Nou annan msye Onorab
Lemiel ki travay SFRSA. Nou
annan madanm Rocky Uranie
ki la dan Lasanble Nasyonal.
Nou annan osi madanm
Sebastien Pillay ki ti dan
ledikasyon Madanm Speaker.
I enportan pou fer resorti sa.
Menm zot lopinyon ti diferan,
me nou ti donn sans tou
Seselwa. Nou ti donn sans tou
Seselwa Onorab Lemiel.
Ekoute, ou'n koze ou. Aret
nerve ou. *Relax* en pe.)

Nou ti donn sans tou
Seselwa Madanm Speaker,

parey nou ti donn Onorab Lemiel son msye sans travay dan nou Gouvernman. Zis parey nou ti donn Denise Clarisse ki Onorab Gabriel ti pe demande Madanm Speaker.

Zis parey nou ti donn li menm li Onorab Gabriel son sans letan i ti ankor *SNP* e i ti kas minot bann *NDEA* sa lepok. E nou ti resevwar li Madanm Speaker, lebra ouver konman en frer Seselwa, san rode kwa ki i ti'n benefisye. E nou ti diriz li dan son bann demars konman en frer ek ser Seselwa, san rode ki son lopinyon. I ti ankor *SNP* sa letan.

Tou travayer ti ganny loportinite. Ti ganny mezire lo merit e devosyon. Promosyon bann endividi dan diferan fil travay pou *assist* abilite ek progre ki *LDS* ti krwar ladan. Stabilite.

Wi Madanm Speaker, se la ki nou ti entersepte en bonm ki ti pou ekspoz nouvo *MNA* Lepathy ek son fanmir letan i ti pe *sit back* e *relax* kot li e papa disik ti la. E mon dir mersi dan son plas Madanm Speaker.

(APPLAUSE)

HON SANDY ARISSOL

Me letan sa Gouvernman elekte par son pep ti pe travay, ti annan en pti group dimoun

ki ti fristre, aköz zot ti nepli ganny privez. Nepli manz *State House*. Voyaz lo kont piblik. Ganny larzan Lepep Seselwa pour zot depanse. Monte desann lo bann zil. Ganny pli gran gro kare later san swiv prosedir. Lekel zot sa pti group dimoun?

Tou biznes fodre zot annan par ladan. Zot ti annan *villa* aletranze e viv en lavi imakile avek bann led finansyel ki nou ti gannyen avek bann pei zanmen, parey nou fame 50milyon Dolar ki Onorab Pillay ti pou al rode pour nou.

La i son sans pour li al rod nou 50milyon Dolar, aköz i pli pre avek. Pran *loan* pa peye, parey nou'n tande dan sa Lasanble Nasyonal. Kree lakonpannyen par zot menm e fer dalon reprezant zot e pey zot lekor atraver kontra Gouvernman, parey ti arive isi dan Lasanble Nasyonal.

Avek la mon'n aprann *State House* zot pe fer egzaktaman parey. Apre ki zot ti fer? Alim dife dan bann dokiman, bril tou laprev. Sanmenm sa Gouvernman ki'n faid nou pei en fwa, de fwa. E la Seselwa in donn zot sans pou faid nou pei ankor Madanm Speaker.

Sa sete vre leta nou pti Sesel anba *US*. Lekel sa pti group dimoun fristre? Zot tou zot ti dan *Gala Wosita* ki ti fer

Eden Island avek larzan Bidze *First Lady*.

Sa i sa group *beavers* ki Onorab Lemiel ti pe koz lo la, pe noye dan zot rises e pe mazine si zabitan Au Cap in *vote* pour zot. Sanmenm sa Sesel pour tou son milyonner Onorab Aglae.

Letan nou ti pe travay pour sa pep, ki nou ti eksperyanse nou? Zot ti pe sey touf nou zanf an ek *gas*. Fouy koksiss. Sey met bonm pou eksploz zabitan Grand Anse Mahe ek son *MNA*.

Met dife La Misère. Met dife dan bis. Met dife dan lasenn ton. Fer dezord dan Katedral. Ekrir bann senbol ek lekritir dyabolik en pe partou. Sanmenm sa ki apel en group bandi, Onorab Uranie.

(APPLAUSE)

HON SANDY ARISSOL

Sa i bann aksyon ki devret ganny *investigate* atraver bann Komisyon. Me aköz ou pa tann koz lo la? Ki i arive ek sa bann aksyon? Eski i tro pre? I tro lwen? Tousala ti pou zis destabiliz nou pei.

Madanm Speaker, frer ek ser Seselwa, ki nou ti vwar Septanm 2025? Eleksyon ti bezwen pran en dezyenm tournir. Pour premye fwa dan listwar Sesel nou'n ganny en Prezidan *second round* ki'n bezwen ganny sipor lezot

sipoter parti politik ki'n vann zot prop sipoter ek zot lekor.

Ozordi i annan plizyer zot ki'n ganny pozisyon dan Gouvernman. I annan ki'n ganny 180mil. 750mil. 80mil. Tikt avyon. *Pocket money*, pour zot vann zot *vote*. E pa bliy drog ki ti ganny servi pou andoy nou lazenes parey Onorab Aglae in *remind* nou Madanm Speaker.

(APPLAUSE)

HON SANDY ARISSOL

Pour premye fwa listwar politik – (Onorab Lemiel. Ekoute Onorab Lemiel!) Pour premye fwa dan listwar politik, Prezidan *second round* in ganny sipor lenterferans lezot pei zanmi pour li ganny eleksyon.

La, la aköz nou dan Lopoziyon ozordi e zot, zot dan Gouvernman. Sa vre leta nou nasyon anba Patrick Herminie. Sa i fer zot vin en parti ki for. Sa ou a dir mwan!

Letan lanmwatye popilasyon pa'n *vote* pour zot e in ganny sipor bann pei etranze ki'n enterfer dan nou eleksyon, zot in ganny ziska plis ki R20milyon pour zot aste voter.

Sa ki'n ganny ziska 350mil par fanmir. 25mil. 45mil Onorab Lemiel in gannyan Anse Royale. 185mil. 90mil. La zot larzan in fini,

prezan zot koz tousel parey Onorab Lemiel. *US* i apel li en parti ki for e pou mor o pouvwar.

La i annan etranze ki'n antre dan nou pei pour zot *hack* nou sistenm *internet*. Rode lekel bann *fake profile* ki pe maltret Prezidan Herminie.

MADAM SPEAKER

Onorab Arissol?

HON SANDY ARISSOL

E ekout tou telefonn.

MADAM SPEAKER

Onorab Arissol, en moman. Onorab Lemiel?

HON SYLVANNE LEMIEL

Mersi Madanm Speaker. Madanm Speaker, mon ti a kontan Onorab i *substantiate* kote mon ti ganny sa R45mil? Anmenn son laprev devan Lasanble. Kote mon ti ganny sa R45mil pour eleksyon?

(Interruption)

HON SYLVANNE LEMIEL

Silvouple. Akoz nou pa kapab zis vin dan Lasanble. Nou'n ganny en sans koze pour nou vin fer en *speech* ki nou pou dir sa ki nou anvi dir lo nou kanmarad, akoz sa i pa pe sorti byen deor. Mon ti pou kontan i anmenn son laprev kote mon ti ganny R45mil

pour eleksyon. Mersi Madanm Speaker.

(Interruption)

MADAM SPEAKER

Onorab Arissol.

HON SANDY ARISSOL

Mersi Madanm Speaker. Dan mon *speech* Madanm Speaker, lo mon dezyenm laliny mon ti pe dir bann sif ki bann dimoun in gannye dan distrik.

Onorab Lemiel depi mon'n konmans koze, ou konman Speaker ou'n les li kontinyelman enteronp mwan. Alor letan mon'n lir mon laliny, son non in pas dan 45mil. Si i pa'n ganny 45mil, i bezwen reste trankil e les mwan fer mon *speech*...

(APPLAUSE)

MADAM SPEAKER

Proceed Onorab.

HON SANDY ARISSOL

...parey in fer pour li. Mersi bokou.

MADAM SPEAKER

Proceed.

HON SANDY ARISSOL

Sa sete vre leta nou pei ki siporter *US* ki'n vote. E sanmenm sa Madanm Speaker ki ozordi sa premye zour zot ti dir zot pou fer sir ki

tou *smartphone* pa pou ganny servi dan bann biro Gouvernman, in ganny revoke. Parske zot in anmenn en group pou kapab antre dan sistenm bann zenn pou gete lekel zot e ki zot mesaz zot pe anvoye lo telefonn.

Pour premye fwa dan listwar nou pei nou ti vwar bann zes grigri ek sorselri dan nou pti pei. Etranze ganny entersepte lo erport avek tou kalite lapay. Pa mwan ki ti entersepte zot, *Customs* avek *Immigration Officer*.

Pour premye fwa dan nou pei nou ti war bann endividi pe evoke lo bann latonm. Ki zot ti pe fer? Zot ti pe lev lanmor? Pa bliy bann ki ti fouy lekor mor simityer. Eski tou sa, ti bann zes eleksyon? Se sa leta ki nou anvi nou pei i pran anba *US*, Madanm Speaker?

Fanmir ki'n ganny *fridge*, *deep*, *cooker*, transpor, bato, masin bato, tiket avyon, loto, *pocket money*. Sa ki'n ganny Dolar, *Euro* zis pour zot *vote* pour *US*. E alor, zot in vin o pouvwar ek en mazorite dan Manm Lasanble atraver frod, aste *vote*, anbet dimoun ek fo promes.

E ozordi nou annan nou dan Lasanble Nasyonal en mazorite *US* dirize par Onorab Lemiel. En group fay ki pa konn koze, pa kapab prezante, pa kapab delivre. Ni lir *Bill*. Zis zot lir sa ki zot in gannyen

Madanm Speaker. Apre zot apel zot lekor en lekip ki for, Madanm Speaker.

(Interruption)

HON SANDY ARISSOL

Sa vre Lasanble ki *US* ti anvi, Madanm Speaker. Se sa vre leta nou nasyon ozordi. Sa ki'n ganny pli gro poursantaz, li i koz pli pti gin letan Madanm Speaker.

E zot *Leader* ki'n deklar tou Seselwa konman bann *beavers* i dir zot pa bezwen personn pou travay ek zot. Nou ti fer Sesel pour tou son zanfan. Zot in fer Sesel vin pour tou bann *beavers* ki parey zot menm. E nou'n ganny dir demerd nou konman bann Seselwa ki pa bann *beavers* par Onorab Uranie.

Patrick Herminie konman Prezidan *second round*, li i oule nou *trust son process*. En Manm i dir, *stress the process*. En lot i dir pa perdi lespwar. Aktivis i pas dan distrik e pe demann dimoun ki mannyer *speech* dokter ti ete? Akoz zot pe demann sa?

Akoz zot pa krwar preskripsyon ki dokter in donneren? *For the few not the many*. Zot pa *trust* zot prop *process*? Ki *process* sa Madanm Speaker?

Zot in vann Sesel pour li kapab fer lakaz pour zabitan Au Cap. Me li i reste dan *villa* 106 *Eden Island*, ki kout pei plis ki R100mil. Pour en dimoun ki ti dir i pe viv *ok*, i pa fer ekstravagans. E i ti annan zis R5 dan son pos avan eleksyon. E i oule nou *trust* son *process*. Alor konmdir Onorab Gabriel, annou pa *trust*. Be annou *stress the process*.

Letan in apwent plizyer Minis e Gouvernman – e Gouvernman ki annan plis *advisor*. Selman zot fer parey kanmaron, konmdir Onorab Wallace Cosgrow. E personn pa *advise* li. Zis zot riy li.

Lapolis anba son ladministrasyon i dir pa zwe lanmizik for dan loto. *Few moments later*, i *ok* pou zwe. Lapolis si ou fer aksidan, pa *call* lapolis. Sakenn pran en mayos. *Few moments later*, *call* lapolis pour okenn aksidan.

Apwent Direkter SIS san konsiltasyon. Personn pa konsey li, me plito zot riy li. Apre zot bezwen retir lapwentman e i oule nou *trust* son *process*. Zot oule ki LDS i asiz avek bann Manm US ki'n pran zot desizyon zot tousel trankilman dan fernwar. Prezan ler pou korize, zot anvi nou asiz avek zot. Soz zot soz zot soz zot menm, Onorab Audrey!

Tou dimoun aze pou ganny R10mil. La in vin 800. En bann la in gannyen. Lot pa'n gannyen. En bann in ganny zis 200. Lot in ganny 150. En bann zero lo 100. Sa *process* ki zot oule nou *trust*?

Eski la US zot in pran kont ki dimoun aze pou kontinyen mizer? Ti annan en madanm ti dir poudir zot pe manz margoiz anmer anba LDS. Be la anba US, margoiz i nepli anmer? In vin dou? I ava enportan pour nou konnen.

Bann zenn ti pou vin milyonner. La zot pou ganny resikle dan URS. Sa *process* ki zot oule nou *trust*? Sa ki nou zenn Seselwa ti vote?

Kwa sa URS? Al sers zanfan Minis. Koup son zerb kot son lakour. Al rod son apwentman. Al sers son legitim ek son dipen kot STC.

E pa bliye, nou ti ganny dir dan sa menm Lasanble par en Manm Onorab zot pou bezwen netway bann *bin site*. Bann *bin site* ti prop ler ti annan URS. La mon mazine bann *bin site* pou reste prop, parske URS in retournen ankor!

(laughter)

HON SADY ARISSOL

Bann pti biznes ti ganny dir dan kanpanny zot pou ganny lasistans pou pey zot travayer. Oli sa lasistans bann biznes pe

rode? Zot in ganny anbete. E plizyer travayer Seselwa, spesyalman dan prive pa'n ganny zot trezyenm mwan saler plen.

Ler zot in sey *call* Lanplwa, personn pa reponn. Ler zot in sey *call* Onorab Pillay ki ti anmas tou *phone call* alors en zour, i nepli reponn.

Tousala bann bat latet pou ganny eleksyon. En dokter pe *enjoy* ek bann Arab byen lwen lo sa paspor biometrik ki Ramkalawan in fer pour tou Seselwa. Mon kontan pou war li ek bann Seselwa 3enm *Cohort*.

Seychelles Government Leadership Program. Sa menm zonm ki ti kritik 1er e 2enm *Cohort* Seselwa anba Ladministrasyon *LDS*, an di-z-an bann amater e bann enkonpetan. Vre leta nou Sesel anba Dokter Patrick Herminie.

Dokter pa ti pou bwar e partaz naryen ek bann Arab. La get li, in konfortab. Byen gayar e i pe manz *caviar*, prezan i dir nou *trust the process*.

La dan son 100 zour, konbyen fwa in vwayaze? Eski son Vis-Prezidan pre pran kont? Konbyen dimoun dan son delegasyon? Konbyen pe kout pei? Sa se vre leta 100 zour Patrick Herminie.

La ler nou pe reponn, i fek ariv Lenn kot in vann nou pei pou fer en Baz Militer, apre zot sey vin eksplike poudir en Baz *Coast Guard*. Konbyen dimoun ek Minis *staff* dan son delegasyon? Plis ki 20.

Konbyen in kout pei Madanm Speaker? Konbyen in arive tou sa vwayaz? E pou annan ankor. Ale Patrick! Sa i vre leta nou Sesel, Madanm Speaker. In dir nou i pou koup larzan palto. Be kan? Larzan palto in double, triple e Bidze in pet plafon.

La apard larzan ledan, palto, linet, seve. La zot menm *makeup State House* ozordi. Tou le 14 Minis pe servi loto lwe. R1500 par zour pour ki i fer R147mil tou le semenn.

Selman, napa larzan pou dimoun aze ganny son R10mil. 100mil Dolar pour *Sri Lanka*. Akoz ou a dir mwan? Tou Minis in kite reste dan zot lakaz, parey *chief*. Zot tou zot pe lwe lakaz pour plis ki R25mil par mwan, ki tonm R4.2milyon par lannen. Larzan pour *carer* napa selman? Akoz Madanm Speaker?

Nou ti kapab pey travayer zot *backpay* 13enm mwan saler 2020, 2021. *US* in ganny anbete. Me 100mil Dolar pour *Sri Lanka*, akoz? Ler pou ouver tiyo, i ti ganny eleksyon lo sa tiket. I dir ek *US* fodre zot leve. E la i dir bann

US; leve al travay. Pou napa *welfare* ankò in dir. Al travay.

Be mon ti krwar i en pese, oubyen i en lofans ler nou ti dir ek Seselwa byen for, al travay. Ki'n arive, tro bokou larzan pou peye? Sa madanm US ki ti dir ouver tiyo dan zot *rally* la, fodre in note. Eski in pran en *note* poudir *triple lock* lo tiyo in fini pran lefe?

LDS ti fer *statement*, US ti ofanse Madanm Speaker. Zot ti fer lamars zannimo sa letan mon rapel Grand Anse. Fer lamars *Teletubbies* kot Lorloz. Fer lamars bwat *Whiskey* e demann Seselwa pou fer dezord.

La in finalman aksepte ki wi, nou tou nou pou bezwen travay dan sa pei. Malerezman, in anbet bann siporter akòz zot ti pou ganny *taken care of* depi nesans ziska lanmò - Onorab Audrey ti *remind* nou dan sa menm Lasanble Nasyonal!

Savedir tou bann US ki'n ganny promet larzan pa pou gannnen. Ou pou bezwen leve al travay. Sa se vre leta nou Sesel.

In fer resorti ki i pou *write-off loan* kot DBS. Pour ki sa bann *loan*? Konbyen par kliyan? Ki kriter zot in servi? Lekel sa bann dimoun ki travay ki'n ganny fer zot in tonm lo sa sif 59milyon?

Eski labank in ganny konsilte? *Board* in zwenn pour

sa desizyon? Lasanble pou bezwen ganny bann lenformasyon. Sa se leta nou pei anba *SPPF* ki'n faid nou pei en fwa, de fwa. E la zot anvi fer li en trwazyenm fwa.

Akòz zot pa *write-off loan* tou bann Seselwa ki'n bezwen sanz zot twatir lakaz e peye par zot menm, e zot *loan* in triple. Kan sete kontrakter ki ti an defo kalite materyo konstriksyon sa letan, olye 100mil Dolar *Sri Lanka*.

Akòz zot pa ed sa bann fanmir avek zot *loan* Madanm Speaker? Eski Seselwa i rapel lekel ki ti pran sa bann *loan* e pa ti peye? Tou sa bann *loan* *SBFA* la kot dimoun mòr ti pe ganny *loan* la. Sanmenm sa bann *loan* ki'n ganny transfer kot DBS.

Alor, se *loan* la, pour bann zanmi ki'n ganny *write-off* la. *Loan* bann siporter pe ganny *write-off*. Ki lenpak i pou annan lo pei? Eski apre tou, nou tou nou pou bezwen re peye par laport deryer?

Lasanble Nasyonal pou bezwen ganny en bann lenformasyon nesese, parey nou ti gannnen pour *FA4JR*. Kontan pa kontan, nou pou kestyonn zot e nou pou ganny lenformasyon avek zot Madanm Speaker.

(APPLAUSE)

HON SANDY ARISSOL

La tou proze nek *tender*, netwayaz ki ti dan staz avanse in ganny met lo *hold*. *Bid validity* fini ekspire. US i oule kennsel e refer. Akoz Madanm Speaker?

Akoz enn de zot bann siporter pa ti *follow the correct tender process* e zot in ganny diskalifye. E la zot pe oule re antre. Zot in tarde ekspre pou ganny en rezon pou refer zot e fer faver e *bend the law* e tou bann *bidders* onnet zot mekontantman avek sa kalite pratik. Oli respe pour nou bann profesyonnel?

Tender Board, eski nou pou viv lo frod ek faver anba US ankor? Sanmenm sa parti ki'n faid nou pei en fwa, de fwa. E zot anvi fer li en trwazyenm fwa. Sa vre leta nou pei Madanm Speaker.

Parey tou laplikasyon lakaz i *on hold* e tou MNA pe kriye - ek tou bann MNA US pe kriy ek zot siporter "Fer ou laplikasyon, pour ki tou proze lakaz zot bann aktivis i ava gannnen. Menm si i pa peye.

Eski sa ki nou anvi anba nou nouvo en Ladministrasyon? Sa menm Ladministrasyon ki'n *write-off loan* lakaz e in faid nou pei en fwa, de fwa. E zot anvi fer li en trwazyenm fwa.

Nouvo lopital ki nou'n tann koz lo la. En lopital ki zot pa ti krwar ladan zot. Konbyen lasanm e lili nou pe koze? Ki

kalite spesyalizasyon? Ki kalite donasyon nou'n gannnen? Ki zot pe ekspekte an retour? Lekel ki pou *run* ek *manage* sa lopital la? Les Lepep konnen ki zot pe kasyet. Apre zot oule nou *trust the process*. 100mil Dolar Sri Lanka. Akoz? Pour ki rezon?

Pa bliy restriktirasyon dan Minister Lsante. Eski bann profesyonnel in ganny konsilte? Konbyen zot ki pou ganny met deur? Tousala i bann lenformasyon ki sa pep ki'n *vote* pour zot i bezwen konnen. Sa i vre leta nou Sesel Madanm Speaker.

Ozordi, se Prezidan ki deside lekel ki pou al trete aletranze. Pa *Board* mon ganny dir. Pri bis i en size ki Seselwa pe koz lo la. Kestyon ki monte se eski SPTC pou rantab, la ki zot ti deza dan en gro problem SPTC?

Eski Gouvernman pou met plis sibvansyon lo SPTC? Be SPTC pe bezwen ferm son lofis Anse Aux Pins pou lwe avek en lakonpannyen prive, zisteman pour zot ganny larzan.

Eski SPTC in ganny konsilte? Konbyen travayer ki pou bezwen perdi zot bouse manze zis aköz zot in *vote* pour US? Eski se sa Gouvernman *second round* zot konnen vreman ki zot pe fer? Nou ava espere e nou ava tande.

Se sa leta nou Sesel Madanm Speaker, anba en Gouvernman ki'n faid nou pei en fwa, de fwa, e zot anvi fer li ankor pour en trwazyenm fwa.

Kestyon ki plizyer Seselwa ki'n *vote* pour US, apre Onorab Lepathy, apre ki zot in ganny led finansyel ek Lenn ek Larisi, set aköz Seselwa spesyalman bann zenn ki pou bezwen pey krim bann bandi e bann move dimoun 1977 ki Onorab Uranie ti pe koz lo la.

Mon dakor avek Onorab Lepathy mwan Madanm Speaker, e mon pou siport li, parske i pa krwar li ki devret peye. *The few* ki'n komet zot krim, me pa *the many* ki bezwen peye. Alor les zot pey zot zafer zot menm.

Akoz pa zot ki vann zot detrwa loto ki zot annan? En bann i annan detrwa apartman. En bann i annan pe esper *condo*. Alor, zanmen ou pou gannyen si ou pe esper en *condo* ou si ou al pey kriminel. Bann bandi. En group move dimoun.

En bann plizyer zot annan plizyer morso later. Zot annan biznes, apartman aletranze. Aköz zot pa vann sa bann byen malaki e met sa larzan dan kont? Deza konman en kontribisyon pour zot krim ki'n ganny ordonnen e soutire par Parti US,

SPPF/Lepep sa bann letan dan Lasanble Nasyonal.

Mon siport Onorab Lepathy mwan Madanm Speaker. Letan i ava anmenn sa Mosyon, mon ava siport li.

E pa bliye, mon anvi dir avek Onorab Churchill Gill. Lalis *perpetrators* ozordi i *State House* avek Mr Herminie. I ti pe rode lalis *perpetrator*. La i ava dir nou ki i pe fer avek e ki pou arive avek *perpetrator*.

(APPLAUSE)

HON SANDY ARISSOL

100 zour dan lofis, ki bann *failure* ki'n annan e aköz pa kapab *trust* okenn *process*? Eski nou kapab met dan kastrol ozordi? Toultan zot ti demande. Eski ozordi nou kapab met *trust* ek *process* dan kastrol bann Digwa Madanm Speaker? Non, nou pa pou kapab kontinyen avek sa.

Madanm Speaker, mwan mon fyer mon LDS e form parti sa gran group Seselwa ki ti anvi fer Sesel pli for e pli zoli. Mon profite pou dir mersi sa gran fanmir LDS ki annan lespwar pou dir sa sistenm pou bezwen sanze, dan lape, linite e stabilite pour nou pei.

Mon krwar dan en parti ki annan respe pour tou son bann profesyonnel ek travayer Seselwa ki leve e travay pou

soutenir zot fanmir e apiy nou zoli pei.

En parti ki pa touy personn, fer personn disparet e met bonm dan sak vakwa parey Parti Lepep/US/SPPF ti fer. Met dife dan bis e fer dezord dan nou pei, Madanm Speaker.

US wi in ganny eleksyon. Zot pa'n ganny sa mazorite ki zot ti bezwen pour zot donn en bal dan Lasanble.

Alor, nou pou la o bor zot nou. Nou pou demann kestyon nou. Nou pou kontinyen met presyon nou. E i pou annan moman ki zot US zot pou bezwen nou. Kantmenm zot pe koz gro labous, zot pou bezwen LDS pou pas zot bann Lalwa ki bezwen 2 tyer.

Alor, nou ava asize nou ava esper zot. Seselwa pou war e pou tande, Parti US ki swadizan in ganny eleksyon, pou bezwen LDS Li alors en zour. Nou ava esper zot avek gran ker.

E pa bliye, Patrick Herminie pe mazin dizourd Lasanble US parske i anvi i annan en mazorite konpare ek sa bann ki la, Madanm Speaker.

Alor nou ava espere e nou ava gete si vre zot kapab anmenn Lasanble zot tousel san bezwen LDS akote zot pe atrap zot lanmen parey mon pou atrap lanmen mon frer

Onorab Rocky Uranie, Madanm Speaker.

Ann atandan, mon fyer lekip ki nou annan dan Lasanble Nasyonal pour nou kontinyen servi nou pei e nou distrik dan dinyite e lonnekte. Nou reste ini san lafreier pour stabilite e progre nou pei.

E nou dan LDS nou pa pou zanmen les tonbe Sesel ek Seselwa. E nou pou kontinyen fer en travay pour Lepep Seselwa, Madanm Speaker, kontan pa kontan, parey Onorab Lepathy in *remind* nou. Mersi bokou Madanm Speaker.

(APPLAUSE)

MADAM SPEAKER

Onorab Loze, ou ti annan-

HON JOHAN LOZE

Mersi Madanm Speaker. Madanm Speaker, mon annan en *point of order* anba Order (8). E mon le ganny en *ruling* avek ou-

MADAM SPEAKER

Onorab, i pou bezwen anba Order (49).

HON JOHAN LOZE

Alright.

MADAM SPEAKER

Point of order.

HON JOHAN LOZE

Nou a fer li anba (49). Madanm Speaker, mon pa konnen si ou'n konpran. Dan *speech* Onorab Arissol, i annan en moman in dir koumsa pou dir Onorab Lepathy, ti se li pe *relax* e papa disik ti la.

Now, mwan mon pa pe *impute* okenn *improper motives* lo Onorab Arissol, Madanm Speaker. Akoz i posib dan son liniver i parfetman normal pour li annan en papa disik Onorab Arissol.

Be mon le ganny ou *ruling* parkont, lo si ou santi sa i en keksoz *parliamentary* pou diriz ver en Onorab koleg Madanm. Mersi Madanm Speaker.

MADAM SPEAKER

Mon pa'n konpran, mon pa'n tann li byen. Mon ava regard *Verbatim* e mon ava donn en *ruling* lo la. Lot *Member* nou ava, nou ava kontinyen avek deba Onorab Wilbert Herminie.

HON WILBERT HERMINIE

Mersi Madanm Speaker. Ser, frer Lepep Seselwa bonn apre midi. Madanm Speaker, mon toutafe konpran akoz ki zabitan Au Cap in elekte Onorab Larsen, koman zot reprezantan.

(APPLAUSE)

HON WILBERT HERMINIE

Akoz sa ki nou'n tande la, i senpleman nou pe ekout Wavel Ramkalawan, pe koze en *verbal diarrhea*.

(APPLAUSE)

HON WILBERT HERMINIE

Lepep Seselwa ti montre zot an 2025, ki larogans i pou kout zot ser. Ozordi zot in ariv pres obor laport, me zot pa ankor aprann sa leson.

Madanm Speaker, mon pran lapenn pour bann nouvo *MNA* ki pe ganny trennen avek sa bann *leaders* ki ti la avan. Mon krwar ki zot bezwen *stand up* e dir, “arete sa bann kalite zafer. Pa pou anmenn zot lwen.”

Madanm Speaker, nou'n annan en Gouvernman *LDS* ki ti dekonekte avek son pep en Gouvernman ki ti pas son letan al dan lotel sant sanson “*la vie est si belle*” manz *caviar* e zot ti'n dekonekte avek sa pep.

Sanmenm sa ki ozordi Onorab Naidu, pa ni konnen lekel ki annan *share* dan lekel. I vin *mislead* sa Lasanble, pa dir nou ki *Cable & Wireless* ki ti annan *share* dan Fon Pansyon.

Be Onorab Naidu, kote ou ti ete tou sa letan ou? Fon Pansyon ki annan *share* dan *Cable & Wireless*. Zot in pas letan zis koz lalang ek sa pep.

(APPLAUSE)

HON WILBERT HERMINIE

Madanm Speaker, i malere ki en nouvo Manm ki mon ti krwar i sitan entelizan in koz ek nou lo son koman i savan, ki kapab fer trwa lakaz par zour. Me selman i napa sa konviksyon pour li kapab koz ek son Prezidan pou donn li sa lalis tou bann droger avek tou bann eskobar, epi vin la dan Lasanble pou vin plennyen. Ou ti ava esper li ler i pe bwar sa trwa *guinness*, ou ti ava demann li sa lalis eskobar Madanm Speaker!

(APPLAUSE)

HON WILBERT HERMINIE

Madanm Speaker, atraver ou Onorab Adelaide, in dir koumsa ki *US* i lo lalis *perpetrator*. Be mwan anvi zis *educate* Onorab Adelaide, napa okenn landrwa dan sa lalis *perpetrator* ki nonm *US*.

Madanm Speaker, i malere ki nou annan en Onorab, ki pa ti kout konsey *VP* ler i ti ankor en *MNA Grand Anse Mahe- Praslin sorry. VP* ti dir li toultan al vizit sa bann dimoun laba Mont Plaisir.

Sanmenm sa rezon ki ou pe asiz laba lot kote latab. E pa mank bokou letan pou ou sorti dan laport. Madanm Speaker, *United Seychelles* i sel opsyon pour Sesel! E Dokter Patrick

Herminie, i en vre Prezidan, en Prezidan ki'n ekoute, en Prezidan ki'n pran desizyon e desizyon ki dan lentere Lepep Seselwa, en Prezidan ki pe delivre. Sa i en realite.

Dokter Herminie, i en Prezidan ki enn onnet e se pour sa rezon ki Lepep Seselwa in vot pour li, e in ganny elekte par lepep, pa parey entel ki'n dezonnnet e ki ler in kit lofis in deside pran tou sa ki apel pour li, lisyen, torti, menm telefonn in pran in al avek.

Ladan menm la Madanm Speaker, apre ki'n bar son trwa *guinness* in vin lo medya sosyal pou vin lager loto avek Lepep Seselwa. Sanmenm sa ki zot apel en *statement* sa?

Madanm Speaker, lekel sa Prezidan ki'n fer plis ki Prezidan Herminie, dan sa kourt letan? Tou sa ki Prezidan Herminie, in fer pandan selman trwa mwan annou konpar li avek sa ki entel in fer pandan 5an.

I ti promet nou nouvo kabri be nou pa ankor war, mon pa konnen si in ariv laba kot *LDS*. Me selman nou pa ankor war. I ti promet nou en nouvo lendistri kannel 5an in pase, nanryen.

Mon kit sa avek zot Lepep Seselwa. Espesyalman ler zot in ekout ladres Prezidan semenn pase lo Leta nou nasyon, e mwan mon konnen

kan gran mazorite ek zot pou dakor ek mwan ler mon dir entel pa'n kapab travay lo menm nivo ki Prezidan Herminie.

Parey sanson i dir, "Zot a zis kritike, me zot pa pou anpandan!" En sou sa! Lepep Seselwa, mon demann zot pou kontinyen *trust the process* akoz Prezidan Herminie, i konnen ki i pe fer!

(APPLAUSE)

HON WILBERT HERMINIE

Madanm Speaker, mwan santi mon privez ozordi dan sa Lasanble ki Seselwa in vote an mazorite pou met *United Seychelles* pou reprezant zot. Zot- mon riy tousel ler mon get mon bann koleg lo lot latib. Akoz mon riye? Akoz zot fer mwan lapenn. Mon bann koleg detrwa mwan pase ti pe koz labous plen.

Menm dir, "Nou pe al pran tou *United Seychelles* pe al dan bin listwar." Get ozordi, nou kapab konte konbyen zot i annan laba lo lot kote latib konbyen zot ki ankor la, e sa ki pli gou sa bann ki ti dir zot pe al pran tou a ki pour zot, zot ki'n ganny met deor premye.

Lepep Seselwa in donn zot en leson, sa bann ki ti pe *arrogant*, maltret son prosen, koup mikro, ou koze la ou pa koze, ou al deor ziska ler ou demann leskiz oubyen ou

saler i ganny koupe. Zot menm dir, "si ou la, si ou pa la pa fer nanryen, keksoz pou *still* pase."

Ou ti krwar ou endispansab, Lepep Seselwa in koriz ou, e en koreksyon ki pa pou zanmen bliye. Nou bezwen toultan mazine bann voter i pli gran ki nou se zot ki'n met nou la, se zot ki'n donn nou en lanplwa. Lepep Seselwa dan son gran mazorite in met konfyans dan Dokter Herminie, ki 6enm Prezidan Sesel e sa pa pou zanmen ganny efase dan listwar Sesel.

Me ozordi nou le fer kler avek Lepep Seselwa ki byensir nou pou mazin sa 5enm Prezidan Sesel, menm si nou kontan li oubyen non. Nou pou mazin li akoz i pa pou ganny efase dan listwar, i pa pou ganny efase dan listwar pour la senp rezon ki akoz lemonn antye i rekonnet ki Sesel in ganny mal *lead* anba sa direksyon sa msye ek son parti.

Lepep Seselwa i rekonnet ki zot in fer en fot pou met li o pouvwar pandan sa dernyen 5an e zot in koriz zot fot. Pa pou ganny efase dan listwar, akoz i sel Prezidan ki'n fer en ta keksoz ler in kit *State House*, e pa pou zanmen ganny efase dan listwar akoz menm bann pei vwazen i realize ki sa Prezidan ti en

Prezidan arogan. En Prezidan e en parti ki ti krwar dan zis zot bann dalon konpare avek nou dan *United Seychelles* ki *for the many, not the few*.

Madanm Speaker, mon koz koumsa aköz pour sa prosen 5an se Prezidan Herminie, ki pou montre zot ki mannyer pou diriz sa pei. Aköz sa bate ki *LDS* in anmase dan sa dernyen eleksyon i enn ki zot pa pou zanmen bliye, aköz lo dernyen moman entel telman dezespere ti nepli konnen ki pos pour demande, ki laport pou al tape.

Alors, entel ti demann pos nennenn oubyen menm boy. Lepep Seselwa ti dir li, "non mersi." ni menm nennenn, ni menm boy i pa ti vo. Ler sityasyon i koumsa sel keksoz ki reste pou entel fer se reste trankil, aret plennyen parey en piti gate. Al re fer ou lavi e petet dan 5an ou a retournen e rezilta pou menm parey.

Madanm Speaker, ozordi mon war en Gouvernman *United Seychelles* ki'n vin avek en plan kler e ki annan bokou laspirasyon pou retir Sesel dan sa fernwar ki'n ladan pandan sa dernyen 5an. en fernwar ki entel menm in met nou ladan, e li menm li in admet ler in bwar son trwa *guinness* in mont lo *stage* e i dir koumsa ki sa dernyen 5an

Sesel in parey Haiti, se li ki ti met nou la.

United Seychelles i annan en vizyon pour lavansman Sesel ek son pep. *US* i krwar dan laspe pa kit personn deryer. *United Seychelles* i krwar dan lazistis, rann kont, prosperite e emansipasyon lazenes, e tousala i anba gidans sa zonm for ki pa lot ki Dokter Patrick Herminie!

Annou sey fer en konparezon reel, *LDS* in la pandan 5an, dir mwan ki zot in fer pour sa pep? Ou sa manman tousel ki'n al kot *welfare* pou demann en pti led, asize en et fran ek ou lekor. Ki larepons ki ou'n resevwar e konbyen letan ou'n resevwar sa tel larepons, konbyen lasistans ki ou'n gannyen?

Ou sa zenn ki'n kit lekol e pe rod en lanplwa, eski ou'n gannyen, ki larepons ou'n gannyen? Ou sa enn ki ti pe sey komans en pti biznes annou konte konbyen zot ki'n reisi e konbyen zot ki'n byen pase? Konpar li la dan selman en trwa mwan, tou sa bann sanzman ki'n arive e osi bann ki'n ganny anonse ki dan plan pou arive, re lentrodiksyon *URS* ti krwar dan devlopman bann zenn, aköz zot pa ti donn bann zenn en sans nek zot ti aboli *URS*.

Me ozordi dan nou Gouvernman *United Seychelles* nou pou re entrodwi sa *scheme*, pile si zot oule. Nou pa enterese ek zot, nou enterese dan byennet sa pep. Akoz nou pa parey zot.

Madanm Speaker, dan sa dernyen 5an ki sa parti *LDS* in fer apropo pri bis. Eski zot ti enterese pou antre dan okenn negosyasyon, wi non, nou pa konnen. Me lefe i reste ki nanryen pa'n ganny fer pour sa pep. Me Gouvernman *United Seychelles* dan selman kat mwan o pouvwar in vwar posibilite kapab fer desann pri bis.

Si *United Seychelles* in kapab fer li ki *LDS* ti pe fer tou sa letan? Larepons i senp. Zot pa ti enterese. Lepep i bezwen not sa byen bon planifikasyon i byensir anmenn rezilta pozitiv. E Prezidan Herminie, in menm dir ki sa rediksyon pou ganny travay lo la pour ki pri bis i desan plis ankor lannen ki pe vini. Entel ou kontinyen rod loto, plennyen, rod fizi. Nou, nou pou kontinyen lager pou transportasyon piblik vin pli afordab pour sa pep. Annou kontinyen *trust the process*.

(APPLAUSE)

HON WILBERT HERMINIE

Pri bis i zis en bout Madanm Speaker. Annou koz lo sa fame fer desann pri lavi. Ankor mon

demande ki *LDS* in fer pou fer desann pri lavi? Eski zot ti entrodwir *Travizory* pou fer desann pri lavi? Eski sa bann demagozi ki zot in fer kot *STC* in ede fer desann pri lavi? Vi ki letan i kourt mon pou kit sa lanmenm pour en lot letan.

Lepep Seselwa i konnen ki'n arive e in swiv sa zafer *STC* tre pros. Me sa pa pou anpes *United Seychelles* tackle sa problemm pri lavi. Dokter Herminie, in asir Lepep Seselwa ki pri komodite esansyel pou desann ankor pandan lannen 2026, e lalis pou ganny agrandi kot ankor 12 prodwi pou ganny azoute lo sa lalis.

E sa bann menm Minis ek *MNA LDS* ki ti la pandan sa 5an veye kot nou war zot pase avek zot basket kot *STC*. Sa i normal akoz zot en sitwayen Sesel. Me largiman i reste ki zot ti o pouvwar e zot ti'n kapab fer sa pour Lepep Seselwa, me zot pa'n fer li. Zot in plito konsernen dan pran tou sa ki apel pour zot.

Madanm Speaker, tou dimoun a en moman dan son lavi i vwar li pe pran en *loan* avek en labank pour li kapab aste keksoz oubyen fer menm en proze. Akoz dan lepase anba sistenm *SPPF* Parti Lepep nou ti kapab *be what you want to be*. Me anba Ladministrasyon *LDS* sa ki ti

annan ti vin pli ris, sa ki ti napa ti reste napa.

Mwan mon kestyon ozordi i pour ou. Eski ou'n deza tann en Manm *LDS* dan sa Lasanble oubyen zot bann Minis, Prezidan koz lo lentere labank pou desann pour en sitwayen? Zanmen. Larepons i, non. Akoz non? Zot pa ti enterese ek sa pep, zot pa ti enterese lo ki mannyer ou pase dan ou lavi, zot pa ti enterese lo ki mannyer ou ganny en keksoz, zot pa ti enterese lo ki mannyer ou pou agrandi ou biznes. Zot ti enterese ek selman zot bann dalon.

Ozordi ek en Prezidan- ek en Gouvernman *United Seychelles* ki ekoute, e annan en leker in anonse ki diskisyon pou ganny fer avek *Nouvobanq e Seychelles Commercial Bank* pour ki to lesanz i desann. E sa i pou dan lentere Lepep Seselwa, e lentere sa bann Minis e bann Manm *LDS* lo lot kote latab.

Lepep Seselwa nou dan US nou enterese ek ou, nou enterese ek ou byennet, nou enterese avek lagrandisman ban pti biznes, nou enterese avek met plis larzan dan ou pos. Sa i en vre *leadership*, en *leader* parey Prezidan Patrick Herminie, ki pran bann *bold decisions and* bann *firm decisions* pour lentere *the many, not the few*. Ankor enn

fwa mon demann zot pou *trust the process*. Akoz Prezidan i konnen ki i pe fer.

(APPLAUSE)

HON WILBERT HERMINIE

Madanm Speaker, lasante sa pep i enn ki vreman pros avek nou leker. Nou'n toultan lager ki lasante i reste gratwit pour tou Seselwa. Pandan sa dernyen 5an i paret ki Minister Lasante in deteryore, ou tann plis konplent. Me li sa Minis *LDS* in kontinyen zis pas son letan monte desann dan pei deor, e annan lodas zis pou al dan pei Lerop e lezot al dan pei Lafrik.

Ki diferans pozitiv sa retired Minister in fer dan Minister apre tou sa bann vizit aletranze. Dan lot kote pandan zis trwa mwan la avek lapwentman en Minis ase zenn, dinamik e aktiv mon asire ki pou annan en vre sanzman avek sa bann reform ki Gouvernman pe enplimante dan lasante, e sirman avek led tou bann travayer lasante sa pou vreman en sikse. Mon demann travayer pou reste pozitiv.

Madanm Speaker, sa reform i devret tous tou travayer dan en fason pozitiv e non pa zis en parti. Ou sa enn ki pa pe delivre, e ou ti krwar pou kontinyen senm lafreyer e fer politik dan Minister

Lasante *think twice*, ou'n ase fer lepep soufer.

Madanm Speaker, mon osi demande ki Minister nou regard en pe lo bann zafer lapwentman pou vwar spesyalis, lapwentman pou pas dan *MRI* letan espere dan bann klinik, e osi bann *issues* ki konserne *overseas treatment*.

Nou bezwen osi *tackle issues* tel ki manze ki lopital i donn bann pasyan, sa problemn tapi lili e lezot. *Management* lopital i devret vin pli proaktiv, e elimin problemn pli boner posib e nou pa dormi lo la parey sa Minis ti fer, apre vin tatonnen dan Lasanble ler i ti ganny demann keston.

Sa fame nouvo lopital entel ti pe anmas larzan pou konstri sa lopital, me la ki Prezidan Herminie, in mansyonnen an piblik ki nou Gouvernman in fini ganny larzan pou konstri en nouvo lopital modern.

Mon zis oule demann entel, ki pou arive ek sa larzan ki ti sipoze dan fon konstriksyon nouvo lopital? Eski i ankor dan fon, oubyen eski fon in sek, oubyen pinez in manze? Mon pos sa la.

APDAR le fame APDAR, lekel ki ti entrodwi APDAR Seselwa? Se pa lot ki *United Seychelles*, e sa ti ganny mete anba responsabilite Dokter Patrick Herminie. En dokter

kalifye ki ti annan en leker pour bann pasyan, se dokter ek son tim kalifye ki ti entrodwi sa program methadone Sesel.

Me apre nou'n vwar en dokter ki pa konn nanryen ki'n zis mel dan tou. In vini e alala, tou keksoz in degrengole, aköz tou sa ki i enterfer ladan e anmenn son larogans apre i mal fini.

Dir nou, depi ler entel ek son Gouvernman in vin o pouvwar kwa ki zot in fer plis pour sa ban pasyan, e ki pe ganny trete koman bann adikt- 5an in pase, ni menm sa pyer fondasyon ki zot in sant laglwar lo la zot pa'n kapab mete.

Bouz APDAR anba Minister Lasante koman en departman, ayoyo. Sa Minis Lasante ti napa en nosyon ki ti pe arive, aköz i pa ti enterese. Par fer sanzman dir pep kwa ki'n ariv- Par sa sanzman dir nou pep kwa ki zot in *achieve*. Oli sa *masterplan* ki zot ti pe travay lo la zanmen fini? Ankor i montre zot pa enterese.

Entel zis bezwen zot vot sa bann dimoun. La nou Gouvernman ava kontinyen sa travay ki'n komanse oparavan avek reentrodiksyon APDAR. Nou dan *United Seychelles* nou pou fer sir ki ler zot in tonbe zot pou ganny en sans releve.

E la mon apresye osi ki dan lasazes nou Prezidan in fer- in lans en lazans pour lasante mantal. Mon krwar i ti pe get dan en gran *foresight*, aköz ler nou war en dimoun i mont lo en *stage* lo medya nasyonal e komans koz lo rod madanm avek son sak, i montre ki nou annan en problem grav. E mon dir sapa a Prezidan Larepiblik pou vwar sa, e annan en *foresight* lo la.

Ledikasyon. Ledikasyon Madanm Speaker, i osi en lot size ki reste pres ek nou leker e ankor nou'n osi larger ki i reste gratwi pour tou zanfann Seselwa. Madanm Speaker, ozordi mon fyer ler mon tande ki nou Gouvernman pou anmenn reform dan sa Minister. E avek Minis David Pierre, sa reform i asire pour en sikse.

Me la nou annan en lot Minister ki ti pe deteryore pandan sa 5an. Ti annan en Minis ki ti vin zis resit poenn ek nou, san fer okenn gran aksyon konkret.

La mon salye bann ansenyan ki ti reste pozitiv, e sakrifye zot letan e devosyon pour nou bann zanfann. Anba nou Gouvernman nou pou fer tou posib pou amelyor nou sistenn ledikasyon, e donn zot nou bann ansenyan bann zouti nesesser, e pour nou komans fer sa par donn zot 2mil *laptop* ki sak *teachers*

pou gannnen pour zot san pey nanryen. Kontinyen travay dir mon Gouvernman pou kontinyen get dan zot *welfare*. Avek Minis David Pierre, sanzman pozitiv i asire.

Madanm Speaker, mon mazin en kou la, pandan sa dernyen 5an mon ti a kontan konnen konbyen dimoun ki'n ganny asiste avek later *landbank* anba Gouvernman LDS? Ou a dir mwan ki ler *United Seychelles* ti perdi eleksyon an 2020, LDS ti gannnen *United Seychelles* ti al ek tou later?

La ozordi *United Seychelles* in re ganny eleksyon sa bann later in retournen. Be kote sa bann later ti ete tou sa letan? Mwan mon pli krwar ki entel ek LDS pa'n zanmen enterese dan sa program, e sa *scheme* later *landbank* pour tou Seselwa. Aköz si zot ti enterese ti pou napa 430 aplikan pe espere.

Madanm Speaker, ozordi en Gouvernman *United Seychelles* in konfirman ki pandan lannen 2026, omwen 150 kare later rezidansyel pou ganny delivre. Si pa *United Seychelles* ek Prezidan, manke entel ti pou'n fini vann tou sa bann later parey i ti'n komanse avek Assomption. Assomption bann Onorab LDS, pa'n ganny vann de fwa, ti'n fini ganny vann!

Madanm Speaker, an pasan les mwan *remind* LDS ki pandan sa 5an zis apepre 250 lakaz ki'n ganny konstri. Zot zis promet dimoun 2mil let, me selman zot in konstri zis 20 lakaz. I annan plis let ki'n sorti ki lakaz ki pe ganny fer, apre zot in zis met zot gro palto tord, fer vizit aletranze apre fer nou krwar ki zot in al fer negosyasyon pour Lepep Seselwa.

Zot in al negosye kwa? Dir nou. Prezidan Herminie, i al lo misyon aletranze e ler i retournen i fer sir i donn en kontrandi lo sa bann vizit e ban diskisyon.

Eski sa msye ou ti fer sa? Oubyen ou ti pas deryer rido- e sa ki ti pas deryer rido ti reste deryer rido. Ou ti dir nou ou ti pran meb ek souvenir ki ou ti ganny kado. Sa bann kado la, ti pour ou lofis oubyen ti pour ou?

Ler ou pe fer tou sa bann zes Prezidan Herminie, pe fer- Prezidan Herminie, pe garanti larzan pou konstri pli ki 1,000 lakaz komansman sa lannen, e 2mil lakaz pou fini by 2030.

Entel, Dokter pou kontinyen geri sa bann boubou ki ou'n fer avek sa pep. Madanm Speaker, nou bann travayer Seselwa in travay e la mazorite zot nou rekonnet zot sakrifis e devosyon.

Me entel ek son klik pa ti rekonnet sa zot, zot ti decide servi trezyenm mwan saler kont nou bann travayer. Ou ti ganny trezyenm mwan saler baze lo performans kan sa trezyenm mwan saler ti dan Lalwa, sak travayer ti oblize gannyen.

Anba nou Gouvernman nou'n fer sir ki sa in retournen. Ki mannyer ou santi ou apre ki ou'n ganny ou trezyenm mwan saler? Ou'n nobou kapab aste ou *uniform*, e keksoz lekol pour ou bann zanfan. En promes ki Prezidan Herminie, in fer e in garde.

Largiman ki kote, largiman ki monte aprezan se ki fason ki *appraisal* en travayer pou ganny fer pour li ganny promosyon. Sa mon sirman konnen ki lotorite konsernen pou met ban mekaniz an plas ki bann travayer i a kontinyen delivre alaoter.

Msye entel ou'n mal azir kont travayer Seselwa, sanmenm bannla in tir ou State House. Pa fini la, *long service allowance*, aköz ou ti koup *long service allowance* sa bann travayer? Sa bann travayer ti pe travay dan Gouvernman, zot ankor la. Set aköz zot pa ti enterese avek sa bann travayer. Ou ti pli vomye enterese avek donn dimoun larzan palto avek larzan ledan pour tou ou bann Minis.

La Prezidan Herminie, in dir non. Plito sa bann travayer zot *long service allowance*, sa bann travayer ki'n lwayal pour tou sa bann letan dan Gouvernman, entel tou a ban gaf sanmenm sa bann travayer in dir ou, "*Out!*" La zis tyeke si ou rob i ankor la, e ou a retourn kot ou ti komanse.

Sa i anmenn mwan lo lot pwen Madanm Speaker, *Public Service Bureau or DPA* sa relye avek bann travayer. Ase fer lavi nou bann travayer malere silvouple. Msye Prezidan mon demande ki nou Gouvernman i imedyatman *tackle* sa *issue*. Kot bann pros ki *supervisor* i demande pou ganny promote pou ganny pli larzan ki sa i ganny fer dan en letan- en dele letan apropiye.

Alors mon sizere ki sa *case* i ganny evalye endividuelman *not one size fits all*. An Mars 1979 se *SPPF* ki ti entrodwi sekirite sosyal pour nou bann dimoun aze. Se ti anba direksyon Prezidan Albert Rene, sa pa pou zanmen ganny efase dan listwar Sesel. Sote, pile, kriye si zot oule, se pa ni *Euro*, ni Parti Seselwa, ni *SNP* oubyen *LDS* ki ti entrodwi sa, aköz zot pa'n zanmen enterese avek bann dimoun aze.

Me apre sa parey zot labitid zot in vini e fer krwar pti baba pour zot, koz zoli parol, me *what about actions?*

Entel ti promet tou bann dimoun aze R10mil pour zot sekirite sosyal. Bannla in donn li zot vot, ozordi ni menm R10mil sa bann dimoun pa ankor touse. Mazinen ou'n la 5an, si pa lipokrizi dir mwan ki mannyer i apele?

Ankor i montre ki entel pa ti vreman enterese, i ti zis la pou bat zot latet pou ganny zot vot. Mwan mon Gouvernman in promet logmantasyon e depi Zanvye zot in ganny zot logmantasyon, e avek bon planifikasyon sa i ava ganny aranze e plis logmantasyon i a vini.

Ziz Prezidan Herminie, par son aksyon. Mon fristre ler mon mazin- Madanm Speaker, ler mon mazin sa madanm ki ti pou ganny son 63an lannen pase, e pa ti resevwar son pansyon zis aköz aksyon bann dimoun dan *LDS*. Zot ti deside ogmant laz retret, dir mwan ki diferans pozitiv sa in anmennnen? Konbyen benefis an plis in anmennnen pou pei? Mwan mon pli krwar zot in fer sa pour zot prop benefis, zot napa okenn lentere Lepep Seselwa a ker.

Me Madanm Speaker, nou dan *United Seychelles* nou krwar dan dinyite travay dir, en dimoun ki'n ariv serten laz sa dimoun i bezwen- i dwatet repoze anpe, viv son lavi dan dinyite, e se pour sa rezon ki

nou pe fer desann laz pansyon. Les sa bann dimoun pran zot retret, si ou'n decide lager pou vin Prezidan ziska laz 70an sa ou zafer. Konblaz, konblaz, konblaz-

MADAM SPEAKER

Ankor 2 minit Onorab. Ankor 2 minit.

HON WILBERT HERMINIE

La en lot size ki se zans in toultan anpay zot lekor. Msye-Madanm Speaker, entel i kras anler e i mars dan son prop lakras. Me sa msye i annan en rikord *boycott* konblaz, parey zot ti fer ler nou ti pe konble Roche Caiman, e Perseverance zot ti dir bann dimoun pe al reste dan lakaz lapen.

Selman apre zot men zot ek son bann klik ki ti vin partou kot sa bann zabitan pou demann zot vot. Lepep Seselwa in aprezan konpran, e ou kapab rankont konblaz, me selman Lepep Sesela pou kontinyen koriz ou. Akoz nou lo nou kote latab nou *believe* dan fer kreasyon later pour nou kapab kontinyen delivre pou donn nou pep later pour lakaz e biznes.

Madanm Speaker, mon'n var en Gouvernman ki'n koup plis riban, pandan sa dernyen 5an se zans in zis koup riban tou bann proze ki pa ni zot ki'n komanse. Ladan menm zot apel sa en lakonplisman, zot in

dezonnnet dan plas travay pou met *streetlight*, aranz *bin*, *bin site*, *bus stop*, drenaz zot in pli vomye met nouvo stati, nouvo moniman, sanz non semen, penn nou bann moniman nasyonal e zot in menm fer renovasyon lo *Library* Nasyonal e fer nou krwar sa i en nouvo *building*. Depi ler later i later, *Library* Nasyonal i la kot nou ete.

Zot larogans pouvwar i montre zot- in mont dan zot latet san realize ki Lepep Seselwa in met zot anba kontrol. Mon aplodir Prezidan Herminie, e mon donn li *full* sipor pou kree sa Komite Lenvestigasyon pou fer lenvestigasyon dan diferan ka, tel ki *CCL*, *Travizory*, rayot prizon. Lepep Seselwa ava finalman konn laverite.

Konklizyon i a ganny tire e sa ban sityasyon i ava ganny met o kler. Sa ki koupab i ava face lakonsekans, akoz Lepep Seselwa in fatige soufer.

Pou konklir Madanm Speaker, mon le fer resorti ki aprezan Sesel i anba gidans Prezidan Herminie, ki pe travay pour Sesel. Bann promes ki Prezidan Herminie, in fer i pou delivre lo la.

Prezidan Herminie, in anmenn dimoun ansanm dan plas ki entel in fer zot dekile e menm *LOTO*, lo lot kote latab in agree ek nou ki dimoun in dekile avek Ramkalawan, akoz

se li menm ki'n mal diriz sa pei.

E fotespere ki *LOTO*, i annan sa menm kouraz pour ler eleksyon kandida pour *LDS* 2030 i ava debout pou challenge Ramkalawan. Me sa msye Praslin i osi fer *LDS* konpran ki zot in ganny zot sans, zot in fer zot ta gaf. Entel sa lakwizin pa pou ou, sa lanmans pwalon i ankor tro so. Alors kit sa lakwizin trankil e les nou *chef* okipe.

Zot in sote, zot in pile, zot in roule, zot in gronnyen. *United Seychelles* pou la pou travay pour sa pep. *United Seychelles* e Prezidan Herminie, pou montre zot ki mannyer pou avans sa pei pli devan. Prezidan Herminie, pou montre zot ki savedir en vre *leadership*. Alors mon bann frer-

MADAM SPEAKER

Onorab, si ou kapab fer ou konklizyon *please*.

HON WILBERT HERMINIE

Avek mon bann ser- Alors mon bann frer ek ser Seselwa annou kontinyen *trust the process*, e les sa bann piti gate rod latansyon pli lwen. *United Seychelles* i reste sel opsyon pour Sesel! Ale Patrick!

(APPLAUSE)

MADAM SPEAKER

Bon, en *break* ziska 4er.

(BREAK)

MADAM SPEAKER

Bon, nou ava prezan pran nou 2 dernyen entervenans lo deba, Onorab Sopha.

HON GERRY SOPHA

Mersi Madanm Speaker. Bonzour madanm- bonn apre midi Madanm Speaker, bonn apre midi tou mon bann koleg Onorab. Bonn apre midi tou dimoun ki pe ekout Lasanble Nasyonal pou sa apre midi.

Madanm Speaker, i fer premye repons Leta Lanasyon ki Onorab i partisip ladan e i fer mon en gran plezir pou mon asiz lo kote sa latab kot mon ete.

Avan mon komanse Madanm Speaker, mon ti a kontan dir avek Sesel ozordi apre midi ki *United Seychelles* pa pou les okenn endividi ouswa okenn group aveg tyonbo nou lanmen pou fer nou koup semen. Akoz si nou pou les zot tyonbo nou lanmen sa aksidan ki zot in gannye nou osi nou pou pas parey. Mon poz sa la.

Madanm Speaker, le 27 Zanyve 2026, Prezidan Dr Patrick Herminie Prezidan Sesel lezitim ti vin isi dan sa Lasanble pou delivre son premye ladres Leta Lanasyon,

ladres Leta Lanasyon Prezidan Herminie Sesel antye ti pe espere ek pasyans.

Akoz i annan bokou Seselwa ti anvi re ekout zot radyo ek zot televizyon ki zot pa'n met *on* pou en bon pe letan, letan in annan diskour Leta Lanasyon.

Madanm Speaker, ladres Prezidan Herminie pa'n en ladres partizan, in plito en ladres dan lentere nasyonal kot in war keksoz fodre amelyore in eksplike ki mannyer ki son ladministrasyon pou travay pou vwar solisyon.

Madanm Speaker, diskour Leta Lanasyon Prezidan Dr Herminie in redonn tou Seselwa lespwar, kontan pa kontan la deor tou Seselwa in re ganny lespwar. Prezidan Herminie in prezant son diskour san mank respe Lepep Seselwa, san menas ou *bully* Seselwa.

Madanm Speaker, i annan plis ki 5an ki Seselwa pa'n tann en diskour Leta Lanasyon ki'n soulaz zot moral. In ariv en moman Madanm Speaker, kot Sesel nepli bezwen ganny dirize par ilizyon, savedir keksoz ki pa vre.

Pou siport mon largiman, apre midi Madanm Speaker, mon ava fer rapel pep Seselwa sa program 100 zour ki Prezidan Herminie ti prononse

pandan ki i ti dan kanpanny eleksyon e pa pe al ver eleksyon.

Ler in vin Prezidan in demare lo son program 100 zour. Madanm Speaker, kote ki fermal avek *LDS* ler Prezidan Hermine i donn trezyenm mwan saler plen tou travayer? Tou travayer pou kapab *US* ou kapab *LDS* ou kapab nenport ki dimoun ki annan afilyasyon en lot parti politik ou pe ganny ou trezyenm mwan saler.

Ki lendikasyon sa i donn nou ler *LDS* i konplent lo la? Larepons se ki *LDS* pa la pou Seselwa, me zot servi Seselwa. Pou azout ek mon largiman ankor mon a fer sorti en pwen tre dir Madanm Speaker, ler mon dir *LDS* pa la pou tou Seselwa.

Mon anvi sa pep la deor i zis ze si sa ki mon pe dir i laverite, dan en *press conference* bann premye ki Prezidan Ramkalawan ti fer *State House* i ti ganny demande en kekyon avek en zournalis, Prezidan Ramkalawan ti dir pa bezwen sir ki Sesel i annan dimoun ki vilnerab.

Madanm Speaker, si en Prezidan in pronons lo la, apre son bann dimoun dan wityenm Lasanble i ankoler aköz Prezidan Herminie in donn trezyenm mwan saler i dir pe larg delo ki zot anvi fer

ek nasyon Seselwa? Nou lo nou kote nou pe dir avek Lepep Seselwa nou la pou zot *trust the process*.

Madanm Speaker, ler Prezidan Herminie i dir i pou donn R800 ogmantasyon bann vyeyar, *LDS* i dir ti pou donn 10mil, *LDS* pa pou dir *United Seychelles* ki i pou ferm aköz zot, me zot pa'n konnen ki zot pou fer letan zit ti dan sa ladministrasyon sa ki zot pa'n fer *United Seychelles* in fer, so *trust the process* zot osi.

Madanm Speaker, sa fame tim ibou ki'n teroriz bokou dimoun dan Sesel, wi ti merit ganny fermen, aköz anba *LDS* ler zot ti dan ladministrasyon, Prezidan Ramkalawan ti dir napa Seselwa ki pou ganny menase ek fizi ankor.

Me ki ti arive Lari Angar? Bann zenn ti ganny montre revolver dan zot kwen latet apre Prezidan i vin defann sa bann dimoun ki'n fer sa i dir si ou pe viv an deor sa ron ou pa pe ganny trete parey en dimoun ordiner, ki sa bann zenn ti fer ziska ozordi nou'n napa larepons.

Madanm Speaker, Prezidan Herminie ki annan Seselwa aker, ki krwar dan lord e lape i dir i pou ferm ibou, ibou in fermen, *LDS* kontan pa konpetan Dr Herminie in pran en desizyon pou nasyon Seselwa aköz i

Prezidan pou tou Seselwa, so *LDS trust the process*.

Madanm Speaker, mon pou profite ler mon annan *floor* la apre midi pou mon dir Sesel sa ki pa kontan sa R800 ki nou bann vyeyar in gannyen mon'n rakonte detrwa dimoun in ganny 60an an montan zot in dir mon remersi Prezidan Herminie pou sa logmantasyon lo zot larzan retret ki zot in gannyen.

E zot demann li pou kontinyen travay, e zot pou donn li zot sipor tou dilon son manda ziska lot eleksyon zi zot ankor la zot pou donn li zot vot. So, Madanm Speaker, i montre ou poudir nou bann dimoun laba deor i apresye sa ki Prezidan in fer.

Madanm Speaker, Prezidan Herminie dan son diskour in mansyonnen ki son ladministrasyon pe al demare avek proze mil lakaz e ki a lafen 2030 i ava fer li mil. E sa mon pa krwar Sesel i devret souffle lo sa deklarasyon ki Prezidan Herminie in fer.

Madanm Speaker, mon dir sa aköz laprev i la pou nou vwar sa kantite lakaz ki ladministrasyon 43an in konstrir, si nou la en pti gin par deryer avan 1976 nou bann zabitan ti pe viv dan bann lakaz ki deplorab, Seselwa ki la deor ki pe ekout mon apre midi zot a dir si mon

pe aköz keksoz ki mon konnen.

Akoz mon bann manrmay ki'n penny afro dan mon pos deryer mon, mon'n met *high heel*, mon pa penny *mohawk*, tou sa ki'n pase dan sa mon pei pou mon laz ki mon annan mon'n sivre. E mon remersi mon met mon laz ki mon annan ozordi mon ankor kapab pe *recall* tousala e met devan Lepep Seselwa pou anpes zot ganny anbete avek *LDS*.

Madanm Speaker, si dan bomaten ouswa dan apre midi nou fer en pti *jog* Perseverance, Roche Caiman ouswa dan bann kontan ki annan bann lakaz partou kote. Eden, nou a trouve poudir rikord fer lakaz Sesel i lo ladministrasyon *SPPF*, parti Lepep, *US*, *LDS* kontan pa kontan *trust the process*!

Madanm Speaker, *LDS* i dezonnèt ek Lepep Seselwa, ekout mwan byen mon bann koleg lot kote latab. Mon zis demann mwan si zot pa dormi ek remors aswar. Madanm Speaker, zot in dir zot in fer lakaz, wi zot in devret fer lakaz aköz zot in vin dan ladministrasyon pou 5an zot pa'n vin asize me ki zot in fer, zot in fer zot 250 lakaz, me zot ti annan en langazman 750 lakaz pou fer.

Mon krwar si zot reste trankil zot war en gro laverite

pe bat zot dan zot latet atraver ou Madanm Speaker, aköz mon pe dir zot ti annan en langazman 750 lakaz pou fer? Se zot Minis prensipal ti dir mon fer en deklarasyon ki nenport prosen ladministrasyon i pran lofis i fer an langazman pou fer 750 lakaz sak lannen, zot in fer 5an o pouvwar.

Madanm Speaker, si zot ti'n gard zot langazman ti pou'n ariv zot 3mil,750 lakaz lafen zot manda e zot pa'n konplet sa, ki sa i vedir? *LDS* in *fail big time* kot i konsern lakaz.

Madanm Speaker, mon vye paran toultan ler mon ti tptipti i bat mon i dir mon, mon taye, mon pa plere i dir mwan mon'n riy zonn Madanm Speaker, ozordi zour mannyer *LDS* pe ganny bate zot riy zonn dan Lasanble Nasyonal.

Madanm Speaker, en lot size ki Dr Patrick Herminie ti pronons son lekor lo la dan diskour Leta Lanasyon ki ti fer dan sa Lasanble Nasyonal le 27 Zanvyè 2026 i ti dir ki i pou met R20milyon dan *trust fund* pou kapab komans fer demars pou pey sa bann pou zot konpansasyon.

En deklarasyon parey, in montre nou bokou keksoz kantmenm i annan ki'n kriye, lot kote latab atraver ou Madanm Speaker, i pa pou tir larzan ki *taxpayer* in peye,

Prezidan in pronons lekor lo ki i pou fer, e sa pa *LDS* ki pou dir li ki i pou fer *so trust the process LDS!*

Madanm Speaker, *TRNUC* ti sa seval ki *LDS* ti'n mont lo la pou li ganny pouvwar e zot ti koz toultan lo viktim, lo bann krim ki'n arive, zot ti vot lo Bidze, zot ti fer sa demars degaze pou fer aköz zot ti konnen zot pe al dan eleksyon pou zot ganny *political mileage*. E Seselwa ti krwar poudir *LDS* i senser.

Madanm Speaker, apre ki Komisyon *TRNUC* i prezant rapor ek rekomandasyon avek Prezidan Ramkalawan, Prezidan Ramkalawan in deside pran sa rekomandasyon rapor lalis *perpetrator* gard ek li pa aksyon lo la i pa ti war lenportans pou fer arive sa bann rekomandasyon pou bann viktim ganny zot larzan.

Madanm Speaker, le 23 Fevriye 2024 apre 35 minit 30 segonn pandan ki Prezidan Ramkalawan ti pe prezant son diskour devan Lasanble Nasyonal i ti dir sa fraz swivan, Madanm Speaker, atraver ou mon *quote*; -

“Sa size konpansasyon i reste pli gro lobstak pou nou nasyon e pou Gouvènmman dizour, pou sa ladministrasyon pey okenn konpansasyon sonm i enorm nou pou bezwen ansanm fer

lezot rezonnman lo ki mannyer pou kapab rekonpans viktim ki'n soufer”.

Madanm Speaker, an Zilyet 2024 plis ki 1an ki Prezidan Ramkalawan ti resevwar rapor final *TRNUC* e i ti apwent en *successor buddy* pou travay lo bann reparasyon.

Sa bann dimoun lo sa *successor body* Madanm Speaker, zot ti napa ni en Lalwa pou diriz zot, zot ti napa ni lofis, zot ti napa Bidze, zot ti napa saler andotmo Madanm Speaker, sa *successor body* ki Prezidan Ramkalawan ti apwente an 2024 ti illegal. La en lot laprev ki ladministrasyon *LDS* in diriz par ansyen Prezidan Ramkalawan zot in diriz Sesel par ilizyon. Savedir keksoz ki pa vre.

Madanm Speaker, Prezidan Ramkalawan ek son ladministrasyon in konpletman *mislead* pep Seselwa le 9 Out 2022 Madanm Speaker, Komisyon *TRNUC* ti formelman remet en Polisi reparasyon *volume* 5 avek Prezidan Ramkalawan, sa dokiman i kontyen 90 paz i annan bann rekomandasyon ki kapab donn gidans sa *successor body* pou kontiny bann travay *TRNUC* ki pa ti'n ankor konplet sirtou sa zafer preparasyon.

Madanm Speaker, permet mwan pou mon lir en fraz dan sa dokiman sa *volume* 5 paz 49 dernyen paragraf. Madanm Speaker, mon *quote* sa dernyen paragraf lo paz 49 dan sa volim 5, mon *quote* an Angle; -

“Mindful of the need for continuity and has already noted to the Commission has recommended that 3 of his original Commissioners make up the successor body Vice-President Green, Commissioner Kouli and Archbishop Wong”.

Kestyon ki nou merit pe demande apre midi eski Prezidan Ramkalawan ti lir sa Polisi Reparasyon? Eski i konnen, i konpran ki in mete ladan? Si i konnen akòz i pa'n enplimant li pou li met sa 3 dimoun ki Komisyon TRNUC ti fer rekomandasyon dan sa *Reparation Policy*?

Ankor en fwa, Prezidan i rezet rekomandasyon ki Komisyon TRNUC in donn li. Komisyon TRNUC ti en Komisyon Lezitim ki ti ganny gide par en Lalwa ki Prezidan Ramkalawan pa'n oule ekoute e larzan Seselwa in ganny depandan e li in fer sa ki li i krwar i anvi fer. Madanm Seselwa- Madanm Speaker, se sa ki apel ou en Prezidan ki *mislead* en nasyon avek ilizyon.

Madanm Speaker atraver ou, i fer lapenn ozordi ler Onorab Sopha pe fer sorti sa bann lenformasyon ki konkret mon bann koleg Onorab lot kote latab atraver ou Madanm Speaker, pa ni kapab bat lanmen ouswa dir mwan mon pa vre, i montre ou poudir zot ti dan en ladministrasyon kales kase!

(APPLAUSE)

HON GERRY SOPHA

Madanm Speaker, Prezidan Herminie in pran en desizyon pou pey bann viktim akòz i krwar ki dan Sesel nou devret annan e rekonsilyasyon ek linite nasyonal. E sa ki nou bezwen dan pei, tou pei i annan en zistwar, rekonsilyasyon ek linite nasyonal si in ariv ler pou nou adopte li nou pou bezwen.

Akòz Sesel nou pa nou tousel dan sa monde nou, nou annan en pep ki bezwen linite, ki bezwen rekonsilyasyon pou nou kapab nou tou travay ek nou leker pou fer nou pei bouz devan. Madanm Speaker, konbyen letan nou pa kapab asize dan sa pei e tann 43an, 43an?

En legzersis i fer, zot ti vot lo Bidze LDS, nou bezwen sorti dan sa kare ki nou reste statik nou pa bouze, e si en LDS atraver ou Madanm Speaker, zot war zot ozordi zot

i pri zot dan Lopozisyon set aköz zot in krwar 43an pou anmenn zot ankor o pouvwar kan Seselwa in fini konpran 43an i listwar me nou, nou bezwen *move on*.

E an plis ki sa Madanm Speaker, sa nasyon Seselwa i entelizan ozordi, 2020 sa lav latet ki zot ti gannnen an krwayan i annan bann lanz. Bann Sen, bann Senyer fek kree in desann pou delivre zot, sa bann dimoun in anpay zot Madanm Speaker.

Madanm Speaker, Onorab Sopha in toultan proklanmen mon pa pou zanmen les nasyon Seselwa ganny servi e mal ganny dirize. Lo sa kote latab nou dirizan in montre nou ki mannyer pou travay ler ou dan moman difisil pou ou sirmont difikilte, e sa i en laprev.

Zis mazine apre ki LDS ti'n ganny pouvwar 2020, pouvwar absoli, tou keksoz ki LDS ti kont Madanm Speaker, ler zot vin dan Lasanble 2020 tou keksoz pou zot ki zot ti dir pa bon zot dir i bon.

Madanm Speaker, atraver ou, menm *Leader* Lopozisyon Onorab Bernard Georges ki ti la i fer en proklanmasyon i dir ek pep Seselwa atraver en *sitting* Lasanble Nasyonal "menm en keksoz i vin devan Lasanble menm i pa bon nou pou vot lo

la" be ou pe donn en pep pwazon?

Eski sa dan zot plan ki zot ti met devan Seselwa 2020, zot pou vot lo keksoz ki pa bon ler i anmenn devan zot? Be letan ou vot lo keksoz ki pa bon pou sa pep la, ki ou pe fer sa pep? Ou pe donn li pwazon pou li mor. Selman ou ti dir non, nou pe vin fer zot lavi pli ere.

Me, en komanter ki *defeat* son *purpose* atraver ou Madanm Speaker, Onorab Georges ler i dir wi, mon'n deza dir sa mon pou repete, i dir "wi nou aksepte ki zot in amelyor lavi bokou Seselwa, zis *after* i fini i dir sa Seselwa in montre li wi, nou pou vot sa ladministrasyon ki ou'n aksepte pou amelyor nou lavi e Seselwa in met zot *out*!

MADAM SPEAKER

Onorab i reste ou ankor 2 minit, ankor 2 minit Onorab.

HON GERRY SOPHA

Madanm Speaker, mon remersi Seselwa ki'n ekout mon apre midi ki'n ekout tou bann Onorab lo sa kote latab kot mon ete.

Nou'n montre Lepep Seselwa nou pa bezwen annan sertifika pli gran ki Mahe pou nou fer en deliberasyon ki pou *defeat the purpose of* tou sa ki bann Onorab lo lot kote latab i

dir. Mon remerci ou Madanm Speaker.

MADAM SPEAKER

Onorab Loze.

HON JOHAN LOZE

Madanm Speaker, merci Madanm Speaker. Bonswar tou dimoun a lekout e tou koleg Onorab.

Madanm Speaker, in pran *LDS* 3 zour, zis 3 zour komansman avek Onorab Georges, termin avek mon koleg byen estimen Onorab Arissol pou zot prouv laverite dan en parol, en parol ki'n ganny pronons par Prezidan Patrick Herminie konmkwa ki lasante mantal i enn bann pli gro problem dan nou pei ozordi.

Madanm Speaker, pandan 3 zour zot in asiz la anndan e zot in zis balbise lo bann promes *United Seychelles*. Konmsi nou'n o pouvwar pandan sa dernyen 5an dan plas zot.

Me *LDS* zot in dan Lopoziyon pou en pake lannen e zot in fer en pil pake promes, finalman letan ki Seselwa in deside pou konfyé zot avek pouvwar, tou zot pake promes in zis evapore dan lenzirditan. Pandan 5an ni rimer zot bann ta promes seselwa pa'n tandé, ni loder zot promes Seselwa pa'n santi e se zis mous ver zot promes ki

sa pep in bezwen viv avek antoure lo tou sa ki sap dan zot labous.

Alors, mon pa sirprann si letan ki Prezidan Herminie in komans redistribye larises avek sa pep ki apel Seselwa, zot in komans gronnyen e rouspete aköz distribye larises sa pep avek sa pep i en keksoz ki pa'n zanmen dan zot natir, i pa dan zot *DNA*, i pa dan zot sistenm, *SNP* se pa *LDS*, zot pa'n zanmen kontan letan ki sa pep i ganny larzan.

I fer fermal dan zot profon sansib si en Seselwa i ganny ede, i ganny asiste, i ganny leve par son prop Gouvernman, sa mantalite avar, baif e konn zis pou zot ki ti fer ki 2 zot prop *MNA* dan sizyenm Lasanble ki ti resevwar lasistans sosyal ti kontinyen tous sa lasistans menm apre ki zot ti'n vin *MNA* e ti pe tous gro saler *MNA*.

Ler zot ti pe anpar zot gro gargoulet anba ladal lasistans sosyal, zot pa war poudir sa en labi, zot pa konplent dir sa pe donn bal, pe larg dilo pe manipil dimoun, pe kontrol zot avek lasistans sosyal. Non, letan ki'n ariv ler pou anpli zot Denden zot ranpli plen ziska i deborde, plen ziska i a desire me ler ki'n ariv ler pou zot frer tous 2 kas, zot a lev depi 4er bomaten e fer 7 nevenn groker zis pou anpese ki zot frer i ava benefisye.

Sanmenm sa rezon ki ozordi zot pe asiz laba kot zot ete. E *boss baby* li pe gel son siset, son *bodyguard*, son tetinn, son loto an piblik. 2020 Seselwa ti'n fer zot konfyans be dan mwens ki 5an Seselwa ti'n fini realize poudir sa set en salte alors, zot in deside zete.

Ler zot ti pe kriye kit li lanmenm Seselwa li i ti'n deside poudir salte ou pa kite dan salon, leve zet dan bin.

Angle in fer 200an, *United Seychelles* in fer 43an, *SNP* zot sepa *LDS*, zot in fer zis 5an e 5an zot in fer avek martir, en 5an kot zot in fer sa pep plis martir ankor. Ozordi zot annan lodas dir nou ki nou pa les zot koz lo 43an, be *by all means mes chers amis*, kontinyen koz lo 43an e zot ava gete kote sa pou anmenn zot.

E la, mon konnen i fermal ki sa R2 ki'n bese lo pri bis, ki sa trezyenm mwan saler an plen, ki sa kart *STC*, ki sa R800 logmantasyon lo pansyon retret, ki sa laz retret ki'n bese pou retourn 63an, ki sa 12 nouvo komodite ki'n azoute lo lalis *STC*, ki sa nouvo Polisi nitrisyon ki pe al ganny entrodwir pou asire ki tou fanmir Seselwa i kapab manz en repa konvenab.

Mon konnen ki sa i fermal ou zot, i fermal depi dan zot baba leker, aköz zot la, zot pa oule war zot fer Seselwa

benefisye e avanse, *SNP* sepa *LDS* zot pa oule war Seselwa ganny larzan. Be la a sa moman les mon dir zot en pti sakre pou adousi zot leker *mes chers collègues trust the process!*

2020 koman zot ti antre, premye keksoz zot ti pran en manman kouto nanmsennan e koup tou sa ki apel benefis pou sa pep. An menm tan ki zot ti pe martiriz zot prosen, zot dirizan ti deside pou li al anploy *cabin crew* e diriz pei par *remote control*.

I ti travay *Abu Dhabi* e vin Sesel zis lo vakans. E lo son ban Sesel i ti double vakans ankor, retret *Silhouette* pou *Cabinet* bann retret e en pti 3milyon lo zil ki i fer, Des Roches ant kopen avek koken. Mango House dan Merkredi kot travayer Seselwa ti ganny penalize e *Ephelia* dan *weekend*.

Be mon annan bon nouvel pou zot, Seselwa son 5an martir in terminen, zot in asiz la anndan pandan 3zour e sey konvenk sa pep pou kanonin zot, zot tou la anndan zot sen, pli sen ki tou sen, zot lanmen i pli prop ki *Javel*, zot pa'n zanmen fer sa pep naryen zot, bann pov pti sen *LDS*.

Selman, anba zot Gouvernman ti'n arive annan zis 115 nou fere e ser Seselwa ki pe resevwar lasistans sosyal. Oule dir mwan ki dan

sa pei ti annan zis 115 dimoun ki ti kalifye pou lasistans sosyal? Sa se bann kalite prensip ki zot i defann, prensip ankouraz soufrans sa pep.

Ladan menm sa menm dimoun ki ti pe martiriz Seselwa ti annan lodas pou tret son pro tayer koan bourik. Prezan, ekout mwan byen, sa menm madanm ki ti ansarz koup zot *welfare* e fer zot martir, ozordi en papye pe sirkile kot Vis-Prezidan Afif pe demann SRC pou eskiz *tax* son prop frer, son frer.

Ou *welfare* ti tro bokou pou ou e sa madanm ti bezwen koupe, be *welfare tax* pou son frer i *ok*. Soutire e sipoter par Prezidan e Vis-Prezidan LDS Wavel John Charles Ramkalawan e Ahmed Afif. La prezan zot asize gele aköz pou annan lenvestigasyon dan zafer *cold store STC*.

Konmsi zot in fer en bon keksoz dapre zot? Pa gete, pa fouye, pa kestyonnen. En boug i ganny peye \$7milyon pou fer en *cold store* ki pa oule marse apre demann leskiz pou li pa pey *tax* lo son \$7milyon. Napa problem, zis les zot. La ozordi zot in alerzik avek lenvestigasyon. Be si napa naryen al ki zot pe kasyet? Si zot pa'n fer naryen mal ki zot per?

I kapab 8, 10 ouswa 18 lenvestigasyon pa zot dir zot

lanmen i prop, ki zot pe gele? Lenvestigasyon pe ganny fer dan byen e propriyete leta ki problem? *Trust the process* mon ban zanmi!

Zot bliye ki dan sizyenm Lasanble zot ti fer en Komite Lasanble pou *investigate* kankan ant 2 zonm, letan ki Onorab Ferrari ti al rod lipou laplenn kolez dan aktivite spor *Defence Forces* dat sa zot bliye, kankan zonm zot fer Komite lenvestigasyon *live* lo televizyon, \$7milyon *cold store STC* sa pa koze, reste trankil ar wi ratous, ratous. Ratous, ratous menm.

LDS zot sipoze parfe, pa'n zanmen fer naryen mal, selman koman zot tann lenvestigasyon zot tranble. Pourtan yer ti annan enn ti menas nou avek en pti tors bolpenn, letan ki i ti pe delivre son gran *speech* Manman Makout. Lenvestigasyon pou bezwen annan, zot kapab gele ziska ki zot deplise si zot oule selman sa pep pou bezwen konnen ki'n arive dan sa pei.

Ler zot atann lenvestigasyon prezan vin sant nou linite, mon zanmi linite, mon zanmi, linite pa vedir kasyet pese, linite wi, selman nou oule linite dan laverite, si Seselwa ti oule kasyet pese, Seselwa ti a'n kit zot la, lefe ki Seselwa in resikle zot vedir nou pep i oule linite dan laverite. *Comme* dir nou gran

vedet lokal Ricky Ras, “lekleraz ki pou tir zot dan ta fouyaz” *respect* Ras! Alors, wi pou annan lenvestigasyon, e pa sey vin zwen kouk kasyet avek nou.

Kot ou'n deza tande ki dan en pei souveren, 6 Mersener Angle i antre se ou lo permi touris, e san ni menm en kontra travay lo lord en sivilyen, militer i donn sa 6 mersener zarm e zot *proceed* pou komans aret nou sitwayen, fouy zot propriyete, plant levidans gos, drwat e pou fer pli gou zot ekrir en blog lo medya sosyal pou akont zot bann forfe dan Sesel konmsi nou, nou en dernyen nasyon dimoun nou.

E ou konnen kwa? Avek tou sa pake simagri ki zot 6 Mersener in fer, napa enn parmi sa 6 ki'n posed kouraz pou vin tir figir devan lakour pou vin donn levidans. Konmsi ki kalite Repiblik Bannann retarde ki zot ti pe sey kree dan sa pei? Prezan ozordi letan ki nou oule eklersi tou sa bann dezord ki zot in fer zot gele pandan 3zour, dir nou pe enterfer avek Zidisyer. Be konmsi pa pou eklersi?

Ki mannyer eski nou sitwayen in ganny arete par bann aranze arme? Ki mannyer 6 touris ki ti pe fer *search* lo propriyete sitwayen Seselwa? Ki mannyer eski nou

sitwayen in ganny arete lo en let sinyen par en Minis?

Ki mannyer eski en Angle i kapab debout devan Lakour admet avek Ziz ki i pa kapab sarz sa bann dimoun selman kit zot lo rimann, aköz Lasanble pe al amann en Lalwa ki pou fer son bann sarz ilegal vin legal? Kote sa Angle ti konnen ki mwan mon pe al fer dan Lasanble?

Ki mannyer eski en o Zofisye *SDF* i ganny adrese ganny met an detansyon apre Komandan Sef i ekrir i en let kot i ekrir li i dir li zot pe termin son kontra aköz pou 3 semenn i pa'n raport travay e zot pa konnen kot i ete. Be zot Senyer, ou'n aret en boug, i dan detansyon, ki mannyer oule i raport travay? Komandan Sef Repiblik Bannann ti fou ouswa latet ki pa bon?

La ler in ariv ler pou eklersi prezan zot oule zwe gele, zwe fer lapenn, dir nou pe enterfer, dir nou pe persekit zot prop pti dirizan, persekisyen sa? Ouswa nou pe sers laverite?

Ozordi zot in develop en sitan gran respe pou Lalwa, selman letan ki sa imsyen ki drwa polis ki R200milyon *tax* ti antre dan pei malgre i ti annan warant, al manze e bwar, tir portre, fer *bitters* avek zot Prezidan sa ti napa okenn problem sa.

La zot gele ki Nassim in antre dan pei, selman letan zot ti fer li glis trankil 3er bomaten dan avyon *IDC* kit pei. dan pals aret li, amenn li Ankour parey Angle ti aret nou Seselwa aret li ziz li parey tou kriminel, zot glis li zot fer li ale, dir mon en keksoz *mes chers amis*, belfiy pour ki sa? En belfiy pour ki sa? Lekel ki ti met li lo avyon so boper?

Zot trouve ki drog i partou ki dan zot distrik in vin pli pir ki la sityasyon in retourn dapre zot *business as usual* anba *US*. Selman zot zwe bliye ki zot Minis i asiz la anndan dan sa Lasanble e admet ki drog ki zot in al sezi lo lanmer e anmenn isi ater ti'n ganny vole dan *store* e ariv lo gento.

Sa ti en lensidan ki zot ti forse admet, me nou konnen ki'n annan plizyer ankor, aköz anba zot ladministrasyon sa swadizan ibou ti'n vin pli gro lera ki ti egziste dan nou sosyete. Ou pa kapab kontrol drog si ou mont lo gento pou pet grenad zis ler drog pa pour ou'n me ler ki gento i plen avek drog ki pou ibou, la tou keksoz i trankil, sete sa *business as usual*.

Mes amis, zot de fas, mon pe dir ou zot de fas. Mon a donn en legzanp; -

Mardi i annan enn in asize lo son poto i evok tou non demon dan lanfer, ki i kapab

vole pou li dekrir nou avek. Selman la mon oule fer en keksoz kler pou Seselwa, ou war mon Johan Loze la? Zanmen dan mon lavi mon'n deza asiz anba lavarang Prezidan Herminie pou mon bwar *whisky*, zanmen, zanmen!

Prezan, ou siporter *LDS*, met byen dan ou lespri ki ler satan ti'n dir avek zezi pran gale fer vin dipen anvale, e Zezi pa ti ekout li, si Zezi ti ekoute, nou tou nou ti pou dan en pil problebm ozordi. Aprezan ou ozordi la, letan satan ki pe dir ou anval gale, pa bezwen ekout li, aköz sa ki pe maltrete la, la bann menm kot i al asize pou li al bwar *whiskey* kas lo sou, *enjoy good company*. Prezan ou ekout li ou, ler i asiz dan Lasanble i kriy satan, i kriy belzebit.

E sitwayen Ramkalawan mon annan en mesaz senser pou ou, tir en lizye lo *US*, met laba dan ou kan, aköz sa ki zot pe kwi pou ou, ou pou kontan ou menm. Dan Lasanble zot tou pe defann ou, me dan prive mazorite zot pe kraz ou, menm sa ki dirize i dir son *Caucus* ki 90 poursan blanm si zot in perdi eleksyon se gras a ou sitwayen Ramkalawan.

Petet ou a nobou tir enn de ki a vreman lwayal avek ou, mon pa tro krwar, zis Onorab Arissol, ou pa pou gannyen ankor byen, byen laba lot kote.

Letan mon dir zot 2 fas annou pran sa size *TRNUC*, *TRNUC* ti sipoze pran en sapit dan nou listwar e anmenn li a en lafen ki ti pou plizoumwèn 100 pousan satisfèzan. E dapre son non i sipoze apòrt laverite, rekonsilyasyon e linite nasyonal.

I ti sipoze apòrt sa size a son lafen, anmenn en finalite avèk. Be realite se ki *TRNUC* in donn *SNP* sepa *LDS* en bourik batay, e la menm si sa bourik pe mor anba zot, zot pa pou zanmen large. I pa zot lentansyon pou apòrt sa size a son lafen me pou eternalman kontinyen zwe dan sa boubou e viv lo soufrans sa bann dimoun zis parey en bann moustik emosyonnel ki bezwen sis soufrans zot prosen pou viv.

E sitwayen Ramkalawan in admet son laverite lo televizyon, konmkwa ki depi letan i ti Prezidan dapre li i ti konnen ki se *US* ki devret pey konpansasyon e sanmenm in pa'n ariv lo sa size konpansasyon.

Mon zanmi, ou ti konnen, ou ti konnen e ou pa fer naryen, be kwa, dimoun in elekte ou koman spektater? En Prezidan in ganny elekte pou li pran desizyon, i pa pou debout akote, gele. Si depi ou ti Prezidan ou ti konnen ki *US* ti devret pey konpansasyon

nou ti'n devret azir Akoz tou pouvwar ti dan ou lanmen.

Me si parkont ou ti konnen, e ou pa'n fer nanryen mon zanmi ou zis en donner, - (*Unparliamentary Madanm Speaker*)-. Sitwayen Ramkalawan, pa'n zis Prezidan. Me dan 6enm Lasanble sete li ki ti Chair sa *Committee* ki ti *set up TRNUC*. E son *framework* legal ti *brainchild* pa lot ki Onorab Georges, avèk Onorab Basil Hoareau.

Alors, depi komansman zot ti'n kapab adres sa zafer *US* pey konpansasyon, si zot ti'n vreman serye vi ki sitwayen Ramkalawan, i dir zot ti konnen. Zot ti konnen, e zot ti annan non selman tou sans pou azir lo zot konesans. Me egalman tou pouvwar pour zot fer li. Me zot in swazir, zot in swazir pou pa fer nanryen.

La ozordi zis asize gele zot tou, zot en bann donner, - (*Unparliamentary Madanm Speaker*)-. Zot en Gouvernman ki'n *fail*, e letan zot Prezidan in admet ki dapre li i ti konnen lekel ki ti sipoze pey konpansasyon, me i pa'n fer nanryen la in admet son *failure* personnel li osi.

Zot ti annan en *duty of care* anver sa bann viktim *TRNUC*. En *duty* ki zot in negligè, e la prezan zot vire e zot oule ankòr benefisye lo sa negligans ki zot in komet.

Be sa ki *SNP* sepa *LDS* in oubliye, se ki zot ti komans sa pro- zot pa ti komans sa prose zot tousel, zot ti annan en partener senser dan Prezidan Danny Faure, e se zisteman Prezidan Faure, ki Prezidan Herminie, in donn latas e mon dir latas pou fer sa ki zot *LDS* zot pa'n annan ase kouraz pou fer.

Se Prezidan Faure, ki ti komans sa prose *TRNUC* avek zot, e se li ki pou anmenn sa *closure*, sa finalite ki bann viktim pe rode. Alors, mon fortman ankouraz bann viktim *TRNUC* pou zis *trust the process*!

(APPLAUSE)

HON JOHAN LOZE

Prezidan Faure, pe vin fini sa ki in komanse.

Dan sa dernyen trwa zour nou'n aprann serten keksoz enteresan, nou'n aprann ki *US* in ganny eleksyon aköz dimoun pa kontan Wavel. Me apre ki zot dir nou sa, zot in pas trwa zour pe lager lebra kase pou defann sa menm Wavel. Ki vedir ou kontan Wavel, pa kontan Wavel sa bann dimoun ki la anndan zot determinen pou fors zot Wavel dan ou lagorz.

(APPLAUSE)

HON JOHAN LOZE

Me an menm tan, ki zot in dir nou ki dimoun pa kontan Wavel, zot in osi ensiste ki Wavel, i dirizan lanmwatye nou popilasyon. E la mon oule repet parol Prezidan Herminie, ekout mwan silvouple.

“Lasante mantal i enn bann pli gro problem dan nou pei ozordi, perdi eleksyon apre deklare ki ou dirizan lanmwatye popilasyon.” I pa en siny stabilite mantal sa Senyer.

Legzanp i kler devan nou an lannen 2020, apre ki i ti'n perdi eleksyon Prezidan Faure, pa ti deklar son lekor dirizan imaziner nanryen ditou li, i ti avanse trankilman e zis les pouvwar anfle zot latet. Swadizan i dirizan lanmwatye popilasyon selman i pas tou son letan pe rod, “mon *bodyguard*, mon loto, mon biro, mon pistol, mwan, mwan, mwan!” I kler ki sa zonm i dirizan pour zis son lekor touse, e son prop lentere.

Sesel napa 2 lanmwatye popilasyon, Sesel i annan en popilasyon, napa dirizan en lanmwatye, e lot lanmwatye. Nou popilasyon in elekte en dirizan, e en direksyon. Eski ou konpran sa Onorab Georges? E menm si ou pa'n konpran, ou annan zis pou ou met ou sentir, asiz dan fon, e *trust the process*!

(APPLAUSE)

HON JOHAN LOZE

Kwa ki difisil ladan? Me si ou annan *trust issues* parey ou'n dir nou depi ou'n komanse, ou annan en gro problem mon dalon.

Mon oule terminen par felisit, e ankouraz tou travayer Seselwa pour sa lannen dir ki devan nou. Be selman sa ki mon konnen se ki Seselwa pa pares, e nou pa per pou travay. E pour bann travayer servis piblik, mon swet zot bokou kouraz pour sa lannen travay dir ki devan zot. In fini lepok kot zot ti zis ganny maltrete e tiraye devan Lasanble.

I pou annan presyon, bokou presyon. I pou annan bokou demann avek legzizans lo zot. Presyon pou vin akòz an 2021, *then* Dokter Patrick Herminie, ti realize ki son pep i *deserve* bokou pli meyer, ki zot ti pe gannnen. I ti pran desizyon pour li vin sa zonn ki delivre lo sa bann swe, rev, e laspirasyon son pep.

Alors, si i annan bokou presyon, sa i vin akòz ki anba direksyon Prezidan Herminie, nou anvi delivre plis pour nou pep. Plis lakaz, meyer ledikasyon, meyer lasante, pli bon servis, lord avek lape, sekirite finansyel, e prosperite an zeneral.

Sa lo sa kote latib, sa i nou rev, sa i nou swe, sa i vre

misyon Prezidan Patrick Herminie. Alors, Seselwa *trust the process*!

(APPLAUSE)

MADAM SPEAKER

Bon nou'n ariv a lafen nou sesyon ozordi. E nou pou alors *adjourn* ziska nou lot *sitting* Mardi prosen.

(ADJOURNMENT)